

欽定唐書

卷一百七十一

土岐文庫

文庫17

W202

20

30

25

20

15

10



文庫 17  
W202  
20

010185193700

昭和六十年二月一日  
土岐善吉氏寄贈

唐書卷一百七

宋 端 明 殿 學 士 宋 祁 撰

列傳第三十二

傅呂陳

傅非相州鄴人隋開皇中以儀曹事漢王諒諒反問非今茲熒惑入井果若何對曰東井黃道所由熒惑之會烏足怪邪若入地上井乃為災諒怒俄及敗非以對免徙扶風高祖為扶風太守禮之及即位拜太史丞會令庾儉以父質占候忤煬帝死懲其事恥以術宜薦非自代非遷令與儉同列數排毀之儉不為恨於是人多儉仁罪非遠且忿時國制草具多仍隋舊非謂承亂世之後當有變更乃上言龍紀火官皇帝廢之咸池六英堯不相訟禹弗行舜政周弗襲湯禮易稱己日乃乎革而信也故曰革之時大矣哉有隋之季違天害民專峻刑法殺戮賢俊天下兆庶同心叛之陛下撥亂反正而官名律令一用隋舊且懲沸羹者吹冷鑿傷弓之鳥驚曲木況天下久苦隋暴安得不新其耳目哉改正朔易服色變律令革官名功極作樂治終制禮使民知盛德之隆此其時也然官貴簡約夏后官百不如虞氏五十周三百不如商之百又曰夏有亂政而作禹刑商有亂政而作湯刑周有亂政而作九刑衛鞅為秦制法增鑿蠶抽脅鏡

乾隆四年校刊 唐書卷一百七列傳





烹等六篇始皇爲挾書律此失於煩不可不監是時太僕卿張道源建言官曹文簿繁總易欺請減之以鈐吏姦公卿舉不爲然非獨是之爲衆沮豈不得行武德七年上疏極詆浮圖法曰西域之法無君臣父子以三塗六道嚇愚欺庸追既往之罪窺將來之福至有身陷惡逆獄中禮佛口誦梵言以圖偷免且生死壽夭本諸自然刑德威福繫之人主今其徒矯託皆云由佛壞天理竊主權書曰惟辟作福惟辟作威惟辟玉食臣有作福作威玉食害于而家凶于而國五帝三王未有佛法君明臣忠年祚長久至漢明帝始立胡祠然惟西域桑門自傳其教西晉以上不許中國髡髮事胡至石苻亂華乃弛厥禁主庸臣佞政唐祚短事佛致然梁武齊襄尤足爲戒昔褒姒一女營惑幽王能亡其國況今僧尼十萬刻繪泥像以惑天下有不亡乎陛下以十萬之衆自相夫婦十年滋產十年教訓兵農兩足利可勝旣邪昔高齊章仇子他言僧尼塔廟外見毀宰臣內見疾妃嬙陽譏陰謗卒死都市周武帝入齊封寵其墓臣竊賢之又上十二論言益痛切帝下奔議有司唯道源佐其請中書令蕭瑀曰佛聖人也非聖人者無法請誅之奕曰禮始事親終事君而佛逃父出家以匹夫抗天子以繼體悖所親瑀非出空桑乃尊其言蓋所謂非孝者無親瑀不答但合爪曰地獄正爲是人設矣帝善非對未及行會傳位止初九年太白躔秦分奔秦秦王當有天下帝以奏付正及太宗卽位召賜食謂曰向所奏幾敗我雖然自今毋有所諱而不盡言又嘗問卿

拒佛法奈何奔曰佛西胡黠人爾欺誅夷狄以自神至入中國而熾兒幻夫摸象莊老以文飾之有害國家而無補百姓也帝異之貞觀十三年卒年八十五奔病未嘗問醫忽酣臥蹶然悟曰吾死矣乎卽自誌曰傳奔青山白雲人也以醉死嗚呼遺言戒子六經名教言若可習也妖胡之法慎勿爲吾死當保葬奔雖善數然嘗自言其學不可以傳又注老子并集晉魏以來與佛譏駁者爲高識篇武德時所改漏刻定十二軍號皆詔奔云

呂才博州清平人貞觀時祖孝孫增損樂律與音家王長通白明達更質難不能決太宗詔侍臣舉善音者中書令溫彥博白才天悟絕人聞見一接輒究其妙侍中王珪魏徵盛稱才製尺八凡十二枚長短不同與律諧契卽召才直弘文館參論樂事帝嘗覽周武帝三局象經不能通或言太子洗馬蔡允恭能之召問允恭少通其略老乃忘試問才退一昔卽解具圖以聞允恭記其舊與才正同由是知名擢累太常博士帝病陰陽家所傳書多謬僞淺惡世益拘畏命才與宿學老師刪落煩訛撮可用者爲五十三篇合舊書四十七凡百篇詔頒天下才於持議儒而不俚以經誼推處其驗術諸家共訶短之又舉世相感以禍福終莫悟云才之言不甚文要欲救俗失切時事俾易曉也故劄其三篇卜宅篇曰易稱上古穴居而野處後世聖人易之以宮室蓋取諸大壯殷周時有卜擇之文詩稱相其陰陽書卜洛食近世乃有五姓



謂宮也商也角也徵也羽也以爲天下萬物悉配屬之以處吉凶然言皆不類如張王爲商武庚爲羽是以音相諧附至柳爲宮趙爲角則又不然其間一姓而兩屬復姓數字不得所歸是直野人巫師說爾按堪輿經黃帝對天老始言五姓且黃帝時獨姬姜數姓耳後世賜族者寔多然管蔡郟霍魯衛毛聃卨雍曹滕畢原鄆郇本之姬姓孔殷宋華向蕭亳皇甫本之子姓至因官命氏因邑賜族本同末異固爲配宮商哉春秋以陳衛秦爲水姓齊鄭宋爲火姓或所出之祖所分之星所居之地以著由來非宮商角徵羽相管攝也祿命篇曰漢宋忠賈誼譏司馬季主曰卜筮者高人祿命以悅人心矯言禍福以規人財王充曰見骨體知命祿見命祿知骨體此則言祿命尙矣推索本原因不其然積善之家必餘慶豈建祿而後吉乎積惡之家必餘殃豈劫殺而後災乎皇天無親嘗與善人天人之交如影響有夏多罪天命勅絕宋景修德妖星退舍學也祿在其中不生當建學文王憂勤損壽非初值空亡長平坑降卒非俱犯三刑南陽多近親非俱當六合歷陽成湖不共河魁蜀郡炎火不盡災危世有同建與祿而貴賤殊域共命若胎而天壽異科魯桓公六年七月子同生是爲莊公按歷歲在乙亥月建申然則值祿空亡據法應窮賤又觸句絞六害備驛馬身尅驛馬三刑法無官命火也生當病鄉法曰爲人尪弱癯而詩言莊公曰猗嗟昌兮頌而長兮美目揚兮巧趨踰兮唯向命一物法當壽而公薨止四十五一不驗秦莊襄王四十

八年始皇帝生以正月故名政是歲壬寅正月命備祿於法無官假得祿奴婢應少又破驛馬三刑身尅驛馬法望官不到命金也正月爲絕無始有終老而吉又建命生法當壽帝崩時不過五十二不驗漢武帝以乙酉歲七月七日平旦生當祿空亡於法無官雖向驛馬乃隔四辰法少無官老而吉武帝卽位年十六末年戶口減耗三不驗後魏高祖孝文皇帝生皇興元年八月是歲丁未爲備祿命與驛馬三刑身尅驛馬於法無官又生父死中法不見父而孝文受其父顯祖之禪禮君未踰年不得正位故天子無父事三者也孝文率天下以事其親而法不合識父四不驗宋高祖癸亥三月生祿與命皆空亡於法無官又生子墓中法宜嫡子雖有次子當早卒而高祖長子先被弑次子義隆享國又生祖祿下法得嫡孫財若祿其孫劬濬皆篡逆幾失宗祧五不驗葬篇曰易稱古之葬者衣之以薪不封不樹喪期無數後世聖人易之以棺槨蓋取諸大過經曰葬者藏也欲人之弗得見也又曰卜其宅兆而安厝之以是爲感慕之所也魂神之宅也朝市買遷不可知石泉頽齧不可常是以謀及卜筮庶無後艱斯則備於慎終之禮也後代葬說出于巫史一物有失便謂災及死生多爲妨禁以售其術附妄憑妖至其書乃有百二十家春秋王者七日而殯七月而葬諸侯五日而殯五月而葬大夫三月士庶人逾月而已貴賤不同禮亦異數此直爲赴弔遠近之期量事制法故先期而葬謂之不懷也後期不葬謂之殆禮也此則葬有定期不擇



年與月一也又曰丁巳葬定公而不克葬至于戊午襄事君子善之禮卜先遠日者自末而進避不懷也今法已亥日用葬最凶春秋是日葬者二十餘族此葬不擇日二也禮周尚赤大事用旦殷尚白大事用日中夏尚黑大事用昏大事者何喪禮也此直取當代所尚而不擇時早晚也鄭卿子產及子太叔葬簡公於是司墓大夫室當柩路若壞其室即平旦而壻不壞其室即日中而壻子產不欲壞室欲待日中子太叔曰若日中而壻恐久勞諸侯大夫來會葬者然子產太叔不問時之得失惟論人事可否而已曾子曰葬逢日蝕會於路左待明而行所以備非常也按法葬家多取乾艮二時乃近夜半文與禮乖此葬不擇時三也經曰立身行道揚名於後世以顯父母易謂聖人之大寶曰位何以守位曰仁而法曰官爵富貴葬可致也年壽修促子姓蕃衍葬可招也夫日慎一日澤及無疆德則不建而祚乃無永臧孫有後子魯不聞葬得吉也若敖絕嗣於荆不聞葬得凶也此葬有吉凶不可信四也今法皆據五姓爲之古之葬並在國都之北趙氏之葬在九原漢家山陵或散處諸域又何上利大墓小墓爲哉然劉之子孫本支不絕趙後與六國等王此則葬用五姓不可信五也且人有初賤而後貴始泰而終否者子文爲令尹三仕三已展禽三黜於士師彼冢墓已定而不改此名位不常何也故知榮辱升降事關諸人而不由於葬六也世之人爲葬巫所欺忘辨踊荼毒以期徼幸於是相塋隴希官爵擇日時規財利謂辰日不哭欣

然而受弔謂同屬不得臨壙吉服避送其親詭敦禮俗不可以法七也帝又詔造方域圖及教飛騎戰陳圖屢稱旨擢太常丞麟德中以太子司更大夫卒生平預修書及著述甚多子方毅七歲能誦經太宗聞其敏召見奇之賜束帛長爲右衛鎧曹參軍母喪以毀卒布車從母葬通人郎餘令以白粥玄酒生芻祭路隅世共哀之

陳子昂字伯玉梓州射洪人其先居新城六世祖太樂當齊時兄弟競豪傑梁武帝命爲郡司馬父元敬世高貲歲飢出粟萬石賑鄉里舉明經調文林郎子昂十八未知書以富家子尙氣決弋博自如他日入鄉校感悔即痛修飭文明初舉進士時高宗崩將遷梓宮長安於是關中無歲子昂感言東都勝塏可營山陵上書曰臣聞秦據咸陽漢都長安山河爲固而天下服者以北假胡宛之利南資巴蜀之饒轉關東之粟而收山西之寶長羈利策橫制宇宙今則不然燕代迫匈奴巴隴嬰吐蕃西老千里羸糧北丁十五乘塞歲月奔命秦之首尾不完所餘獨三輔間耳頃遭荒饑百姓荐飢薄河而右惟有赤地循隴以北不逢青草父兄轉徙妻子流離賴天悔禍去年薄稔羸耗之餘幾不沈命然流亡未還白骨縱橫阡陌無主至於蓄積尤可哀傷陛下以先帝遺意方大駕長驅按節西京千乘萬騎何從仰給山陵穿復必資徒役率羸弊之衆興數萬之軍調發近畿督扶稚老鑿山輦石驅以就功春作無時何望有秋彫甍遺囑再罹



艱苦有不堪其困則逸爲盜賊揭挺叫噓可不深圖哉且天子以四海爲家舜葬蒼梧禹葬會稽豈愛夷裔而鄙中國耶示無外也周平王漢光武都洛而山陵寢廟並在西土者實以時有不可故遺小存大去禍取福也今景山崇秀北對嵩邙右眇汝海祝融太昊之故墟在焉園陵之美復何以加且太原層鉅萬之倉洛口儲天下之粟乃欲捨而不顧儻鼠竊狗盜西入陝郊東犯虎牢取敖倉一杯粟陛下何與遇之武后奇其才召見金華殿子昂貌柔野少威儀而占對慷慨擢麟臺正字垂拱初詔問羣臣調元氣當以何道子昂因是勸后興明堂太學卽上言臣聞之於師曰元氣天地之始萬物之祖王政之大端也天地莫大於陰陽萬物莫靈於人王政莫先於安人故人安則陰陽和陰陽和則天地平天地平則元氣正先王以人之通於天也於是養成羣生順天德使人樂遂業甘其食美其服然後天瑞降地符升風雨時草木茂遂故顛頊唐虞不敢荒寧其書曰百姓昭明協和萬邦黎人於變時雍迺命羲和欽若昊天歷象日月星辰敬授人時和之得也夏商之衰桀紂昏暴陰陽乖行天地震怒山川鬼神發妖見災疾疫大興終以滅亡和之失也迨周文武創業誠信忠厚加于百姓故成康刑措四十餘年天人方和而幽厲亂常苛虐暴虐誅黷天地川冢沸崩人用愁怨其詩曰昊天不惠降此大戾不先不後爲虐爲瘵顧不哀哉近隋煬帝恃四海之富鑿渠決河自伊洛屬之揚州疲生人之力洩天地之藏中國之難起故身死人手宗廟

爲墟逆元氣之理也臣觀禍亂之動天人之際先師之說昭然著明不可欺也陛下含天地之德日月之明眇然遠思欲求太和此伏羲氏所以爲三皇首也昔者天皇大帝攬元符東封太山然未建明堂享上帝使萬世鴻業闕而不昭殆留此盛德以發揮陛下哉臣謂和元氣睦人倫捨此則無以爲也昔黃帝合宮有虞總期堯衢室夏世室皆所以調元氣治陰陽也臣聞明堂有天地之制陰陽之統二十四氣八風十二月四時五行二十八宿莫不率備王者政失則災政順則祥臣願陛下爲唐恢萬世之業相國南郊建明堂與天下更始按周禮月令而成之迺月孟春乘鸞輅駕蒼龍朝三公九卿大夫于青陽左个負斧辰馮玉几聽天下之政躬藉田親蠶以勸農桑養三老五更以教孝悌明訟恤獄以息淫刑修文德以止干戈察孝廉以除貪吏後宮非妃嬪御女者出之珠玉錦繡雕琢伎巧無益者棄之巫鬼淫祀營惑於人者禁之臣謂不數期且見太平云又言陛下方興大化而太學久廢堂皇埃蕪詩書不聞明詔尙未及之愚臣所以私恨也太學者政教之地也君臣上下之取則也俎豆揖讓之所興也天子於此得賢臣焉今委而不論雖欲睦人倫興治綱失之本而求之末不可得也君子三年不爲禮禮必壞三年不爲樂樂必崩奈何爲天下而輕禮樂哉願引胷子使歸太學國家之大務不可廢已后召見賜筆札中書省令條上利害子昂對三事其一言九道出大使巡按天下申黜陟求人瘼臣謂計有未盡也且陛下發使必欲使



百姓知天子夙夜憂勤之也羣臣知考績而任之也姦暴不逞知將除之也則莫如擇仁可以恤孤明可以振滯剛不避疆禦智足以照姦者然後以爲使故輪軒未動而天下翹然待之矣今使且未出道路之人皆已指笑欲望進賢下不肯豈可得邪宰相奉詔書有遣使之名無任使之實使愈出天下愈敝徒令百姓治道路送往迎來不見其益也臣願陛下更選有威重風槩爲衆推者因御前殿以使者之禮禮之諄諄戒敕所以出使之意乃授以節自京師及州縣登拔才良求人瘼宣布上意令若家見而戶曉昔堯舜不下席而化天下蓋黜陟幽明能折衷者陛下知難得人則不如少出使彼煩數而無益於化是烹小鮮而數撓之矣其二言刺史縣令政教之首陛下布德澤下詔書必待刺史縣令謹宣而奉行之不得其人則委棄有司掛牆屋耳百姓安得知之一州得才刺史十萬戶賴其福得不才刺史十萬戶受其困國家興衰在此職也今吏部調縣令如補一尉但計資考不求賢良有如不次用人則天下囂然相謗矣枉于常而不變也故庸人皆任縣令教化之陵遲顧不甚哉其三言天下有危機禍福因之而生機靜則有福動則有禍百姓安則樂生不安則輕生者是也今軍旅之弊夫妻不得安父子不相養五六年矣自劍南盡河隴山東由青徐曹汴河北舉滄瀛趙鄭或因水旱或頓兵疫死亡流離略盡尙賴陛下憫其失職凡兵戍調發一切罷之使人得妻子相見父兄相保可謂能靜其機也然臣恐將相有貪夷狄利以廣地

二號第九 五批

疆武說陛下者欲動其機機動則禍構宜修文德去刑罰勸農桑以息疲民蠻夷知中國有聖王必累譯至矣于時吐蕃九姓叛詔田揚名發金山道十姓兵討之十姓君長以三萬騎戰有功遂請入朝后責其嘗不奉命擅破迴紇不聽子昂上疏曰國家能制十姓者繇九姓疆大臣伏中國故勢微弱委命下吏今九姓叛亡北蕃喪亂君長無主迴紇殘破磧北諸姓已非國有欲犄角亡叛唯金山諸蕃共爲形勢有司乃以揚名擅破迴紇歸十姓之罪拒而遣還不使入朝恐非羈戎之長策也夫戎有鳥獸心親之則順疑之則亂今阻其善意則十姓內無國家親信之恩外有迴紇報讐之患懷不自安烏駭狼顧則河西諸蕃自此拒命矣且夷狄相攻中國之福今迴紇已破旣無可言十姓非罪又不當絕罪止揚名足以慰其酋領矣近詔同城權置安北府其地當磧南口制匈奴之衝常爲劇鎮臣頃聞磧北突厥之歸者已千餘帳來者未止甘州降戶四千帳亦置同城今磧北夷亂荒饑之餘無所存仰陛下開府招納誠覆全戎狄之仁也然同城本無儲峙而降附蕃落不免寒飢更相劫掠今安北有官牛羊六千粟麥萬斛城孤兵少降者日衆不加救卹盜劫日多夫人情以求生爲急今有粟麥牛羊爲之餌而不救其死安得不爲盜乎盜興則安北不全甘涼以往躋以待陷後爲邊患禍未可量是則誘使亂誨之盜也且夷狄代有雄傑與中國抗有如勃起招合遺散衆將係與此國家大機不可失也又謂河西諸州軍興以來公私儲蓄尤可嗟



痛涼州歲食六萬斛屯田所收不能償墾陛下欲制河西定亂戎此州空虛未可動也甘州所積四十萬斛觀其山川誠河西咽喉地北當九姓南逼吐蕃姦回不測伺我邊罅故甘州地廣粟多左右受敵但戶止三千勝兵者少屯田廣夷倉庾豐衍瓜肅以西皆仰其餽一旬不往士已枵飢是河西之命係于甘州矣且其四十餘屯水泉良沃不待天時歲取二十萬斛但人力寡乏未盡墾發異時吐蕃不敢東侵者繇甘涼土馬疆盛以抗其入今甘州積粟萬計兵少不足以制賊致吐蕃敢大入燔蓄穀蹂諸屯則河西諸州我何以守宜益屯兵外得以防盜內得以營農取數年之收可飽士百萬則天兵所臨何求不得哉其後吐蕃果入寇終后世爲邊患最甚后方謀開蜀山由雅州道翦生羌因以襲吐蕃子昂上書以七驗諫止之曰臣聞亂生必由於怨雅州羌未嘗一日爲盜今無罪蒙戮怨必甚怨甚則蜂駭且亡而邊邑連兵守備不解蜀之禍構矣東漢喪敗亂始諸羌一驗也吐蕃黠獯抗天誅者二十餘年前日薛仁貴郭待封以十萬衆敗大非川一甲不返李敬玄劉審禮舉十八萬衆困青海身執賊廷關隴爲空今迺欲建李處一爲上將驅疲兵襲不可幸之吐蕃舉爲賊笑二驗也夫事有求利而得害者昔蜀與中國不通秦以金牛美女啖蜀侯使五丁力士棧褒斜鑿通谷迎秦之饋秦隨以兵而地入中州三驗也吐蕃愛蜀富思盜之矣徒以障隧隘絕頓餓噉不得噬今撤山羌開阪險使賊得收奔亡以攻邊是除道待賊舉蜀以遺

之四驗也蜀爲西南一都會國之寶府又人富粟多浮江而下可濟中國今圖僥倖之利以事西羌得羌地不足耕得羌財不足富是過殺無辜之衆以傷陛下之仁五驗也蜀所恃有險也蜀所安無役也今開蜀險役蜀人險開則便寇人役則傷財臣恐未及見羌而姦盜在其中矣異時益州長史李崇真託言吐蕃寇松州天子爲盛軍師趣轉餉以備之不三年巴蜀大困不見一賊而崇真姦賊已鉅萬今得非有姦臣圖利復以生羌爲資六驗也蜀士疋屨不知兵一虜持矛百人不敵當若西戎不卽破滅臣見蜀之邊垂且不守而爲羌夷所暴七驗也國家近廢安北拔單于棄龜茲疏勒天下以爲務仁不務廣務養不務殺行太古三皇事今狗貪夫之議誅無罪之羌遺全蜀患此臣所未諭方山東飢關隴弊生人流亡誠陛下盜靜思和天人之時安可動甲兵興大役以自生亂又西軍失守北屯不利邊人駭情今復舉輿師投不測小人徒知議夷狄之利非帝王至德也善爲天下者計大而不計小務德而不務刑據安念危值利思害願陛下審計之后復召見使論爲政之要適時不便者毋援上古角空言子昂乃奏八科一措刑二官人三知賢四去疑五招諫六勸賞七息兵八安宗子其大權謂今百度已備但刑急罔密非爲政之要凡大人初制天下必有凶亂叛逆之人爲我驅除以明天誅凶叛已滅則順人情赦過宥罪蓋刑以禁亂亂靜而刑息不爲承平設也太平之人樂德而惡刑刑之所加人必慘怛故聖人貴措刑也比大赦濼蕩



羣罪天下蒙慶咸得自新近日詔獄稍滋鈎捕支黨株蔓推窮蓋獄吏不識天意以抵慘刻誠宜廣愷悌之道救法慎罰省白誣寃此太平安人之務也官人惟賢政所以治也然君子小人各尚其類若陛下好賢而不任任而不能信信而不能終終而不賞雖有賢人終不肯至又不肯勸反是則天下之賢集矣議者乃云賢不可知人不易識臣以爲固易知固易識夫尚德行者無凶險務公正者無邪朋廉者憎貪信者疾僞智不爲愚者謀勇不爲怯者死猶鸞隼不接翼薰蕕不共氣其理自然何者以德並凶勢不相入以正攻佞勢不相利以廉勸貪勢不相售以信質僞勢不相和智者尚謀愚者所不聽勇者徇死怯者所不從此趣向之反也賢人未嘗不思效用顧無其類則難進是以湮汨于時誠能信任俊良知左右有灼然賢行者賜之尊爵厚祿使以類相舉則天下之理得矣陛下知得賢須任今未能者蓋以常信任者不效如裴炎劉禕之周思茂卷味道固蒙用矣皆孤恩前死以是陛下疑於信賢臣固不然昔人有以噎得病乃欲絕食不知食絕而身殞賢人於國猶食在人人不可以一噎而止餐國不可以一謬一賢而遠正士此神鑒所知也聖人大德在能納諫太宗德參三王而能容魏徵之直今誠有敢諫骨鯁之臣陛下廣延順納以新盛德則萬世有述臣聞勞臣不賞不可勸功死士不賞不可勸勇今或勤勞死難名爵不及偷榮尸祿寵秩妄加非所以表庸勵行者也願表顯狗節勵勉百僚古之賞一人千萬人悅者蓋云當也今

事之最大者患兵甲歲興賦役不省與師十萬則百萬之家不得安業自有事北狄于今十年不聞中國之勝以庸將御穴兵徭役日廣兵甲日敝願審量損益計利害勢有不可毋虛出兵則人安矣虺賊千紀自取屠滅罪止魁逆無復緣坐宗室子弟皆得更生然臣願陛下重曉慰之使明知天子慈仁下得自安臣聞人情不能自明則疑疑則懼懼則罪生惟賜愷悌之德使居無過之地俄遷右衛曹參軍后既稱皇帝改號周子昂上周受命頌以媚悅后雖數召見問政事論亦詳切故奏聞輒罷以母喪去官服終擢右拾遺子昂多病居職不樂會武攸宜討契丹高置幕府表子昂參謀次漁陽前軍敗舉軍震恐攸宜輕易無將略子昂諫曰陛下發天下兵以屬大王安危成敗在此舉安可忽哉今大王法制不立如小兒戲願審智愚量勇怯度衆寡以長攻短此刷恥之道也夫按軍尚威嚴擇親信以虞不測大王提重兵精甲頓之境上朱亥竊發之變良可懼也王能聽愚計分麾下萬人爲前驅契丹小醜指日可禽攸宜以其儒者謝不納居數日復進計攸宜怒徙署軍曹子昂知不合不復言聖麻初以父老表解官歸侍詔以官供養會父喪廬冢次每哀慟聞者爲涕縣令段簡貪暴聞其富欲害子昂家人納錢二十萬緡簡薄其賂捕送獄中子昂之見捕自筮卦成驚曰天命不祐吾殆死乎果死獄中年四十三子昂資褊躁然輕財好施薦朋友與陸餘慶王無競房融崔泰之盧藏用趙元最厚唐興文章承徐庾餘風天下祖尚子昂始變雅



正初爲感遇詩三十八章王適曰是必爲海內文宗乃請交子昂所論著當世以爲法大厯中東川節度使李叔明爲立旌德碑於梓州而學堂至今猶存子光復與趙元子少微相善俱以文稱光終商州刺史子易甫簡甫皆位御史

王無競者字仲列世徙東萊宋太尉弘之遠裔家足于財頗負氣豪縱擢下筆成章科調樂城尉三遷監察御史改殿中會朝宰相宗楚客楊再思離立偶語無競揚笏曰朝禮尙敬公等大臣不宜慢常典楚客怒徙無競太子舍人神龍初詆權幸出爲蘇州司馬張易之等誅坐常交往貶廣州仇家矯制榜殺之趙元者字貞固河間人祖揆號通儒在隋與同郡劉焯俱召至京師補黎陽長徙居汲元少負志略好論辨來游雒陽士爭慕嚮所以造謝皆縉紳選武后方稱制懼不容其高調宜祿尉到職非公事不言彈琴時藥如隱者之操自傷位不配才卒年四十九其友魏元忠孟詵宋之問崔璩等共諡昭夷先生

贊曰子昂說武后興明堂太學其言甚高殊可怪笑后竊威柄誅大臣宗室脅逼長君而奪之權子昂乃以王者之術勉之卒爲婦人訕侮不用可謂薦圭璧於房闈以脂澤汗漫之也譬者不見泰山聾者不聞雷霆子昂之于言其聾聵歟

唐書卷一百七

唐書卷一百七考證

陳子昂傳會父喪廬冢次每哀慟聞者爲涕縣令段簡貪暴聞其富欲害子昂家人納錢二十萬緡簡薄其賂捕送獄中死○臣德潛按舊書子昂父在鄉爲縣令段簡所辱子昂聞之遽還鄉里因事收繫獄中憂憤而卒據舊書是子昂之歸父未死也且無廬冢事兩書情事不一



唐書卷一百七考證

唐書卷一百八

宋 端 明 殿 學 士 宋 祁 撰

列傳第三十三

劉裴裴

劉仁軌字正則汴州尉氏人少貧賤好學直亂不能安業每動止畫地書空寓所習卒以通博聞武德初河南道安撫大使任瓌上疏有所論奏仁軌見其橐為竄定數言瓌驚異赤牒補息州參軍轉陳倉尉部人折衝都尉嘗盜者豪縱犯法縣莫敢屈仁軌約不再犯而盜暴橫自如仁軌擄殺之州以聞太宗曰尉而殺吾折衝可乎召詣讓仁軌對曰盜辱臣臣故殺之帝以為剛正更擢咸陽丞貞觀十四年校獵同州時秋斂未訖仁軌諫曰今茲澍澤霑足百穀熾茂收纔十二常日餐調已有所妨又供獵事繕橋治道役雖簡省猶不損數萬少延一旬使場圃畢勞陛下六飛徐驅公私交泰璽書褒納拜新安令累遷給事中為李義府所惡出為青州刺史顯慶五年伐遼義府欲斥以罪使督漕而船果覆沒坐免官白衣隨軍初蘇定方既平百濟留郎將劉仁願守其城左衛中郎將王文度為熊津都督撫納殘黨文度死百濟故將福信及浮屠道琛迎故王子扶餘豐立之引兵圍仁願詔仁軌檢校帶方州刺史統文度之眾并發新羅



兵爲援仁軌將兵嚴整轉鬪陷陣所向無前信等釋仁願圍退保任存城旣而福信殺道琛并其衆招還  
叛亡勢張甚仁軌與仁願合則解甲休士時定方伐高麗圍平壤不克高宗詔仁軌拔軍就新羅與金法  
敏議去留計將士咸欲還仁軌曰春秋之義大夫出疆有可以安社稷便國家者得專之今天子欲滅高  
麗先誅百濟留兵鎮守制其心腹雖擊豎跳梁士力未完宜厲兵粟馬乘無備擊不意百下百全戰勝之  
日開張形勢騰檄濟師聲援接虜亡矣今平壤不勝熊津又拔則百濟之燼復炎高麗之滅無期吾等雖  
入新羅正似坐客有不如志悔可得邪扶餘豐猜貳表合內搆勢不支久宜堅守伺變以圖之不可輕動  
衆從其議乃請益兵時賊守真峴城仁軌夜督新羅兵薄城拔堞比明入之遂通新羅饋道而豐果襲殺  
福信遣使至高麗倭丐援會詔遣右威衛將軍孫仁師率軍浮海而至士氣振於是諸將議所向或曰加  
林城水陸之衝盍先擊之仁軌曰兵法避實擊虛加林險而固攻則傷士守則曠日周留城賊巢穴羣凶  
聚焉若克之諸城自下於是仁師仁願及法敏帥陸軍以進仁軌與杜爽扶餘隆繇熊津白江會之遇倭  
人白江口四戰皆克焚四百艘海水爲丹扶餘豐脫身走獲其寶劍僞王子扶餘忠勝忠志等率其衆與  
倭人降獨會帥遲受信據任存城未下始定方破百濟會領沙吒相如黑齒常之嘯亡散據險以應福信  
至是皆降仁軌以赤心示之俾取任存自効卽給鎧仗糧糈仁師曰夷狄野心難信若受甲濟粟資寇便

也仁軌曰吾觀相如常之忠而謀因機立功尙何疑二人訖拔其城遲受信委妻子奔高麗百濟餘黨悉  
平仁師等振旅還詔留仁軌統兵鎮守百齊再被亂殭屍如莽仁軌始命瘞埋弔祭焉葺復戶版署官吏  
開道墾營聚落復防堰賑貧乏勸課耕種爲立官社民皆安其所遂營屯田以經略高麗仁願至京師  
帝勞曰若本武將軍中奏請皆有文理何道而然對曰仁軌之辭非臣所能帝歎賞之超進仁軌六階眞  
拜帶方州刺史賜第一區厚賚妻子璽書褒勉先是貞觀永徽中士戰歿者皆詔使弔祭或以贈官推授  
子弟顯慶後討伐恩賞殆絕及破百濟平壤有功者皆不甄敘州縣購募不願行身壯家富者以財參逐  
率得避免所募皆儻劣寒憊無鬪志仁軌具論其弊請加慰賚以鼓士心又表用扶餘隆使綏定餘衆帝  
乃以隆爲熊津都督時劉仁願爲卑列道摠管詔率兵度海使代舊屯與仁軌俱還仁軌曰上巡狩方岳  
又經略高麗方農時而吏與兵悉被代新至者未習萬一蠻夷生變誰與捍之不如留舊兵畢獲等級遣  
還仁軌當留未可去仁願不可曰吾但知準詔耳仁軌曰不然苟利國家知無不爲臣之節也因陳便宜  
願留屯詔可由是以仁願爲不忠始仁軌任帶方州謂人曰天將富貴此翁邪乃請所願麻及宗廟諱或  
問其故答曰當削平遼海頒示本朝正朔卒皆如言及封太山仁軌乃率新羅百濟僭羅倭四國會長赴  
會天子大悅擢爲大司憲遷右相兼檢校太子左中護累功封樂城縣男總章元年爲熊津道安撫大使



兼涇江道總管副李勣討高麗平之以疾辭位進金紫光祿大夫聽致仕俄召爲隴州刺史拜太子左庶子同中書門下三品監脩國史咸亨五年爲雞林道大總管東伐新羅仁軌率兵絕瓠蘆河攻大鎮七重城破之進爵爲公子及兄子授上柱國者三人州黨變之號所居爲樂城鄉三柱里俄拜尚書左僕射兼太子賓客仍知政事吐蕃入寇命爲洮河道行軍鎮守大使永隆三年加太子少傅數乞骸骨聽解左僕射帝幸東都太子監國詔仁軌與裴炎薛元超留輔及太子赴東都又詔太孫重照留守仁軌副之武后臨朝復拜左僕射太孫廢仁軌專知留守事上疏辭疾因陳呂后祿產禍敗事以規后后遣武承嗣齎璽書慰勉改文昌左相同鳳閣鸞臺三品卒年八十五詔百官赴哭冊贈開府儀同三司并州大都督陪葬乾陵賜其家實封三百戶仁軌雖貴顯不自矜踞接舊故如布衣時嘗爲御史袁異式所劾慢辱之奪使引決及拜大司憲異式尚在臺不自安因醉以情自解仁軌持觴曰所不與公者有如此觴後旣執政薦爲司元大夫然官由州縣至宰輔善致聲譽得吏下歡心及鎮洮河奏請機急多爲中書令李敬玄抑卻仁軌乃表敬玄爲帥以代己果覆其衆裴炎下獄仁軌方留守京師郎將姜嗣宗以使來因語炎事且曰炎異於常久矣仁軌曰使人知邪曰知及還表嗣宗知炎反狀不告武后怒拉殺之子濬官太子舍人垂拱中爲酷吏所殺中宗卽位以仁軌有東宮舊再贈司空濬子晃開元中爲給事中表請立碑追諡曰文

獻

裴行儉字守約絳州聞喜人父仁基隋光祿大夫自王世充所謀歸國被害贈原州都督諡曰忠行儉幼引蔭補弘文生貞觀中舉明經調左屯衛倉曹參軍時蘇定方爲大將軍謂曰吾用兵世無可教者今子也賢乃盡畀以術遷長安令高宗將立武昭儀行儉以爲國家憂從此始與長孫無忌褚遂良祕議大理袁公瑜適語昭儀母左除西州都督府長史麟德二年擢累安西都護西域諸國多慕義歸附召爲司文少卿遷吏部侍郎與李敬玄馬載同典選有能名時號裴馬行儉始設長名榜銓注等法又定州縣升降資擬高下爲故事上元三年吐蕃叛出爲洮州道左二軍總管改秦州右軍並受周王節度儀鳳二年十姓可汗阿史那都支及李遮旬誘蕃落以動安西與吐蕃連和朝廷欲討之行儉議曰吐蕃叛渙方熾敬玄失律審禮喪元安可更爲西方生事今波斯王死其子泥涅師質京師有如遣使立之卽路出一蕃若權以制事可不勞而功也帝因詔行儉冊送波斯王且爲安撫大食使徑莫賀延磧風磔晝冥導者迷將士饑乏行儉止營致祭令曰水泉非遠衆少安俄而雲徹風恬行數百水草豐美後來者莫識其處衆皆驚以方漢貳師將軍至西州諸蕃郊迎行儉召豪傑千餘人自隨揚言大熱未可以進宜駐軍須秋都支覘知之不設備行儉徐召四鎮酋長僞約收謂曰吾念此樂未始忘孰能從吾獵者於是子弟願從者



萬人乃陰勒部伍數日倍道而進去都支帳十餘里先遣其所親問安否外若閑暇非計襲者又使人趣召都支都支本與遮旬計及秋拒使者已而聞軍至倉卒不知所出率子弟五百餘人詣營謁遂禽之是日傳契箭召諸部酋長悉來請命並執送碎葉城簡精騎約齋襲遮旬道獲遮旬使者釋之俾前往諭其主并言都支已禽狀遮旬乃降悉俘至京師將吏爲刻石碎葉城以紀功帝遣勞宴曰行儉提孤軍深入萬里兵不血刃而叛黨禽夷可謂文武兼備矣其兼授二職卽拜禮部尙書兼檢校右衛大將軍調露元年突厥阿史德温傅反單于管二十四州叛應之衆數十萬都護蕭嗣業討賊不克死敗係踵詔行儉爲定襄道行軍大總管計之率太僕少卿李思文營州都督周道務部兵十八萬合西軍程務挺東軍李文暕等總三十餘萬旗幟亘千里行儉咸節制之先是嗣業饋糧數爲虜鈔軍餒死行儉曰以謀制敵可也因詐爲糧車三百乘車伏壯士五輩齎陌刀勁弩以羸兵挽進又伏精兵踵其後虜果掠車羸兵走險賊驅就水草解鞍牧馬方取糧車中而壯士突出伏兵至殺獲幾盡自是糧車無敢近者大軍次單于北暮已立營塹壕既周行儉更命徙營高岡吏白土安堵不可擾不聽促徙之比夜風雨暴至前占營所水深丈餘衆莫不駭嘆問何以知之行儉曰自今第如我節制毋問我所以知也賊拒黑山數戰皆敗行儉縱兵前後殺虜不勝計僞可汗泥熟旬爲其下所殺持首來降又禽大首領奉職而還餘黨走狼山行儉既

一二號第九十四批

還阿史那伏念僞稱可汗復與温傅合明年行儉遣總諸軍頓代州之陘口縱反問說伏念令與温傅相貳伏念懼密送款且請縛傅自效行儉祕不布密以聞後數日煙塵漲天而南斥候惶駭行儉曰此伏念執温傳來降非他也且受降如受敵乃敕嚴備遣軍使往勞旣而果然於是突厥餘黨悉平帝悅遣戶部尙書崔知悌勞軍初行儉許伏念以不死侍中裴炎害其功建言伏念爲程務挺張虔最脅逐又磧北回紇逼之計窮而降卒斬伏念及温傅於都市行儉之功不錄封聞喜縣公行儉嘆曰渾濬之事古今恥之但恐殺降則後無復來矣遂稱疾不出永淳元年十姓突厥車薄叛復爲今牙道大總管未行卒年六十四贈幽州都督諡曰獻詔皇太子遣官護視家事子孫能自立乃停中宗卽位再贈揚州大都督行儉工草隸名家帝嘗以絹素詔寫文選覽之祕愛其法資物良厚行儉每曰褚遂良非精筆佳墨未嘗輒書不擇筆墨而妍捷者余與虞世南耳所撰選譜草字雜體數萬言又爲營陣部伍料勝負別器能等四十六訣武后詔武承嗣就第取去不復傳行儉通陰陽麻術每戰豫道勝日善知人在吏部時見蘇味道王勳謂曰二君後皆掌銓衡李敬玄盛稱王勃楊炯盧照鄰駱賓王之才引示行儉行儉曰士之致遠先器識後文藝如勃等雖有才而浮躁術露豈享爵祿者哉炯頗沈嘿可至令長餘皆不得其死所引備裨若程務挺張虔最崔智晉王方翼党金毗劉敬同郭待封李多祚黑齒常之類爲世名將儉奏至刺史將軍者



數十人嘗賜馬及珍鞍令史私馳馬馬蹶鞍壞懼而逃行儉招還之不加罪初平都支遮節獲環寶不貴  
蕃酋將士願觀焉行儉因宴徧出示坐者有碼碯盤廣二尺文彩粲然軍吏趨跌碎惶怖叩頭流血行  
儉笑曰爾非故也何至是色不少吝帝賜都支資產皿金三千餘物橐駝馬牛稱是行儉分給親故洎磨  
下數日輒盡子光廷

光廷字連城早孤母犀狄氏有婦德武后召入宮爲御正甚見親寵光廷由是累遷太常丞以武三思增  
坐貶鄧州司馬開元中擢兵部郎中鴻臚少卿性靜默寡交游雖驟歷臺省人未之許旣而以職業稱議  
者更推之玄宗有事岱宗中書令張說以天子東巡京師空虛恐夷狄乘間竊發議欲加兵守邊召光廷  
與謀對曰封禪者所以告成功也夫成功者德無不被人無不安萬國無不懷今將告成而懼夷狄非昭  
德也大興力役用備不虞非安人也方謀會同而阻戎心非懷遠也此三者名實乖矣且諸蕃突厥爲大  
費幣往來願修和好有年矣若遣一使召其大臣使赴行在必欣然應命突厥受詔則諸蕃君長必相率  
而來我偃旗息鼓不復事矣說曰善吾所不及因奏用其策突厥果遣使來朝東封還遷兵部侍郎久之  
拜中書侍郎同中書門下平章事兼御史大夫遷黃門侍郎拜侍中兼吏部尚書弘文館學士撰搖山往  
則維城前軌二篇獻之手制褒美詔皇太子諸王於光順門見光廷謝所以規諷意光廷又引壽安丞李

融拾遺張琪著作佐郎司馬利賓直弘文館撰續春秋經傳自戰國訖隋表請天子脩經光廷等作傳書  
久不就時有建言唐應爲金德者中書令蕭嵩請百官普議光廷以唐符命表著天下久矣不可改亟奏  
罷之二十年封正平縣男初知星者言上象變不利大臣請禳之光廷曰使禍可禳而去則福可祝而來  
也論者以爲知命卒年五十八贈太師初吏部求人不以資考爲限所獎拔惟其才往往得俊又任之士  
亦自奮其後士人猥衆專務趨競銓品枉撓光廷懲之因行儉長名榜乃爲循資格無賢不肖一據資考  
配擬又促選限盡正月任門下省主事閻麟之專主過官凡麟之裁定光廷輒然可時語曰麟之口光廷  
手素與蕭嵩輕重不平及卒嵩奏一切罷之光廷所引盡斥外官博士孫琬以其用循資格非獎勸之誼  
諡曰克平時以爲希嵩意帝聞特賜諡曰忠憲詔中書令張九齡文其碑

子稹以蔭仕累遷起居郎開元末壽王瑁以母寵欲立爲太子稹陳甲生戾圖禍以諫玄宗改容謝之詔  
授給事中稹曰陛下絕招諫之路爲日滋久今臣一言而荷殊寵則言者將衆何以錫之帝善其讓止不  
拜俄授祠部員外郎卒

子簡字容卿歷信州刺史勸民墾田二萬畝以治行賜金紫服代第五琦爲度支郎中卒諡曰節子均  
均字君齊以明經爲諸暨尉數從使府辟經經以才顯張建封鎮濠壽表團練判官時李希烈以淮蔡叛



建封并賊均參贊之以勞加上柱國襲正平縣男遷累膳部郎中擢荆南節度行軍司馬就拜荆南節度使劉闢叛先驢黔巫脅荆楚以固首尾均發精甲三千逆擊之賊望風奔却加檢校吏部尚書初均與崔太素俱事中人竇文場太素嘗晨省文場入臥內自謂待己至厚徐觀後榻有頓伸者乃均也德宗以均任方鎮欲遂相之諫官李約上疏斥均爲文場養子不可汙台輔乃止元和三年入爲尚書右僕射判度支旨唱授按送印皆尚書郎爲之文武四品五品郎官御史拜廷下兼史中丞左右丞升階答拜時以爲禮太重俄檢校左僕射同中書門下平章事爲山南東道節度使累封郇國公以財交權倖任將相凡十餘年荒縱無法度卒年六十二贈司空

婁師德字宗仁鄭州原武人第進士調江都尉揚州長史盧承業異之曰子台輔器也當以子孫相讓詎論僚吏哉上元初爲監察御史會吐蕃盜邊劉審禮戰歿師德奉使收敗亡於洮河因使吐蕃其首領論贊婆等自赤嶺操牛酒迎勞師德喻國威信開陳利害虜爲畏悅後募猛士討吐蕃乃自奮戴紅抹額來應詔高宗假朝散大夫使從軍有功遷殿中侍御史兼河源軍司馬并知營田事與虜戰白水澗八遇八克天授初爲左金吾將軍檢校豐州都督衣皮袴率士屯田積穀數百萬兵以饒給無轉饟和糴之費武后降書勞之長壽元年召授夏官侍郎判尚書事進同鳳閣鸞臺平章事后嘗謂師德師在邊必待營田

公不可以劬勞憚也乃復以爲河源積石懷遠軍及河蘭鄯廓州檢校營田大使入遷秋官尚書原武縣男改左肅政御史大夫並知政事證聖中與王孝傑拒吐蕃於洮州戰素羅汗山敗績貶原州員外司馬萬歲通天二年入爲鳳閣侍郎同鳳閣鸞臺平章事後與武懿宗狄仁傑分道撫定河北進納言更封諱縣子隴右諸軍大使復領營田聖曆三年突厥入寇詔檢校并州長史天兵軍大總管九月卒于會州年七十贈幽州都督諡曰貞葬給往還儀仗師德長八尺方口博唇深沈有度量人有忤己輒遜以自免不見容色嘗與李昭德偕行師德素豐碩不能遽步昭德遲之恚曰爲田舍子所留師德笑曰吾不田舍復在何人其弟守代州辭之官教之耐事弟曰人有唾面滅之乃已師德曰未也滅之是違其怒正使自乾耳在夏官注選選者就按閱簿師德曰容我擇之可乎選者不去乃灑筆曰墨汗爾狄仁傑未輔政師德薦之及同列數擠令外使武后覺問仁傑曰師德賢乎對曰爲將謹守賢則不知也又問知人乎對曰臣嘗同僚未聞其知人也后曰朕用卿師德薦也誠知人矣出其奏仁傑慙已而歎曰婁公盛德我爲所容乃不知吾不逮遠矣總邊要爲將相者三十年恭勤樸忠無適莫方酷吏殘驚人多不免獨能以功名始終與郝處俊相亞世之言長者稱婁郝

贊曰仁軌等以兵開定四夷其勇無前至奉上則瞿瞿若不及行儉臨下以恕師德寬厚其能以功名始



終者蓋近乎勇于敢則殺勇于不敢則活者邪

唐書卷一百八

唐書卷一百八考證

劉仁軌傳卒年八十五○舊書作八十四

濟子晃開元中爲給事中○舊書開元中爲秘書省少監

裴行儉傳贈幽州都督諡曰獻○宰相世系表作憲



唐書卷一百八考證

唐書卷一百九

宋 端 明 殿 學 士 宋 祁 撰

列傳第三十四

崔楊竇宗紀郭王

崔義玄貝州武城人隋大業亂往見李密密不用河內賊黃君漢為密守栢崖義玄見羣鼠度河稍刃有華文曰此王敦亡兆也因說君漢以城歸乃拜君漢懷州刺史行軍總管以義玄為司馬王世充將高毗寇河內義玄擊走之多下屯堡君漢以所掠子女金帛分之拒不受以功封清巨縣公太宗討世充數用其謀東都平轉隰州都督府長史貞觀初歷左司郎中兼韓王府長史與王友孟神慶志趣不同而俱以介直任永徽中累遷婺州刺史時睦州女子陳碩真舉兵反始碩真自言仙去與鄉鄰辭訣或告其詐已而捕得詔釋不問於是姻家章叔盾妄言碩真自天還化為男子能役使鬼物轉相熒惑用是能幻眾自稱文佳皇帝以叔盾為僕射破睦州攻歙殘之分遣其黨圍婺州義玄發兵拒之其徒爭言碩真有神靈犯其兵輒滅宗眾兇懼不肯用司功參軍崔玄籍曰仗順起兵猶無成此乃妖人勢不持久義玄乃署玄籍先鋒而自統眾繼之至下淮戍禽其謀數十人有星墜賊營義玄曰賊必亡請朝奮擊左右有以盾鄣



者義玄曰刺史而有避邪誰肯死救去之由是衆爲用斬首數百級降其衆萬餘賊平拜御史大夫義玄有章句學先儒疑謬或音故不通者輒采諸家條分節解能是正之高宗詔與博士討論五經義武氏爲皇后義玄贊帝決又以后旨按長孫无忌等誅之終蒲州刺史年七十一贈幽州都督諡曰貞后持政贈揚州大都督賜其家實封后二百子神基襲爵

神基長壽中爲司賓卿同鳳閣鸞臺平章事爲酷吏所構流嶺南中宗初稍用爲大理卿弟神慶舉明經武后時累遷萊州刺史入朝待制億歲殿奏事稱旨后以厯官有佳政且其父於己有功擢拜并州長史謂曰并州朕鄉里宿兵多前長史皆尙書爲之今授卿宜知所以委重者乃親爲按行圖謀日而遣神慶始至有詔改錢幣法州縣布下俄而物價踊昂百賈驚擾神慶質其非于朝果豪猾妄爲之后喜下制褒美初州隔汾爲東西二城神慶跨水聯堞合而一之省防禦兵歲數于神基既下獄馳赴都告變得召見后出具獄示之神慶爲申理得減死然用是貶歙州司馬長安中累轉禮部侍郎數上疏陳時政轉太子右庶子封魏縣子是時突厥使者入見皇太子應朝有司移文東宮召太子神慶諫曰五品以上佩龜者蓋防微召之詐內出龜以合之況太子乎古者召太子用玉契此誠重慎防萌之意不可不察凡慮事於未萌之前故長無悔吝之咎今太子與陛下異宮非朝朔望而別喚者請降墨敕玉契詔可尋詔與詹事

祝欽明更日侍讀東宮厯司刑卿劾張昌宗獄頗闊略不盡神龍初昌宗伏誅坐流欽州卒五王得罪緣

昌宗被流者皆詔原雪贈神慶幽州都督

神慶子琳明政事開元中與高仲舒同爲中書舍人侍中宋璟親禮之每所訪逮嘗曰古事問仲舒今事問琳尙何疑累遷太子少保天寶二年卒祕書監潘肅聞之泫然曰古遺愛也琳長子儼諫議大夫其羣從數十人自興寧里謁大明宮冠蓋駟哄相望每歲時宴于家以一榻置笏猶重積其上琳與弟太子詹事珪光祿卿瑤俱列棨戟世號三戟崔家開元天寶間中外宗屬無繼麻喪初玄宗每命相皆先書其名一日書琳等名覆以金甌會太子入帝謂曰此宰相名若自意之誰乎卽中且賜酒太子曰非崔琳慮從愿乎帝曰然賜太子酒時兩人有宰相望帝欲相之數矣以族大恐附離者衆卒不用

楊再思鄭州原武人第明經爲人佞而智初調玄武尉使至京師舍逆旅有盜竊其衣囊再思遇之盜窘謝再思曰而苦貧故至此囊中檄無所事幸留它物可持去初不爲人言但假貸以還累遷天官員外郎厯左肅政御史中丞延載初擢鸞臺侍郎同鳳閣鸞臺平章事加兼左肅政御史大夫封鄭縣侯遷內史居宰相十餘年阿匱取容無所薦達人主所不喜毀之所善譽之畏慎足恭未嘗忤物或曰公位尊何自屈折答曰世路孔艱直者先禍不爾豈全吾軀於時水滸閉坊門以讓再思入朝有車陷于濫叱牛不前



憲曰癡宰相不能和陰陽而閉坊門遣我艱于行再思遣吏謂曰汝牛自弱不得獨責宰相張昌宗坐事  
司刑少卿桓彥範劾免其官昌宗訴諸朝武后意申釋之問宰相昌宗於國有功乎再思曰昌宗爲陛下  
治丹餌而愈此爲有功后悅昌宗還官自是天下貴彥範賤再思左補闕戴令言賦兩脚狐以譏之再思  
怒謫令言爲長社令士愈蚩謔易之兄司禮少卿同休請公卿宴其寺酒酣戲曰公面似高麗再思欣然  
翦縠綴巾上反披紫袍爲高麗舞舉動合節滿坐鄙笑昌宗以姿貌倖再思每日人言六郎似蓮化非也  
正謂蓮華似六郎耳其巧諛無恥類如此俄檢校右庶子中宗立拜戶部尚書同中書門下三品京師留  
守封弘農郡公加兼揚州長史檢校中書令改侍中鄭國公賜實封戶三百爲順天皇后奉冊使武三思  
誣陷王同皎再思與李嶠韋巨源按獄希意抵同皎死衆以爲寃復拜中書令監修國史遷尚書右僕射  
仍同三品卒贈特進并州大都督陪葬乾陵諡曰恭

弟季昭中茂才第爲殿中侍御史武后誅駙馬都尉薛紹紹兄顓爲齊州刺史命季昭按之不得反狀后  
怒放于沙州赦還爲懷州司馬

竇懷貞字從一左相德玄子少詭激衣服贏儉不爲輿馬豪侈事仕累清河令有治狀後遷越州都督揚  
州長史神龍中進左御史大夫兼檢校雍州長史會歲除中宗夜宴近臣謂曰聞卿喪妻今欲繼室可乎

懷貞唯唯俄而禁中寶扇郭衛有衣翟衣出者已乃韋后乳媪王所謂莒國夫人者故蠻婢也懷貞納之  
不辭又避后先諱而以字稱世謂媪媾爲阿翁懷貞每謁見奏請輒自署皇后阿翁而人或謂爲國翁軒  
然不慙以自媚於后時政令多門赤尉由墨制授御史者衆或戲曰尉入臺多而縣辦否對曰辦於異日  
問其故答曰佳吏在僥倖去故辦聞者皆笑又附宗楚客安樂公主等以取貴位爲素議所斥名稱盡矣  
韋后敗斬妻獻其首貶濠州司馬再徙益州長史乃復故名景雲初以殿中監召閏月遷左御史大夫同  
中書門下平章事封中山縣公再遷侍中方太平公主干政懷貞傾已附離日視事退輒詣主第刺取所  
欲容宗爲金仙玉真二公主營觀費鉅萬諫者交疏不止唯懷貞勸成之躬護役作族弟維鑿諫曰公位  
上褒當思獻可替否輔天子而計校瓦木雜廁工匠間使海內何所瞻仰乎不答督繕益急時語曰前作  
后國翁後爲主邑丞言事公主如邑官屬也在位半歲無所事帝引見承天門切責之俄與李日知郭元  
振張說皆罷爲左御史大夫于時歲犯左執法術家又言懷貞且有禍大懼表請爲安國寺奴不許踰年  
復同中書門下三品兼太子詹事監修國史又以尚書右僕射兼御史大夫軍國重事宜共平章玄宗受  
內禪進左僕射封魏國公與太平公主謀逆既敗投水死追戮其尸改姓毒氏然生平所得俸祿悉散親  
族無留畜敗時家惟粗米數石而已性諂詐善諧結權貴宦者用事尤所畏奉或見無須者誤爲之禮監



察御史魏傳弓嫉中人輔信義欲劾奏其姦懷貞曰是安樂所信任者奈何繩以傳弓曰王綱壞矣正坐此屬今日殺之明日誅無所悔懷貞猶固止之傳弓者鉅鹿人忠饒士也終司農丞懷貞從子毓字思慎舉明經爲英王府參軍尙乘直長調鄆令修郵舍道路設冠婚喪紀法百姓德之

宗楚客字叔敖其先南陽人曾祖丕後梁南弘農太守梁亡入隋居河東之汾陰故爲蒲州人父崑仕魏王泰府與謝偃等撰括地志楚客武后從姊子長六尺八寸明皙美須髯及進士第累遷戶部侍郎兄秦客垂拱中勸武后革命進爲內史而弟晉卿典羽林兵後兄弟並坐姦賊流嶺外歲餘秦客死而楚客等還俄檢校夏官侍郎同鳳閣鸞臺平章事與武懿宗不協會賜將作材營第僭侈過度爲懿宗所劾自文昌左丞貶播州司馬晉卿流峯州稍爲豫州長史遷少府少監岐陝二州刺史久之復以夏官侍郎同鳳閣鸞臺平章事坐聘邵王妃貶原州都督神龍初爲太僕卿郢國公武三思引爲兵部尙書以晉卿爲將作大匠節愍太子敗逃于鄆被殺殊其首祭三思等柩楚客請之也俄同中書門下三品韋后安樂公主親賴之與紀處訥爲黨世號宗紀景龍二年詔突厥娑葛爲金河郡王而其部闕啜忠節賂楚客等罷之娑葛怨將兵患邊監察御史崔琬廷奏楚客處訥專威福有無君心納境外交爲國取怨晉卿專徇賊私驕恣跋扈並請收付獄三司推鞠故事大臣爲御史對仗彈劾必趨出立朝堂待罪楚客乃厲色大言性

忠鯁爲琬誣詆中宗不能窮也詔琬與楚客處訥約兄弟兩解之故世謂帝爲和事天子尋遷中書令韋氏敗與晉卿同誅楚客性明達武后時降突厥背實力吐敦者部落在平夏會邊書至言吐敦反楚客爲兵部員外郎后召周方略對曰吐敦者臣昔與之言其爲人忠義和厚且國家與有恩必不反其兄之子默子者狡悍與吐敦不和今言叛疑默子爲之然無能爲俄而夏州表默子劫部落北奔爲州兵及吐敦所禽後張仁亶請築三城議者或不同獨楚客言萬世利也然冒于權利嘗諷右補闕趙延禧陳符命以媚帝曰唐有天下當百世繼周陛下承母禪周唐一統其符兆有八天皇再以陛下爲周王是在唐興周則天立陛下爲皇太子是在周興唐一也天后立文王廟二也唐同泰洛水圖云永昌帝業三也讖曰百代不移宗四也孔子曰百世繼周五也桑條韋歌應二聖在位九十八年而子孫相承九十八世六也乃二月慶雲五色天應以和七也去六月九日內出瑞菽八也起則天爲一世聖朝爲二世後子孫相承九十八其數正滿百世唐之祿乃三千餘年帝大喜擢延禧諫議大夫識者以楚客等欺神誣君且有咎又嘗密語其黨曰始吾在卑位尤愛宰相及居之又思天子南面一日足矣雖外附韋氏而內畜逆謀故卒以敗晉卿姦貌雄偉聲如鐘雖不學然性倜儻垂拱後武后任之宮苑閑廡內外衆作無不總開中嶽造明堂鑄九鼎有力焉



紀處訥者秦州上邽人爲人魁岸髯長數尺其妻武三思婦之姊縱使通三思繇是款昵進爲太府卿神龍元年夏大旱穀價騰踊中宗召問所以救人者三思知之陰諷太史迦葉志忠奏是夜攝提入太微近帝坐此天子與大臣接有納忠之符帝信之下詔褒美賜處訥衣一副綵六十段與楚客並同三品進侍中後伏誅

祝欽明字文思京兆始平人父緝字叔良少通經頗著書質諸家疑異門人張後胤旣顯官薦于朝詔對策高第終無極尉欽明擢明經爲東臺典儀永淳天授間又中英才傑出業輿六經等科拜著作郎爲太子率更令中宗在東宮欽明兼侍讀授太子經兼弘文館學士中宗復位擢國子祭酒同中書門下三品進禮部尙書封魯國公食實封戶三百桓彥範崔玄暉袁恕己敬暉等皆從受周官大義朝廷尊之以置親忌日爲御史中丞蕭至忠所劾貶申州刺史入爲國子祭酒景龍三年天子將郊欽明與國子司業郭山惲陰迎韋后意謬立議曰周官天神曰祀地祇曰祭宗廟曰享大宗伯曰祀大神祭大祇享大鬼王有故不預則攝而薦追師掌后首服以待祭祀內司服掌后六服祭祀則供又九嬪凡大祭祀后裸獻則贊瑤爵然則后當助天子祀天神祭地祇鄭玄稱闕狄后助王祭羣小祀服小祀尙助況天地哉闕狄之上禱禴狄三服皆以助祭知禕衣助天祀也王之祭服一曰先王衮冕先公鷩冕故后助祭亦以禕衣祭先

王禴狄祭先公不言助祭天地舉此以明彼反三隅也春秋外傳禘郊天子親射其牛王后親舂其粢世婦詔后之禮事不專主宗廟祭統曰祭也者必夫婦親之所以備內外之官哀公問孔子曰冕而親迎不已重乎答曰合二姓之好以繼先聖之後以爲天地宗廟社稷主君何謂已重焉則知后宜助祭臣請因經誼制儀典帝雖不容猶疑之召禮官質問於是太常博士唐紹蔣欽緒對欽明所引皆宗廟禮非祭天地者周隋而上無皇后助祭事帝令宰相參訂紹欽緒又引博士彭景直共議曰周官所云祀祭享皆互言典瑞兩圭以祀地司几筵設祀先王昨席內宗掌宗廟祭祀傳曰聖人爲能饗帝春秋祭祀以時思之此祀天稱享享廟稱祭也禮家凡稱大祭祀不獨主天爵人大祭祀與量人受舉舉之卒爵祭天不裸則九嬪贊瑤爵容廟稱大祭祀也欽明据大宗伯之職以謂后有祭天地之禮按經凡祀大神祭大祇享大鬼帥執事而卜宿視滌濯澍玉鬯省牲鑊奉玉盥制大號若王不與祭祀則攝位自凡而推兼言王祭天地宗廟也下言凡大祭祀王后不與則攝而薦直王后祭廟一凡耳若當助祭天地應不列重凡且內宗外宗所掌皆佐王后廟薦無佐祭天地語有如助祭天地誰當贊佐者是則攝薦爲宗廟明甚內司服掌后祭服無祭天服禮家說曰后不助祭天地五岳故無其服又言后有五輅以重翟從祭先王先公以厭翟從饗諸侯以安車朝夕見王以翟車采桑以輦車游宴按此无祭天車明甚然后助王祭天地古無



聞焉時左僕射韋巨源助后捨聖帝奪政事即傳欽明議帝果用其言以皇后爲亞獻取大臣李嶠等女爲齋娘奉豆籩禮成詔齋娘有夫者悉進官初后屬婚上食禁中帝與羣臣宴欽明自言能八風舞帝許之欽明體肥醜據地搖頭睨目左右顧眄帝大笑吏部侍郎盧藏用嘆曰是舉五經掃地矣景雲初侍御史倪若水劾奏欽明山憚等腐儒無行以諂佞亂常改作百王所傳一朝墮放今聖德中興不宜使小人在朝請斥遠之以肅具臣乃貶欽明饒州刺史山憚括州刺史欽明於五經爲該淹自見坐不孝免無以澡被乃阿附韋氏圖再用又坐是見逐諸儒共羞之後徙洪州都督入爲崇文館學士卒

贊曰欽明以經授中宗爲朝大儒乃跪聖僻說引豔妻郊見上帝腥德播聞享祚不終蓋與少正卯順非而澤莊周以詩書破冢者同科獨保腰領死家貧窶不幸邪後之託儒爲姦者可少戒云

山憚者河東人善治禮景龍中累遷國子司業帝昵宴近臣及脩文學士詔徧爲伎工部尙書張錫爲淡容娘舞將作大匠宗晉卿爲渾脫舞左衛將軍張洽爲黃塵舞給事中李行言歌駕車西河曲餘臣各有所陳皆鄙黷而山憚奏無所習惟知誦詩乃誦鹿鳴蟋蟀二篇未畢中書令李嶠以其近規諷止之帝嘉其直下詔褒答賜服一稱其後與欽明僻論阿世不能終其守久之復拜國子司業

王瓊者方慶六世孫少爲禮家學玄宗在位久推崇老子道好神仙事廣脩祠祭靡神不祈瓊上言請築

壇東郊祀青帝天子入其言擢太常博士侍御史爲祠祭使瓊專以祠解中帝意有所禳祓大抵類巫覡漢以來葬喪皆有瘞錢後世里俗稍以紙寓錢爲鬼事至是瓊乃用之肅宗立累遷太常卿又以祠禮見寵乾元三年拜蒲同絳等州節度使俄以中書侍郎同中書門下平章事時大兵後天下願治瓊望輕無它才不爲士議諧可既驟得政中外悵駭乃奏置太一壇勸帝身見九宮祠帝由是專意它議不能奪帝嘗不豫太卜建言祟在山川瓊遣女巫乘傳分禱天下名山大川巫皆盛服中人護領所至于託州縣賂遺狼藉時有一巫美而盡以惡少年數十自隨尤兇狡不法馳入黃州刺史左震晨至館請事門鑄不敢震怒破鑄入取巫斬廷下悉誅所從少年藉其贓得十餘萬因遣還中人旣以聞瓊不能請帝亦不加罪明年罷瓊爲刑部尙書又出爲淮南節度使猶兼祠祭使徙浙東召入再遷太子少師卒贈開府儀同三司諡曰簡懷始瓊託鬼神致位將相當時以左道進者紛紛出焉李國禎者以術士顯廣德初建言唐家仙系宜崇表福區招致神靈請度昭應南山作天華上宮露臺大地婆父祠并三皇道君太古天皇中古伏羲女媧等各爲堂皇給百戶掃除又卽義扶谷故湫祠龍置房宇有詔從之乃除地課工方歲饑人不堪命昭應令梁鎮上疏切諫以爲有七不可天地之神推之尊極者掃地可祭精意可享今廢先王之典爲人祈福福未至而人已困又違神虐人何從而致福邪宗廟月無三祭此不宜然婆父之鄙語不經見



若為地建祖廟上天必貽向背之責夫湫者龍所託耳今湫竭已久龍安所存不宜崇去龍之穴破生人之產若三皇五帝道君等兩京及所都各有宮廟春秋彝饗此復營造是謂瀆神夫休咎豐凶本於五事不在山川百神明矣即劾國禎等動眾則得人興工則獲利祭祀則受胙主執則市權營罔天聽負抱衆楮道路相望無時而息人神胥怨災孽並至臣昨受命有所安輯陛下許以權宜今所興造臣謹以便宜悉停帝從之鎮忼慨有名士也仕至司門郎中璵曾孫摶別傳

唐書卷一百九

唐書卷一百九考證

王璵傳方慶六世孫○沈炳震曰按方慶武后萬歲通天元年入相璵肅宗乾元元年入相相去六十二年耳且璵開元末已為博士則又止四十餘年不應為六世孫也而宰相世系表方慶生光輔光輔生

寵寵生仲連仲連生紹紹生璵抑何世次歷歷耶恐別是一王璵而作史者混牽為一也

乾元三年拜蒲同絳等州節度使俄以中書侍郎同中書門下平章事○臣德潛按璵之入相紀在元年

五月二年三月罷為刑部尚書七月出為蒲同絳等州節度使非自蒲州入相也傳中顯誤

璵曾孫摶別傳○沈炳震曰別傳者專立一傳查新舊二書摶皆附傳未嘗專立傳也



唐書卷一百九考證

唐書卷一百十

宋 端 明 殿 學 士 宋 祁 撰

列傳第三十五

諸夷蕃將

史大奈本西突厥特勒也與處羅可汗入隋事煬帝從伐遼積勞為金紫光祿大夫後分其部於樓煩高祖興太原大奈提其眾隸麾下桑顯和戰飲馬泉諸軍却大奈以勁騎數百背擊顯和破之軍遂振授光祿大夫從平長安以多賞帛五千匹賜姓史從秦王平薛舉王世充竇建德劉黑闥功殊等積前後賜侍女三雜綵萬段貞觀初擢累右武衛大將軍檢校豐州都督封寶國公食封戶三百卒贈輔國大將軍馮盎字明達高州良德人本北燕馮弘裔孫弘不能以國下魏亡奔高麗遺子業以三百人浮海歸晉弘已滅業留番禺至孫融事梁為羅州刺史子寶聘越大姓沈氏女為妻遂為首領授本郡太守至盎三世矣隋仁壽初盎為宋康令潮成等五州獠叛盎馳至京師請討之文帝詔左僕射楊素與論賊形勢素奇之曰不意蠻夷中乃生是人即詔盎發江嶺兵擊賊平之拜漢陽太守從煬帝伐遼東遷左武衛大將軍隋亡奔還嶺表嘯署酋領有眾五萬番禺新興名賊高法澄沈寶徹等受林士弘節度殺官吏盎率兵破



之寶徹兒子曰智臣復聚兵拒戰盜進討兵始合輒釋胄大呼曰若等識我耶眾委戈祖而拜賊遂潰禽寶徹智臣等遂有番禺蒼梧朱崖地自號總管或說盜曰隋季崩蕩海內震駭唐雖應運而風教未孚嶺越無所係屬公克平二十州地數千里名位未正請上南越王號盜曰吾居越五世矣牧伯惟我一姓子女玉帛吾有也人生富貴如我希矣常恐忝先業尙自王哉武德五年始以地降高祖析爲高羅春白崖儋林振八州授盜上柱國高州總管封越國公拜其子智戴爲春州刺史智或爲東合州刺史盜徙封耿貞觀初或告盜叛舉兵拒境太宗召右武衛將軍蘭藝發江淮甲卒將討之魏徵諫曰天下初定創痍未復大兵之餘疫癘方作且王者兵不宜爲蠻夷動勝之不武不勝爲辱且盜不及未定時略州縣搖遠夷今四海已平尙何事反未狀當懷之以德盜懼必自來帝乃遣散騎常侍韋叔諧喻盜盜遣智戴入侍帝曰徵一言賢於十萬衆時蕃兵已出欲遂有功遣副將上盜可擊狀帝不許罷之五年盜來朝宴賜甚厚俄而羅寶諸洞獠叛詔盜率衆二萬爲諸軍先鋒賊據險不可攻盜持弩語左右曰矢盡勝負可知矣發七矢斃七人賊退走盜縱兵乘之斬首千餘級帝詔智戴還慰省賞予不可計奴婢至萬人盜善爲治閩漳最擅姦伏得民懼心卒贈左驍衛大將軍荊州都督子三十人智戴知名勇而有謀能撫衆得士死力會帥皆樂屬之嘗隨父至洛陽統本部銳兵宿衛煬帝弑引其下

逃歸時盜賊多嶺嶠路絕智戴轉戰而前至高源俚帥爲謀主會盜至智戴得與盜俱去後入朝帝勞賜加等授衛尉少卿聞其善兵指雲問曰下有賊今可擊乎對曰雲狀如樹方辰在金金利木乘擊之勝帝奇其對累遷左武衛將軍卒贈洪州都督

盜族人子猷以豪俠聞貞觀中入朝載金一舸自隨高宗時遣御史許瓘視其貲瓘至洞子猷不出迎後率子弟數十人擊銅鼓蒙排執瓘而奏其罪帝馳遣御史楊璟驗訊璟至卑辭以結之委罪於瓘子猷喜遺金二百兩銀五百兩璟不受子猷曰君不取此且留不得歸璟受之還奏其狀帝命納焉

阿史那社尒突厥處羅可汗之次子年十一以智勇聞拜拓設建牙磧北與頡利子欲谷設分統鐵勒回紇僕骨同羅諸部處羅卒哀毀如禮治衆十年無課歛或勸厚賦以自奉答曰部落豐餘於我足矣故首領咸愛之頡利數用兵社尒諫弗納貞觀元年鐵勒回紇薛延陀等叛敗欲谷設於馬嶺山社尒助擊之弗勝明年將餘衆西保可汗浮圖城會頡利滅西突厥統葉護又死奚利必咄陸可汗與泥孰爭國社尒引兵襲之得其半國有衆十餘萬乃自號都布可汗謂諸部曰始爲亂破吾國者延陀也今我據西方而不平延陀是忘先可汗非孝也事脫不勝死無恨會長皆曰我新得西方須留撫定今直棄之遠擊延陀延陀未禽葉護子孫將復吾國社尒不從選騎五萬討延陀磧北連兵十旬士苦其久稍潰去延陀縱擊



大敗之乃走保高昌衆纔萬人又與西突厥不平由是率衆內屬十年入朝授左驍衛大將軍處其部于靈州詔尙衡陽長公主爲駙馬都尉典衛屯兵十四年以交河道行軍總管平高昌諸將咸受賞社尒以未奉詔秋毫不敢取見別詔然後受又所取皆老弱陳弊太宗美其廉賜高昌寶鈿刀雜綵千段詔檢校北門左屯營封畢國公從征遼東中流矢擢去復戰所部奮屬皆有功還擢兼鴻臚卿二十一年以崑丘道行軍大總管與契苾何力郭孝恪楊弘禮李海岸等五將軍發鐵勒十三部及突厥騎十萬討龜茲師次西突厥擊處密處真敗之入自焉耆西兵出不意龜茲震恐進屯磧石伊州刺史韓威以千騎先進右騎衛將軍曹繼叔次之至多褐城其王率衆五萬拒戰威陽邵王悉兵逐北威與繼叔合殊死戰大破之社尒因拔都城王輕騎遁社尒劉孝恪守自率精騎追躡行六百里王據大撥換城嬰險自固社尒攻凡四十日入之禽其王并下五大城遣左衛郎將權祗甫徇諸酋長示禍福降者七十餘城宣諭威信莫不歡服刻石紀功而還因說于闐王入朝王獻馬畜三百餉軍西突厥焉耆安國皆爭犒師孝恪之在軍牀帷器用多飾金玉以遺社尒社尒不受帝聞曰二將優劣不復問人矣帝崩請以身殉衛陵寢高宗不許遷右衛大將軍永徽六年卒贈輔國大將軍并州都督陪葬昭陵治家象慈山諡曰元子道真歷左屯衛大將軍咸亨初爲邏娑道副大總管與薛仁貴討吐蕃以授吐谷渾爲論欽陵所敗盡失其兵詔有司問

狀死爲民

阿史那忠者字義節蘇尼失子也資清謹以功擢左屯衛將軍尙宗室女定襄縣主始詔姓獨善史居父喪哀慕過人會立阿史那思摩爲突厥可汗以忠爲左賢王及出塞不樂見使者必泣請入侍許焉封薛國公擢右驍衛大將軍宿衛四十八年無纖隙人比之金日磾卒贈鎮軍大將軍諡曰貞節葬昭陵執失思力突厥酋長也貞觀中護送隋蕭后入朝授左領軍將軍會頡利敗太宗令思力諭降渾斛薩部落稍親近帝逐兔苑中思力諫曰陛下爲四海父母乃自輕臣竊殆之帝異其言後復逐鹿思力脫巾帶固諫帝爲止及討遼東詔思力屯金山道領突厥扞薛延陀延陀兵十萬寇河南思力示羸不與碣賊深入至夏州乃整陣擊敗之追躡六百里會毗伽可汗死耀兵磧北而歸復從江夏王道宗破延陀餘衆與平吐谷渾詔尙九江公主拜駙馬都尉封安國公坐交房遣愛高宗以其戰多赦不誅流嵩州主請削封邑偕往主前卒龍朔中以思力爲歸州刺史卒麟德元年復公主封邑贈思力勝州都督諡曰景契苾何力鐵勒哥論易勿施莫賀可汗之孫父莫隋末爲莫賀咄特勒以地近吐谷渾隘多厲隔徙去熱海上何力九歲而孤號大俟利發貞觀六年與母率衆千餘詣沙州內屬太宗處其部於甘涼二州擢何力左領軍將軍九年與李大亮薛萬徹萬均討吐谷渾於赦水川萬均率騎先進爲賊所包兄弟皆中



創墮馬步鬪士死七八何力馳壯騎冒圍奮擊虜披靡去是時吐谷渾王伏允在突淪川何力欲襲之萬均懲前敗以爲不可何力曰賊無城郭逐薦草美水以爲生不乘其不虞正恐鳥驚魚駭後無以窺其巢穴乃閱精騎千餘直擣其牙斬首數千級獲橐駝馬牛羊二十餘萬俘其妻子伏允挺身免有詔勞軍於大斗拔谷萬均恥名出其下乃排何力引功自名何力不勝憤挺刀起將殺之諸將勸止及還帝責謂其故何力具言萬均敗狀帝怒將解其官授何力何力頓首曰以臣而解萬均官恐四夷聞者謂陛下重夷輕漢則誣告益多又夷狄無知謂漢將皆然非示遠之義帝重其言乃止有詔宿衛北門檢校屯營事尙臨洮縣主十四年爲葱山道副大總管與討高昌平之始何力母姑臧夫人與弟沙門在涼州沙門爲賀蘭都督十六年詔何力往視母於是薛延陀毗伽可汗方強契苾諸酋爭附之乃脅其母弟使從何力驚謂其下曰上於爾有大恩且遇我厚何遽反皆曰可敦都督去矣尙何顧何力曰弟往侍足矣我義許國不可行衆執之至毗伽牙下何力箕踞拔佩刀東向呼曰有唐烈士受辱賊廷邪天地日月臨鑒吾志卽割左耳誓不屈毗伽怒欲殺之其妻諫而止何力被執也或譏之帝曰何力入延陀如涸魚得水其脫必遽帝曰不然若人心如鐵石殆不背我會使至言狀帝泣下卽詔兵部侍郎崔敦禮持節許延陀尙主因求何力乃得還授右驍衛大將軍公主行有日何力陳不可帝曰天子無戲言旣許之叵奈何何力曰

禮有親迎宜詔毗伽身到京師或詣靈武彼畏我必不來則姻不成而憂憤不知所出下必攜貳不及一年交相疑沮毗伽素狼戾必死死則二子爭國內判外攜不戰而禽矣帝然之毗伽果不敢迎鬱邑不得志恚而死少子拔酌殺其庶兄突利自立國中亂如其策云帝征高麗詔何力爲前軍總管次白崖城中賊稍創甚帝自爲傅藥城拔得刺何力者高突勃驪使自殺之辭曰彼爲其主冒白刃以刺臣此義士也犬馬猶報其養況於人乎卒捨之俄以崑丘道總管平龜茲帝崩欲以身殉高宗諭止永徽中西突厥阿史那賀魯以處月處蜜姑蘇歌邏祿卑失五姓叛寇延州陷金嶺略蒲類詔何力爲弓月道大總管率左武衛大將軍梁建方統秦成岐雍及燕然都護回紇兵八萬討之處月酋朱邪孤注遂殺招慰使果毅都尉單道惠據牢山以守何力等分兵數道攀巖而上急攻之賊大潰孤注夜遁輕騎窮躡行五百里孤注戰死虜渠帥六十俘斬萬餘牛馬雜畜七萬取處蜜時健俟斤合支賀等以歸遷左驍衛大將軍封鄜國公顯慶中爲沮江軍行軍大總管與蘇定方及右驍衛大將軍劉伯英伐高麗不克龍朔初復拜遼東道行軍大總管率諸蕃三十五軍進討帝欲自率師繼之次鴨綠水蓋蘇文遣男生以精兵數萬拒險衆莫敢濟會冰合何力引兵諫而濟賊驚遂潰追奔斬首三萬級餘衆降男生脫身走有詔班師時鐵勒九姓叛詔何力爲安撫大使何力以輕騎五百馳入其部虜大驚何力諭曰朝家知而誑誤遂及勦動使我



賈爾過得自新罪在凶渠取之則已九姓大喜共擒僞葉護及特勒等二百人以歸何力數其罪跡之餘衆遂安士卒道死者令所在收瘞蠲護其家未幾蓋蘇文死男生爲弟所逐使子詣闕請降乃拜何力爲遼東道行軍大總管安撫大使經略之副李勣同趨高麗勣已拔新城留何力守時高麗兵十五萬屯遼水引鞞數萬衆據南蘇城何力奮擊破之斬首萬級乘勝進拔八城引兵還與勣會合攻辱夷大行三城克之進拔扶餘勒兵未進何力率兵五十萬先趨平壤勣繼進攻凡七月拔之虜其王以獻進鎮軍大將軍行左衛大將軍徙封涼總章儀鳳間吐蕃滅吐谷渾勢益張入寇鄯廓河坊等州詔周王爲洮州道相王爲涼州道行軍元帥率何力等討之二王不行亦會何力卒贈輔國大將軍并州大都督陪葬昭陵諡曰毅始龍朔中司稼少卿梁脩仁新作大明宮植白楊于庭示何力曰此木易成不數年可庇何力不答但誦白楊多悲風蕭蕭愁殺人之句脩仁驚悟更植以桐

子明字若水孺祿授上柱國封漁陽縣公年十三遷奉輦大夫李敬玄征吐蕃明爲柏海道經略使以戰多進左威衛大將軍襲封賜錦袍寶帶它物蕃夥擢嫡子三品官再遷雞田道大總管至烏德鞬山誘附二萬帳武后時明妻及母臨洮縣主皆賜姓武以左鷹揚衛大將軍卒年四十六贈涼州刺史諡曰靖明性淹厚喜學長辯論子聳襲爵

黑齒常之百濟西部人長七尺餘驍毅有謀略爲百濟達率兼風達郡將猶唐刺史云蘇定方平百濟常之以所部降而定方囚老王繼兵大掠常之懼與左右酋長十餘人遁去嘯合連亡依任存山自固不旬日歸者三萬定方勒兵攻之不克常之遂復二百餘城龍朔中高宗遣使招諭乃詣劉仁軌降累遷左領軍員外將軍洋州刺史儀鳳三年從李敬玄劉審禮擊吐蕃審禮敗敬玄欲引還阻泥濘兵不得出賊屯高壓官軍常之夜率敢死士五百人掩其營殺掠數百人賊會跋地設棄軍走帝歎其才擢左武衛將軍檢校左羽林軍賜金帛殊等進爲河源軍副使調露中吐蕃使贊婆等入寇屯良非川李敬玄之敗常之引精騎三千夜襲其軍斬首二千級獲羊馬數萬贊婆等單騎去卽拜河源道經略大使因建言河源當賊衝宜增兵鎮守而運饗須廣乃斥地置烽七十所墾田五十頃歲收粟斛百餘萬由是食衍士精戍邏有備永隆二年贊婆營青海常之馳掩其屯破之悉燒糧糈獲羊馬甲首不貲詔書勞賜凡泄軍七年吐蕃膽畏不敢盜邊封燕國公垂拱中突厥復犯塞常之率兵追擊至兩井忽與賊遇賊騎三千方環甲常之見其衆以二百騎突之賊皆棄甲去其暮賊大至常之潛使人伐木列炬營中若烽燧然會風起賊疑救至遂夜遁久之爲燕然道大總管與李多祚王元言等擊突厥骨咄祿元珍於黃花堆破之追奔四千里賊潰歸磧北會左監門衛中郎將龔寶璧欲窮追要功詔與常之共計寶璧獨進爲虜所覆舉軍沒寶



壁下吏誅常之坐無功會周興等誣其與右鷹揚將軍趙懷節反捕繫詔獄投縲死常之御下有恩所乘馬爲士所鑿或請罪之答曰何遽以私馬鞭官兵乎前後賞賜分麾下無留貲及死人皆哀其枉

李謹行隸鞞人父突地稽部酋長也隋末率其屬千餘內附居營州授金紫光祿大夫遼西太守武德初奉朝貢以其部爲燕州授總管劉黑闥叛突地稽身到定州上書秦王請節度以戰功封耆國公徙部居昌平高開道以突厥兵攻幽州突地稽邀擊敗之貞觀初進右衛將軍賜氏李卒謹行偉容貌勇蓋軍中累遷營州都督家童至數千以貲自雄夷人畏之爲積石道經略大使論欽陵衆十萬寇遼中候邈不知士樵采半散謹行聞虜至卽植旗伐鼓開門以伺欽陵疑有伏不敢進上元三年破吐蕃于青海墜書勞勉封燕國公卒贈幽州都督陪葬乾陵

泉男生字元德高麗蓋蘇文子也九歲以父任爲先人遷中裏小兒猶唐謁者也又爲中裏大兄知國政凡辭令皆男生主之進中裏位鎮大兄久之爲莫離支兼三軍大將軍加大莫離支出按諸部而弟男建男產知國事或曰男生惡君等逼已將除之建產未之信又有謂男生將不納君男生遣謀往男建捕得卽矯高藏命召男生懼不敢入男建殺其子獻忠男生走保國內城率其衆與契丹隸鞞兵內附遣子獻誠訴諸朝高宗拜獻誠右武衛將軍賜乘輿馬瑞錦寶刀使還報詔契苾何力率兵援之男生乃免授平

壤道行軍大總管兼持節安撫大使舉哥勿南蘇倉巖等城以降帝又命西臺舍人李虔繹就軍慰勞賜

袍帶金釧七事明年召入朝詔所過州縣傳會作鼓吹右羽林將軍李同以飛騎仗廷寵遷遼東大都督玄懿郡公賜第京師因詔還軍與李勣攻平壤使浮屠信城內間引高麗銳兵潛入禽高藏詔遣子齋手制金皿卽遼水勞賜還進右衛大將軍卞國公賜寶器宮侍女二馬八十儀鳳二年詔安撫遼東并置州縣招流冗平斂賦罷力役民悅其寬卒年四十六帝爲舉哀贈并州大都督喪至都詔五品以上官哭之諡曰襄勒碑著功男生純厚有禮奏對敏辯善射藝其初至伏斧鑕待罪帝宥之世以此稱焉

獻誠天授中以右衛大將軍兼羽林衛武后嘗出金幣命宰相南北牙羣臣舉善射五輩中者以賜內史張光輔舉獻誠獻誠讓右玉鈐衛大將軍薛吐摩支摩支固辭獻誠曰陛下擇善射者然皆非華人臣恐唐官以射爲恥不如罷之后嘉納來俊臣嘗求貨獻誠不答乃誣其謀反縊殺之后後知其冤贈右羽林衛大將軍以禮改葬

李多祚其先隸鞞酋長號黃頭都督後入中國世系湮遠至多祚驍勇善射以軍功累遷右鷹揚大將軍討黑水靺鞨誘其渠長置酒高會因醉斬之擊破其衆室韋及孫萬榮之叛多祚與諸將進討以勞改右羽林大將軍遂領北門衛兵張柬之將誅二張以多祚素感繫可動以義乃從容謂曰將軍居北門幾何



曰三十年矣將軍擊鍾鼎食貴重當世非大帝恩乎多祚泣數行下曰死且不忘東之曰將軍知感恩則知所以報今在東宮乃大帝子而嬖豎擅朝危逼宗社國家廢興在將軍將軍誠有意乎捨今日尙何在答曰苟緣王室惟公所使乃引天地以自誓辭氣毅然東之遂定謀以敬暉李湛爲右羽林將軍命總禁兵與多祚王同皎請太子至玄武門斬關入及長生殿白武后曰諸將誅逆臣易之昌宗恐漏大謀不敢豫奏頓首請歸死后病臥顧湛曰我於而父子不薄亦豫是邪中宗復位封多祚遼陽郡王食實戶八百子承訓爲衛尉少卿湛遷大將軍封趙國公食實戶五百帝祠太廟特詔多祚與相王登輿夾侍監察御史王覲謂多祚夷人雖有功不宜共輦帝曰朕推以心腹卿勿復言崔玄暉等得罪多祚畏禍及故陽厚草氏節愍太子誅武三思多祚與成王千里率兵先至玄武樓下具言所以誅三思狀按兵不戰宮闈令楊思勳方侍帝即挺刀斬其婿羽林中郎將野呼利兵因沮潰多祚爲其下所殺二子亦見害籍沒其家景雲初追復官爵并有家屬

湛者義府最幼子字興宗沈厚有度六歲授周王府文學累遷右散騎常侍襲河間郡公武后徙上陽宮留湛宿衛頃之復爲右散騎常侍賜鐵券三思惡之貶果州刺史歷洛絳二州累遷右領軍大將軍開元十年卒贈幽州都督初義府以立武后故得宰相而湛爲中興功臣世不以其父惡爲貶云

論弓仁吐蕃族也父欽陵世相其國聖歷二年弓仁以所統吐渾七千帳自歸授左玉鈐衛將軍封酒泉郡公神龍三年爲朔方軍前鋒游奕使時張仁愿築三受降城弓仁以兵出諾真水草心山爲邏衛開元初突厥九姓亂弓仁引軍渡漠踰白檀林收火拔部喻多真種落降之跌跌思太叛戰赤柳澗弓仁騎才五百自新堡進時賊四環之衆不敵弓仁椎牛誓士自若再宿潰圍出人服其壯凡閱大小戰數百未嘗負賜寶玉甲第良田等列莫與比累遷左驍衛大將軍朔方副大使會病玄宗遣上醫馳視卒年六十六贈撥川郡王諡曰忠孫惟貞

惟貞名瑀以字行志向恢大開元末爲左武衛將軍肅宗在靈武以衛尉少卿募兵綏銀闕旬衆數萬從還鳳翔遷光祿卿爲元帥前鋒討擊使戰陝州以功進殿中監史思明攻李光弼於河陽周擊以兵二十萬陣城下惟貞請銳卒數千鑿數門出自旦及午苦戰破之光弼表爲開府儀同三司光弼討史朝義以爲貞守徐州賊將謝欽讓據陳乃假惟貞潁州刺史斬賊將降者萬人封蕭國公實封百戶光弼病表以自代擢左領軍衛大將軍爲英武軍使卒

尉遲勝本王子闕國天寶中入朝獻名玉良馬玄宗以宗室女妻之授右威衛將軍毗沙府都督歸國與安西節度使高仙芝擊破薩毗播仙累進光祿卿安祿山反勝使弟曜攝國事身率兵五千赴難國人固



留勝勝以少女爲質而行肅宗嘉之拜特進兼殿中監廣德中進驃騎大將軍遣還固請留宿衛加開府儀同三司封武都郡王實封百戶勝請授國於曜詔可勝既留乃穿築池觀厚賓客士大夫多從之游從德宗至興元爲右領軍將軍歷睦王傳貞元初曜上言國中以嫡承嗣今勝讓國請立其子銳帝欲遣銳襲王勝固辭以曜久行國事人安之銳生京華不習其俗不可遣當是時兄弟讓國人莫不賢之睦府除徙原王傳卒贈涼州都督

尙可孤字可孤東部鮮卑宇文之別種世處松漠間天寶末隸范陽節度使安祿山復事史思明上元中自賊所歸累授左右威衛大將軍封白水縣伯爲神策大將以功試太常卿徙封馮翊郡王食實戶一百五十魚朝恩主衛兵器其勇養爲子名智德使將兵三千屯扶風武功歷十餘年隊伍閑整朝恩死詔賜氏李名嘉勳李希烈叛擢爲招討應援荆襄使復本姓名累戰有功朱泚之難召可孤可孤率兵三千道襄鄧而西屬賊兵銳乃壁七盤僞將仇敬忠等來寇可孤擊卻之遂收藍田德宗將遷梁州命引兵守灊上拜神策京畿渭南商州節度招討使敬忠拒戰可孤急擊斬之進軍與李晟收長安爲先鋒以功加檢校尙書右僕射封馮翊郡王食實戶二百又會諸軍進討李懷光次沙苑卒于軍贈司空可孤性謹審沈壯既有勳勞未嘗自論功御衆公嚴戾數稱之

裴玢五世祖糾本王疏勒武德中來朝拜鷹揚大將軍封天山郡公留不去遂籍京兆玢初事金吾將軍論惟明爲僚力德宗在奉天以功封忠義郡王從惟明鎮鄜坊署牙將後節度使王栖曜卒中軍將何朝宗夜縱火作亂玢獨匿不出遲明歸朝宗以待命有詔并軍司馬崔略斬之以同州刺史劉公濟領節度擢玢爲司馬踰年公濟卒乃授玢節度使元和三年徙山南西道玢爲治嚴稜畏遠權勢不務貢奉蔬食敝衣居處取避風雨而已倉庫完實百姓安之當世將帥未有及者以疾辭位入朝不事朝仗妻乘竹輿二侍婢黃碧織服七年卒贈尙書左僕射諡曰節

贊曰夷狄性悖固其能知識所在者鷲挺不可遷蓋巧不足而諒常有餘觀大奈等事君皆一其志無有顧望用能功績光明爲天子倚信至渾瑊跌光顏輩烈垂無窮惟其諒有餘故也瑊光顏自有傳今類其人著之篇



唐書卷一百十

唐書卷一百十考證

阿史那社尒傳十年入朝授左驍衛大將軍○舊書九年率衆內屬拜左驍衛大將軍  
突必何力傳進拔八城引兵還○舊書凡拔七城乃廻軍



唐書卷一百十一

宋 端 明 殿 學 士 宋 祁 撰

列傳第三十六

郭二張三王蘇薛程唐

郭孝恪許州陽翟人少有奇節不治貨產父兄以為無賴隋亂率少年數百附李密密喜謂曰世言汝穎多奇士不謬也使與李勣守黎陽密敗勣遣孝恪送款封陽翟郡公拜宋州刺史詔與勣經略武牢以東所定州縣委以選補竇建德之援洛也孝恪上謁秦王進計曰王世充力竭計窮其面縛可跂足待建德悉眾遠來糧餉阻絕殆天亡時也若固守武牢以軍汜水逐機應變禽珍必矣王然之賊平置酒大會洛陽宮語諸將曰孝恪策禽賊王長先下漕功固在諸君右遷上柱國歷員趙江涇四州刺史所至有能名改左驍衛將軍累加金紫光祿大夫貞觀十六年拜涼州都督改安西都護西州刺史其地高昌舊都流徙罪人與鎮兵雜限以沙磧隔絕中國孝恪推誠撫御盡得其歡心初王師滅高昌詔以所虜焉耆生口七百還焉耆王王叛歸欲谷設可汗孝恪請擊之即拜西州道行軍總管率步騎三千出銀山道夜襲其王龍突騎支虜之帝悅降璽書褒勞俄拜崑崙道副大總管進討龜茲破其國城乃自留守遣餘軍分道



進龜茲國相那利遁去孝恪以餘部未平出營於外國人有謂孝恪曰那利素得志今亡在外勢必為變城中頗有異志願公備之孝恪忽其言不設備那利果率眾陰與城內胡為應薄城鼓譟始覺之乃率千餘人合戰城中舉應那利孝恪殊死鬪中流矢卒子待詔亦歿將軍曹繼叔進兵復拔其城太宗責孝恪斥候不明至顛覆奪其官後愍死戰更為舉哀高宗卽位追還官爵贈待詔游擊將軍賻物三百段次子待封官左豹韜衛將軍咸亨初副薛仁貴討吐蕃戰大非川敗績貸死為民

張儉字師約京兆新豐人隋相州刺史皖城郡公威孫父植車騎將軍連城縣公儉高祖從外孫也高祖起儉以功除右衛郎將遷朔州刺史時頡利可汗方彊每有求取所遺書輒稱詔敕邊吏奉承不敢卻及儉獨拒不受大教民營田歲收穀數十萬斛雖霜旱勸百姓相賑贖免飢殍州以完安李靖既平突厥有思結部者窮歸于儉儉受而安輯之其在磧北者親戚私相過省儉不禁示羈縻而已儉徙勝州後將不察其然遽奏思結叛朝廷議進討時儉以母喪奪服為使者撫納之儉單騎入其部召酋帥慰諭推腹心咸削節歸命因舉徙代州遂檢校代州都督儉勤墾田力耕歲數稔私蓄富實儉恐虜易驕乃建平糶法入之官虜悅喜由是儲斛流贏遷營州都督兼護東夷校尉坐事免詔白衣領職營州部與契丹奚霫隸屬諸蕃切眦高麗引眾入寇儉率兵破之俘斬略盡復拜營州都督太宗將征遼東遣儉率蕃兵先進略

地至遼西川漲久未度帝以為畏懦召還見洛陽宮陳水草美惡山川險易并久不進狀帝悅拜行軍總管使領諸蕃騎為六軍前鋒時高麗候者言莫離支且至帝詔儉自新城路邀擊虜不敢出儉進度遼趨建安城破賊斬數千級累封皖城郡公後改東夷校尉官為都護府即以儉為都護永徽初加金紫光祿大夫卒年六十諡曰密儉兄大師太僕卿華州刺史武功縣男弟延師左衛大將軍范陽郡公性謹畏典羽林兵三十年未嘗有過卒贈荊州都督諡曰敬陪葬昭陵儉兄弟三人門皆立戟時號三戟張家

王方翼字仲翔并州祁人祖裕隋州刺史尚同安大長公主官開府儀同三司卒諡曰文方翼早孤哀毀如成人時號孝童母李為主所斥居鳳泉墅方翼尚幼雜庸保執苦不棄日墾田植樹治林塋墜完牆屋煨松丸墨為富家主薨還京師嘗夜行見長人丈餘引弓射仆之乃朽木也太宗聞擢右千牛高宗立而從祖女弟為皇后調安定令誅滅大姓姦豪脅息徙瀚海都護司馬坐事下遷朔州尚德府果毅歲餘代還居母喪哀瘠甚帝遣侍醫療視其友趙持滿誅死尸諸道親戚莫敢視方翼曰樂布哭彭越義也周文王掩骼仁也絕友義蔽生仁何以事君遂往哭其尸具禮收葬金吾劾繫帝嘉之不罪再遷肅州刺史州無墮墜寇易以攻方翼乃發卒建樓堞廝多樂水自環烽邏精明儀鳳間河西蝗獨不至方翼境而它郡民或餓死皆重糴走方翼治下乃出私錢作水碓簿其贏以濟飢療構舍數十百楹居之全活甚眾芝產



其地裴行儉討遮旬奏爲副兼檢校安西都護徙故都護杜懷寶爲庭州刺史方翼築碎葉城面三門紆  
還多趣以詭出入五旬畢西域胡縱觀莫測其方略悉獻珍貨未幾徙方翼庭州刺史而懷寶自金山都  
護更鎮安西遂失蕃戎之和永淳初十姓阿史那車簿噉叛圍弓月城方翼引軍戰伊麗河敗之斬首千  
級俄而三姓咽麪兵十萬踵至方翼次熱海進戰矢著臂引佩刀斷去左右莫知所部雜虜謀執方翼爲  
內應方翼悉召會軍中厚賜以次出壁外縛之會大風雜金鼓而號譟無聞者殺七千人卽遣騎分道襲  
咽麪等皆驚潰烏鶻引兵遁去禽首領突騎施等三百人西戎震服初方翼次萬水暴漲師不可度沈祭  
以禱師涉而濟又七月次葉河無舟而冰一昔合時以爲祥西域平以功遷夏州都督屬牛疫民廢田作  
方翼爲耦耕法張機鍵力省而見功多百姓順賴明年召方翼議西域事引見奉天宮賜食帝前帝見衣  
有汗濯處問其故具對熱海苦戰狀視其創帝咨嗟久之賜賚良厚俄而妖賊白鐵余以綏州反詔方翼  
與程務挺討之飛檐擊賊火其柵平之封太原郡公阿史那元珍入寇被詔進擊時庫無完鎧方翼斷六  
板畫虎文鉤聯解合賊馬忽見奔駭遂敗獲大將二因降桑乾舍利二部武后時王后屬無在者方翼自  
視功多莫不坐而后內欲因罪除之未得也及務挺被殺卽并坐方翼追入朝捕送獄流崖州卒于道年  
六十三神龍初復官爵方翼善書與魏叔琬齊名子珣字伯玉與兄瑒弟瑑以文學稱時號三王天授初

珣及進士第應制科遷藍田尉以拔萃擢長安尉因進見武后召問刑政嘉之詢其族氏對曰廢后臣之  
姑也后不悅左遷亳州司法參軍神龍初爲河南丞武三思矯制貶臨川令宋璟輔政召授侍御史出許  
州長史歲旱珣時假刺史事開廩振民卽自劾玄宗赦之累遷工部侍郎而瑑至中書舍人珣嘗爲祕書  
少監數年而瑑繼職終右散騎常侍卒贈戶部尚書諡曰孝子錮天寶中歷右補闕殿中侍御瑑子銜自  
有傳

蘇烈字定方以字行冀州武邑人後徙始平父嘗當隋季率里中數千人爲本郡討賊定方驍悍有氣決  
年十五從父戰歎先登陷陣嘗卒代領其衆破劇賊張金稱楊公卿追北數十里自是賊不舍境鄉黨賴  
之貞觀初爲匡道府折衝從李靖襲突厥頡利於磧石率馭馬一百爲前鋒乘霧行去賊一里許霧露見  
牙帳馳殺數十百人頡利及隋公主惶窘各遁去靖亦尋至餘黨悉降再遷左衛中郎將與程名振討高  
麗破之拜右屯衛將軍臨清縣公從葱山道大總管程知節征賀魯至鷹娑川賀魯率二萬騎來拒總管  
蘇海政連戰未決鼠尼施等復引二萬騎爲援定方始休士見塵起率精騎五百踰嶺馳擣賊營賊衆大  
潰殺千餘人所棄鎧仗牛馬藉藉山野不可計副總管王文度疾其功謬謂知節曰賊雖走軍死傷者衆  
今當結輜重陣間被甲而趨賊來卽戰是謂萬全又矯制收軍不深入於是馬羶卒勞無鬪志定方說知



節曰天子詔討賊今反自守何功之立哉且公爲大將而闔外之事不得專顧副將乃得專之理不其然胡不囚文度待天子命不從至恒篤城有胡人降文度猥曰師還而降且爲賊不如殺之取其貲定方曰此乃自作賊耳蓋曰伐叛及分財定方一不取太宗知之比知節等還悉下吏當死貸爲民擢定方伊麗道行軍大總管復征賀魯以任雅相回紇婆濶爲副出金山北先擊處木昆部破之俟斤嬾獨祿擁衆萬帳降定方撫之發其千騎并回紇萬人進至曳咥河賀魯率十姓兵十萬拒戰輕定方兵少舒左右翼包之定方令步卒據高攢稍外向親引勁騎陣北原賊三突步陣不能入定方因其亂擊之塵戰三十里斬首數萬級賊大奔明日振兵復進五弩失畢衆降賀魯獨與處木昆屈律噉數百騎西走定方令副將蕭嗣業回紇婆濶率雜虜兵趨邪羅斯川追北定方與雅相領新附兵絕其後會大雪吏請少休定方曰虜恃雪方止舍謂我不能進若縱使遠遁則莫能禽遂勒兵進至雙河與彌射步真合距賀魯所百里下令陣而行薄金牙山方賀魯將敗定方縱擊破其牙下數萬人悉歸所部賀魯走石國彌射子元爽以兵與嗣業會縛賀魯以還由是修亭障列蹊隧定疆畛問疾收斂唐之州縣極西海矣高宗臨軒定方戎服率賀魯以獻策功拜左驍衛大將軍刑國公別封子慶節爲武邑縣公會思結闕俟斤都曼先鎮諸胡劫所部及疏勒朱俱波喝槃陀三國復叛詔定方還爲安撫大使率兵至葉葉水而賊堞馬頭川定方選精

卒騎萬三千襲之晝夜馳三百里至其所都曼驚戰無素遂大敗走馬保城師進攻之都曼計窮遂面縛降俘獻於乾陽殿有司請論如法定方頓首請曰臣向諭陛下意許以不死願丐其命帝曰朕爲卿全信乃宥之葱嶺以西遂定加食邢州鉅鹿三百戶遷左武衛大將軍出爲神丘道大總管率師討百濟自城山濟海至熊津口賊瀕江屯兵定方出左涯乘山而陣與之戰賊敗死者數千王師乘潮而上舳艦銜尾進鼓而譟定方將步騎夾引直趨真都城賊傾國來酣戰破之殺虜萬人乘勝入其郭玉義慈及太子隆北走定方進圍其城義慈子泰自立爲王率衆固守義慈之孫文思曰王與太子出而叔豈得擅爲王若王師還我父子安得全遂率左右縋城下人多從之泰不能止定方使士登城建唐旗幟於是泰開門請命其將禰植與義慈降隆及諸城遂款百濟平俘義慈隆泰等獻東都定方所滅三國皆生執其王賞資珍寶不勝計加慶節尙鞏奉御未幾定方爲遼東道行軍大總管俄徙平壤道破高麗之衆於湏江奪馬邑山爲營遂圍平壤會大雪解圍還拜涼州安集大使以定吐蕃吐谷渾乾封二年卒年七十六帝悼之責謂侍臣曰定方於國有功當褒贈若等不言何邪乃贈左驍衛大將軍幽州都督諡曰莊

薛仁貴絳州龍門人少貧賤以田爲業將改葬其先妻柳曰夫有高世之材要須遇時乃發今天子自征遼東求猛將此難得之時君盍圖功名以自顯富貴還鄉葬未晚仁貴乃往見將軍張士貴應募至安地



會郎將劉君邛爲賊所圍仁貴馳救之斬賊將係首馬鞍賊皆懼伏由是知名王師攻安市城高麗莫離支遣將高延壽等率兵二十萬拒戰倚山結屯太宗命諸將分擊之仁貴恃驍悍欲立奇功乃著白衣自標顯持戟腰鞬兩弓呼而馳所向披靡軍乘之賊遂奔潰帝望見遣使馳問先鋒白衣者誰曰薛仁貴帝召見嗟異賜金帛口馬甚衆授游擊將軍雲泉府果毅令北門長上師還帝謂曰朕舊將皆老欲擢驍勇付闔外事莫如卿者朕不喜得遼東喜得虜將遷右領軍中郎將高宗幸萬年宮山水暴至夜突立武門宿衛皆散走仁貴曰當天子緩急安可懼死遂登門大呼以警宮內帝遽出乘高俄而水入帝寢帝曰賴卿以免始知有忠臣也賜以御馬蘇定方討賀魯仁貴上疏曰臣聞兵出無名事故不成明其爲賊敵乃可服今泥熟不事賀魯爲其所破虜係妻子王師有於賀魯部落轉得其家口者宜悉取以還厚加賚遣使百姓知賀魯爲暴而陛下至德也帝納之遂還其家屬泥熟請隨軍効死顯慶三年詔副程名振經略遼東破高麗於貴端城斬首二千級明年與梁建方契苾何力遇高麗大將溫沙多門戰橫山仁貴獨馳入所射皆應弦仆又戰石城有善射者殺官軍十餘人仁貴怒單騎突擊賊弓矢俱廢遂生禽之俄與辛文陵破契丹於黑山執其王阿卜固獻東都拜左武衛將軍封河東縣男詔副鄭仁泰爲鐵勒道行軍總管將行宴內殿帝曰古善射有穿七札者卿試以五甲射焉仁貴一發洞貫帝大驚更取堅甲賜之時九

姓衆十餘萬合驍騎數十來挑戰仁貴發三矢輒殺三人於是虜氣懾皆降仁貴慮爲後患悉坑之轉討磧北餘衆禽僞葉護兄弟三人以歸軍中歌曰將軍三箭定天山壯士長歌入漢關九姓遂衰鐵勒有思結多覽葛等部先保天山及仁泰至懼而降仁泰不納虜其家以賞軍賊相率遁去有候騎言虜輜重畜牧被野可往取仁泰選騎萬四千卷甲馳絕大漠至仙萼河不見虜糧盡遣人飢相食比入塞餘兵纔二十之一仁貴亦取所部爲妾多納賊遺爲有司劾奏以功見原乾封初高麗泉男生內附遣將軍龐同善高侃往慰納弟男建率國人拒弗納乃詔仁貴率師接送同善至新城夜爲虜襲仁貴擊之斬數百級同善進次金山岫虜不敢前高麗乘勝進仁貴擊虜斷爲二衆卽潰斬馘五千援南蘇木底蒼巖三城遂會男生軍手詔勞勉仁貴負銳提卒二千進攻扶餘城諸將以兵寡勸止仁貴曰在善用不在衆身帥士遇賊輒破殺萬餘人拔其城因旁海略地與李勣軍合扶餘既降它四十城相率送款威震遼海有詔仁貴率兵二萬與劉仁軌鎮平壤拜本衛大將軍封平陽郡公檢校安東都護移治新城撫孤存老檢制盜賊隨材任職褒崇節義高麗士衆皆欣然忘亡咸亨元年吐蕃入寇命爲邏娑道行軍大總管率將軍阿史那道真郭待封擊之以援吐谷渾待封嘗爲鄯城鎮守與仁貴等夷及是恥居其下頗違節度初軍次大非川將趨烏海仁貴曰烏海地險而瘴吾入死地可謂危道然速則有功遲則敗今大非嶺寬平可置二



柵悉內輜重留萬人守之吾倍道掩賊不整滅之矣乃約齋至河口遇賊破之多所殺掠獲牛羊萬計進至烏海城以待後援待封初不從領輜重踵進吐蕃率衆二十萬邀擊取之糧仗盡沒待封保險仁貴退軍大非川吐蕃益兵四十萬夾戰王師大敗仁貴與吐蕃將論欽陵約和乃得還吐谷渾遂沒仁貴歎曰今歲在庚午星在降婁不應有事西方鄧艾所以死於蜀吾固知必敗有詔原死除名爲庶人未幾高麗餘衆叛起爲鷄林道總管復坐事貶象州會赦還帝思其功乃召見曰疇歲萬年宮微卿我且爲卿前日殄九姓破高麗爾功居多人有言向在烏海城下縱虜不擊以至失利此朕所恨而疑也今遼西不窳瓜州路絕卿安得高枕不爲朕指磨邪於是拜瓜州長史右領軍衛將軍檢校代州都督率兵擊突厥元珍於雲州突厥問曰唐將爲誰曰薛仁貴突厥曰吾聞薛將軍流象州死矣安得復生仁貴脫兜鍪見之突厥相視失色下馬羅拜稍稍遁去仁貴因進擊大破之斬首萬級獲生口三萬牛馬稱是永淳二年卒年七十贈左驍衛大將軍幽州都督官給輿護喪還鄉里

子訥字慎言起家城門郎遷藍田令富人倪氏訟息錢於肅政臺中丞來俊臣受賕發義倉粟數千斛償之訥曰義倉本備水旱安可絕衆人之仰私一家報上不與會俊臣得罪亦止後突厥擾河北武后以訥世將詔攝左威衛將軍安東道經略使對同明殿具言醜虜馮暴以廬陵王藉言今雖還東宮議不堅信

若太子無動賊不討而解后納其言俄遷幽州都督安東都護改并州長史檢校左衛大將軍訥久處邊有戰功開元初玄宗講武新豐詔訥爲左軍節度時諸部頗失序唯訥與解琬軍不動帝令輕騎召之至軍門不得入禮成尤見慰勞明年契丹奚突厥連和數入邊訥建議請討詔監門將軍杜賓客定州刺史崔宣道與訥帥衆二萬出檀州賓客議方暑士負戈羸糧深討慮恐無功姚元崇亦持不可訥獨曰夏草薦茂羔犢方息不費饋餼因盜資振國威靈不可失也天子方欲夸威四夷喜奇功乃聽訥言而授紫微黃門三品以重之師至灤河與賊遇諸將不如約爲虜覆盡亡其軍訥脫身走而罪宣道及大將李思敬等八人有詔斬以狗獠賓客免盡奪訥官爵俄而吐蕃大會於達延乞力徐等衆十萬寇臨洮入蘭州剽牧馬詔訥白衣攝羽林將軍爲隴右防禦使與王峻擊之追及賊戰武階驛犄角劫之破其衆尾北至洮水又戰長城堡殺酋數萬禽其酋六指鄉彌洪悉收所掠及仗械不貲時帝欲自將北伐及訥大克乃止行命紫微舍人倪若水卽軍陟功狀拜訥左羽林大將軍復封平陽郡公以子暢爲朝散大夫又授涼州鎮軍大總管赤水建康河源邊州皆隸節度俄爲朔方行軍大總管久之以老致仕卒年七十二贈太常卿諡曰昭定訥性沈勇寡言其用兵臨大敵益壯弟楚玉開元中爲范陽節度使以不職廢生子嵩嵩生燕薊間氣豪邁不肯事產利以膂力騎射自將豫安祿山亂晚爲史朝義守相州僕固懷恩破朝義



長驅河朔嵩震懼迎拜軍門懷恩釋之奏爲檢校刑部尙書相衛洛邢等州節度使方大亂後人亦獻禍  
嵩謹奉職頗有治名大厯初封高平郡王實封二百戶號其軍爲昭義遷檢校尙書右僕射更封平陽七  
年卒贈太保詔其弟嶠知留後事累加檢校太子少師十年爲其將裴志清所逐以兵歸田承嗣嶠奔洛  
州請入朝降服待罪銀臺門赦之乃分其地以嵩族子擇爲相州刺史雄衛州刺史堅洛州刺史承嗣誘  
雄亂不從遣客刺殺之初嵩好蹴鞠隱士劉綱勸止曰爲樂甚衆何必乘危邀暑刻歡嵩悅圖其形坐右  
嵩子平

平字垣塗年十二爲磁州刺史父喪軍吏以故事脅知留務僞許之已而讓嶠夕以喪歸累授右衛將軍  
宿衛三十年宰相杜黃裳擢爲汝州刺史治有風績王師討蔡繇左龍武大將軍授鄭滑節度使數戰有  
功始河溢瓠子東泛滑距城纔二里所平按求故道出黎陽西南因命其左裴弘泰往請魏博節度使田  
弘正弘正許之乃籍民田所當者易以它地疏道二十里以醮水悍還墾田七百頃於河南自是滑人無  
患入爲左金吾衛大將軍未幾復帥鄭滑李師道平詔分淄青齊登萊五州爲平盧軍徙平爲節度使王  
庭湊圍牛元翼棣州危詔平出援平遣將李叔佐率兵二千往刺史王稷餽餉陘狹衆潰而歸推突將馬  
士端爲帥劫屯士萬人薄州堞城中兵寡平悉公帑家貲募銳卒二千迎戰以奇兵掩賊輜重賊狼顧遂

大敗降餘黨平引謀亂者二千人斬堂皇下脅從皆縱還田里威震一方詔遷檢校尙書右僕射封魏國  
公在鎮六年兵饑完礪徭賦均一寶曆初入朝民鄣路願留數日得出拜檢校司空河中絳隰節度使復  
得隸晉慈二州益兵三千進檢校司徒更封韓召拜太子太保以司徒致仕卒年八十贈太傅

子從字順之以蔭授左清道率府兵曹參軍累遷汾州刺史隄文谷瀘河二水引溉公私田汾人利之徙  
濮州儲粟二萬斛以備凶災於是山東大水詔右司郎中趙傑爲賑卹使傑表其才擢將作監終左領軍  
衛上將軍贈工部尙書

程務挺洛州平恩人父名振隋大業末仕竇建德爲普樂令盜不跡境俄棄賊自歸高祖詔授永靈令使  
率兵經略河北卽夜襲鄴縣俘男女千餘人以歸去數舍閩婦人方乳者九十餘人還之鄴人感其仁劉  
黑闥陷洛州名振與刺史陳君賓自拔歸母妻爲賊所得名振率衆千餘掠冀具滄瀛等州邀擊糧道悉  
毀賊水陸餉具黑闥怒殺其母妻賊平請手斬黑闥以其首祭母拜營州長史封東平郡公賜物二千段  
黃金三百兩轉洛州刺史太宗征遼東召問方略不合旨帝勃然詰之名振辯對益詳帝意解謂左右曰  
房玄齡常在朕前見朕嗔餘人色不能主名振生平未識我一旦誦讓而辭吐不屈奇士哉拜右驍衛將  
軍平壤道行軍總管攻沙卑城破獨山陣皆以少擊衆號爲名將遷營州都督兼東夷都護擊高麗於貴



端水焚其新城歷晉蒲二州刺史鏐方道總管卒贈右衛大將軍諡曰烈務挺少從父征討以勇力聞拜右領軍衛中郎將破突厥六萬騎於雲州會僞可汗阿史那伏念叛總管李文暉等三將以次奔敗詔裴行儉討之以務挺副檢校豐州都督時伏念屯金牙山務挺與副總管唐玄表引兵赴之伏念懼乃間道降於行儉故裴炎以爲非行儉功遷務挺右武衛將軍封平原郡公綏州部落稽白鐵余據城平叛建僞號署置百官進攻綏息大斌殺官吏火區會詔務挺與夏州都督王方翼討之務挺生禽白鐵余進左驍衛大將軍檢校左羽林軍嗣聖初與右領軍大將軍張虔勗等豫廢中宗立豫王爲皇帝累被褻賚以左武衛大將軍爲單于道安撫大使禦突厥務挺善綏禦士服其威愛突厥憚之不敢盜邊裴炎下獄務挺密表申治又素與唐之奇杜求仁善或言務挺與炎及徐敬業潛相援結后遣左鷹揚將軍裴紹業卽軍中斬之籍其家突厥聞務挺死率相慶爲立祠每出師輒禱焉

王孝傑京兆新豐人少以軍功進儀鳳中劉審禮討吐蕃孝傑以副總管戰大非川爲虜執贊普見之曰貌類吾父故不死歸之武后時爲右鷹揚衛將軍孝傑居虜中久悉其虛實長壽元年爲武威道總管與阿史那忠節討吐蕃克龜茲于闐疏勒碎葉等城武后曰貞觀中西境在四鎮其後不善守棄之吐蕃今故土盡復孝傑功也乃遷左衛大將軍進夏官尚書同鳳閣鸞臺三品清源縣男證聖初復爲朔方道總

管與吐蕃戰不利免會契丹李盡忠等叛有詔起白衣爲清邊道總管將兵十八萬討之軍至東硤石谷與賊接道隘虜衆孝傑率銳兵先驅出谷整陣與賊戰而後軍總管蘇宏暉以其軍退援不至爲虜所乘軍潰孝傑墮谷死士相蹂躪且盡初進軍平州白鼠晝入營頓伏皆謂鼠坎精胡象也白質歸命天亡之兆及戰乃孝傑覆焉時張說以管記還白狀后問之說具陳孝傑乃心國家敗深入以少當衆雖敗功可錄也乃贈夏官尚書耿國公以其子無擇爲朝散大夫遣使者斬宏暉使未至而宏暉已立功遂贖罪

唐瑒字休璟以字行京兆始平人曾祖規爲後周驃騎大將軍休璟少孤授易於馬嘉運傳禮於賈公彥舉明經高第爲吳王府典籤改管州戶曹參軍會突厥誘奚契丹叛都督周道務以兵授休璟破之於獨護山數賊多遷朔州長史永淳中突厥圍豐州都督崔智辯戰死朝廷議棄豐保靈夏休璟以爲不可上疏曰豐州控河遏寇號爲襟帶自秦漢以來常郡縣之土田良美宜耕牧隋季喪亂不能堅守乃遷就靈慶戎羯得以乘利而交侵始以靈夏爲邊唐初募人以實之西北一隅得以完固今而廢之則河傍地復爲賊有而靈夏亦不足自安非國家利也高宗從其言垂拱中遷安西副都護會吐蕃破焉耆安息道大總管韋待價等敗休璟收其潰亡以定西土授靈州都督乃陳方略請復四鎮武后遣王孝傑拔龜茲等城自休璟倡之聖歷中授涼州都督右肅政御史大夫持節隴右諸軍副大使吐蕃大將趨莽布支率騎



數萬寇掠州入洪源谷休璟以兵數千臨高望之見賊旗幟鮮明謂麾下曰吐蕃自欽陵死贊婆降莽布支新將兵欲以示武且其下皆貴臣曾豪子弟騎雖精不習戰吾爲諸君取之乃被甲先登六戰皆克斬二將獲首二千五百築京觀而還吐蕃來請和既宴使者屢覘休璟后問焉對曰洪源之戰是將軍多殺臣士卒其勇無比今願識之后嗟異擢爲右武威金吾二衛大將軍西突厥烏質勒失諸蕃和舉兵相攻安西道閉武后詔休璟與宰相計議不少選畫所當施行者既而邊州建請屯置盡如休璟策后曰恨用卿晚進拜夏官尙書同鳳閣鸞臺三品后誚楊再思李嶠姚元崇等曰休璟練知邊事卿輩十不當一改太子右庶子仍知政事會契丹入塞復以夏官尙書檢校幽營等州都督安東都護時中宗爲皇太子休璟將行進啟曰易之兄弟恩寵過幸數入禁闈非人臣所宜願加防察帝復位召授輔國大將軍同中書門下三品酒泉郡公謂曰初欲召公計事以有北狄憂前日直言今未忘也加特進尙書右僕射賜邑戶三百封宋國公是歲大水上疏自劾免不許累遷檢校吏部尙書景龍二年致仕未幾復起爲太子少師同中書門下三品監修國史景雲初以特進爲朔方行軍大總管備突厥停舊封別賜百戶明年復請老給一品全祿延和元年卒年八十六贈荊州大都督諡曰忠休璟以儒者號知兵自碣石踰四鎮其間緣地幾萬里山川夷坦障塞之要皆能言之故行師料敵未嘗敗初得封以賦絹數千散賜其族又出財數

十萬大爲塋墓盡葬其五服親當時稱重惟張仁愿議築受降城而休璟獨謂不可卒就之而漠南無虜患始老已踰八十猶託倚權近求復用於是賀婁尙宮方用事附者輒榮赫休璟乃爲子娶其義女故復起宰相頗爲時譏嘗其當國亦無它毗益云子先慎至陳州刺史先擇爲右金吾衛將軍

張仁愿華州下邳人本名仁亶以睿宗諱音近避之有文武材武后時累遷殿中侍御史御史郭弘霸者稱后乃彌勒佛身又鳳閣舍人張嘉福王慶之請以武承嗣爲皇太子邀仁愿聯章仁愿正色拒之後王孝傑爲吐刺軍總管與吐蕃戰不利仁愿監其軍因入言狀孝傑坐免擢仁愿侍御史萬歲通天中監察御史孫承景監清邊軍戰還自圖先鋒當矢石武后歎曰御史乃能如是乎擢爲右肅政臺中丞詔仁愿卽敘其麾下功仁愿先問承景破敵曲折承景實不行所問皆窮仁愿劾奏承景罔上虛列虜級貶爲崇仁令以仁愿代爲中丞檢校幽州都督默啜寇趙定還出塞仁愿以兵邀之賊引去矢著其手武后遣使勞問賜藥注傳遷并州都督長史神龍中進左屯衛大將軍兼檢校洛州長史會穀貴多盜仁愿一切捕殺皆積府門畿甸震懾無敢犯先是賈敦頤嘗爲長史有政績時人爲之語曰洛有前賈後張敵京兆三王三年朔方軍總管沙吒忠義爲突厥所敗詔仁愿攝御史大夫代之既至賊已去引兵踵擊夜掩其營破之始朔方軍與突厥以河爲界北厓有拂雲祠突厥每犯邊必先謁祠禱解然後料兵度而南時默



吸悉兵西擊突騎施娑葛仁愿請乘虛取漠南地於河北築三受降城絕虜南寇路唐休璟以爲兩漢以來皆北守河今築城虜腹中終爲所有仁愿因請中宗從之表留歲滿兵以助功咸陽兵二百人逃歸仁愿禽之盡斬城下軍股慄役者盡力中六旬而三城就以拂雲爲中城南直朔方西城南直靈武東城南直榆林三壘相距各四百餘里其北皆大磧也斥地三百里而遠又於牛頭朝那山北置烽候千三百所自是突厥不敢踰山牧馬朔方益無寇歲損費億計減鎮兵數萬初建三城也不置壘門曲敵戰格或曰邊城無守備可乎仁愿曰兵貴攻取賤退守寇至當併力出拒敢回望城者斬何事守備退悞其心哉後常元楷代爲總管始築壘門議者益重仁愿而輕元楷景龍二年拜左衛大將軍同中書門下三品封韓國公春暹朝秋復督軍備邊帝爲賦詩祖道賞賚不貲遷鎮軍大將軍睿宗立乃致仕加兵部尚書稟祿全給開元二年卒贈太子少保仁愿爲將號令嚴將吏信伏按邊撫師賞罰必直功罪後人思之爲立祠受降城出師輒享焉宰相文武兼者當時稱李靖郭元振唐休璟仁愿云在朔方奏用御史張敬忠何鸞長安尉寇泚鄆尉王易從始平主簿劉體微分總軍事太子文學劉彥昭爲管記義烏尉晁良貞爲隨機皆著稱後至大官世名仁愿知人子之輔至趙州刺史張敬忠自監察御史累遷吏部郎中開元七年拜平盧節度使

王曠滄州景城人後徙洛陽父行果爲長安尉知名曠少孤好學祖有方奇之曰是子當興吾宗長豪曠不樂爲銜檢事擢明經第始調清苑尉歷除殿中侍御史會朔方元帥魏元忠討賊不利劾奏副將韓思忠敗律當誅曠以思忠偏裨權不己制且其人勇智可惜不宜獨誅固爭得釋曠亦出爲渭南令景龍末授桂州都督州有兵舊常仰餉衡永曠始築羅郭罷戍卒埭江開屯田數千頃以息轉漕百姓賴之後求歸上冢州人詣闕留有詔桂往罹寇暴戶口彫瘠宜卽留以須政成在桂踰期年人丐刻石頌德初劉幽求放封州廣州都督周利貞必欲殺之道出曠所曠知其故留不遣利貞移書督趣幽求懼曰勢且難全正恐累君奈何曠曰公之坐非朋友所絕曠在終不忍公無罪就死俄崔湜等誅幽求復執政故詔幽求爲刻石辭遷鴻臚少卿充朔方軍副大總管安北大都護豐安定遠等城並授節度進太僕少卿隴右羣牧使開元二年吐蕃以精甲十萬寇臨洮次大來谷其酋參達延以兵踵而前曠率所部二千與臨洮軍合料奇兵七百易胡服夜襲去賊五里令曰前遇寇士大呼鼓角應之賊驚疑伏在旁自相鬪死者萬計俄而薛訥至武階距大來二十里賊陣兩軍間互一舍而近曠往迎訥夜使壯士銜枚突虜駭引去追至洮水敗之俘獲如積以功加銀青光祿大夫清源縣男兼原州都督以子班爲朝散大夫又進并州都督長史明年突厥默啜爲拔曳因所殺其下多降分置河曲旣而小殺繼降降者稍稍叛去曠上言突厥



向以國亂故款塞與部落無間也延僊北風何嘗忘之今徙處河曲使內伺邊釁久必爲患比者不受要約兵已屢動擅作烽區閉障行李虜脫南牧降帳必與連衡以相應接表裏有敵雖韓彭孫吳無所就功請至農隙令朔方軍大陳兵召酋豪告以禍福昭以金繒且言南方麋鹿魚米之饒並遷置淮右河南寬鄉給之程糧雖一時之勞然不二十年漸服諸華料以充兵則皆勁卒議者若謂降狄不可以南處則高麗舊俘置沙漠之西城傍編夷居青徐之右何獨降胡不可徙歟臣復料議者必曰故事置于河曲前日已寧今無獨異且往者頡利破亡邊鄙安定故降戶得以久安今虜未殄滅此降人皆戚屬固不與往年同已臣請以三策料之悉其部落置內地獲精兵之實閉點虜之患此上策也亭障之下蕃華參處廣屯戍爲備擬費甚人勞下策也置之胡塞滋成禍萌此無策也不然前至河冰且必有變書未報而虜已叛乃敕峻將并州兵濟河以討峻間行卷甲捨幕趨山谷夜遇雪恐失期誓於神明曰峻事君不以忠不討有罪天所殛者當自蒙罰士衆無罪心誠忠而天監之則止雪反風以獎成功俄而和霽時叛胡分二道走峻自東道追及之獲級三千以功遷左散騎常侍朔方行軍大總管改御史大夫跌跌部及僕固都督勺磨等散保受降城之鄙潛引突厥內擾峻密言上盡誘而誅之拜兵部尚書復爲朔方軍大總管九年蘭池胡康待賓據長泉反陷六州詔郭知運與峻討平之封清源公官一子玄宗以宮人賜知運等峻獨

不敢取曰臣之事君猶子事父詎有常近闔掖而臣子敢當乎誓死以免見聽初峻奏朔方兵力有餘願罷知運獨當戍未報而知運至故不協峻所降附知運輒縱擊賊意峻賣己乃復叛峻坐貶梓州刺史改太子詹事中山郡公進吏部尚書太原尹代張說爲兵部尚書同中書門下三品充朔方軍節度大使河北河西隴右河東之軍盡屬是冬帝親郊追會大禮峻以冰壯請留將兵待邊手勅慰勉會有人告許州刺史王喬謀反辭逮峻詔源乾耀張說雜訊無狀以黨與貶蘄州刺史遷定州復以戶部尚書爲朔方軍節度使卒贈尚書左丞相諡曰忠烈峻氣貌偉特時謂爲熊虎相感慕節義有古人風其操下肅壹吏人畏愛始二張之誣魏元忠峻獨上疏申治宋璟曰魏公全矣子再觸逆鱗其殆乎峻曰魏公以忠獲罪苟得辨雖死弗悔峻卒後信安王禕討奚於幽州告捷且言戰時士咸見峻與部將高昭磨兵赴敵天子嗟異戶部郎中陽伯成上疏請封峻墓表異之優其子孫帝乃遣使祭峻廟進諸子官贊曰唐所以能威振夷荒斥大封域者亦有虎臣爲之牙距也至師行數千萬里窮討殊闕獵取其國由鹿豕然可謂選值其材歟夫宰相代天秩物變化人神惟有德者宜之若休璟仁惠用以承勳非疆所不能邪擬功名之地則綽綽矣



唐書卷一百十一考證

蘇烈傳出為神丘道大總管率師討百濟○臣德潛按舊書制授熊津道大總管帥師討百濟當從舊書

熊津在朝鮮國城南百濟海口也唐置熊津都督府于此

薛仁貴傳遇高麗大將温沙多門戰橫山○舊書作温沙門

仁貴孫嵩七年卒贈太保○舊書傳與新書紀皆作大厯八年

張仁愿傳又於牛頭朝那山北置烽候千三百所○舊書作千八百所



唐書卷一百十一考證

唐書卷一百十二

宋 端 明 殿 學 士 宋 祁 撰

列傳第三十七

王貞韓蘇薛柳馮蔣

王義方泗州漣水人客于魏孤且寢事母謹甚淹究經術性驍特高自標樹舉明經詣京師客有徒步疲于道者自言父宜遠方病且革欲往省困不能前義方哀之解所乘馬以遺不告姓名去由是譽振一時不肯造請貴勢太宗使宰相聽其論於是尚書外郎獨孤慙以儒顯給事中許敬宗推慙確論義方引逮百家異同連柱慙直出其上左右為慙不平輒罷會補晉王府參軍直弘文館魏徵異之欲妻以夫人之姪辭不取俄而徵薨乃娶人問其然曰初不附宰相今感知已故也素善張亮亮抵罪故貶吉安丞道南海舟師持酒脯請福義方酌水誓曰有如忠獲戾孝見尤四維廓氛千里安流神之聽之無作神蓋是時盛夏濤霧蒸湧既祭天雲開露人壯其誠吉安介蠻夷梗悍不馴義方召首領稍選生徒為開陳經書行釋奠禮清歌吹籥登降跪立人人悅順久之徙洹水丞而亮兄子皎自朱崖還依義方將死諉妻子願以尸歸葬義方許之以皎妻少故與之誓於神使奴負柩輟馬載皎妻身步從之既葬皎原武歸妻其家而



告亮墓乃去遷雲陽丞顯慶元年擢侍御史不再旬會李義府縱大理囚婦溘于迫其丞畢正義縊死無  
敢白其姦義方自以興縣屬不三時拜御史且疾當世附離匪人以欺朝廷內決劾奏意必得罪卽問計  
於母母曰昔王母伏劍成陵之誼汝能盡忠吾願之死不恨義方卽上言天子置公卿大夫士欲水火相  
濟鹽梅相成不得獨是獨非也昔堯失之四凶漢高祖失之陳豨光武失之逢萌魏武失之張邈彼聖傑  
之主然皆失於前而得於後今陛下撫萬邦而有之蠻區夷落罪無逃罰况輦轂下姦臣肆虐乎殺人滅  
口此生殺之柄不自主出而下移佞臣履霜堅冰彌不可長請下有司雜治正義死狀卽具法冠對仗叱  
義府下跪讀所言帝方安義府狡佞恨義方以孤士觸宰相貶萊州司戶叅軍歲終不復調往客昌樂聚  
徒教授母喪隱居不出卒年五十五義方爲御史時買第後數日愛庭中樹復召主人曰此佳樹得無欠  
償乎又予之錢其廉不貪類此始魏徵愛其材也每恨太直後卒以疾惡不容于時旣死門人員半千何  
彥先行喪時松柏冢側三年乃去彥先齊州全節人武后時位天官侍郎

員半千字榮期齊州全節人其先本彭城劉氏十世祖凝之事宋起部郎及齊受禪奔元魏以忠烈自比  
伍員因自姓員終鎮西將軍平涼郡公半千始名餘慶生而孤爲從父鞠愛鞠卽通書史客晉州州舉童  
子房玄齡異之對詔高第已能講易老子長與何彥先同事王義方以邁秀見賞義方常曰五百歲一賢

者生子宜當之因改今名凡舉八科皆中咸亨中上書自陳臣家貧不滿千錢有田三十畝粟五十石聞  
陛下封神岳舉豪英故鸞錢走京師朝廷九品無葭孽親行年三十懷志潔操未蒙一官不能陳力歸報  
天子陛下何惜玉陛方寸地不使臣披露肝膽乎得天下英才五千與推所長有一居先臣當伏死都市  
書奏不報調武陟尉歲旱勸令殷子良發粟賑民不從及子良謁州半千悉發之下賴以濟刺史大怒囚  
半千于獄會薛元超持節度河讓太守曰君有民不能恤使惠出一尉尚可罪邪釋之俄舉岳牧高宗御  
武成殿問兵家有三陣何謂邪衆未對半千進曰臣聞古者星宿孤虛天陣也山川向背地陣也偏伍彌  
縫人陣也臣謂不然夫師以義出沛若時雨得天之時爲天陣足食約費且耕且戰得地之利爲地陣舉  
三軍士如子弟從父兄得人之和爲人陣捨是則何以戰帝曰善旣對策擢高第歷華原武功尉厭卑劇  
求爲左衛曹叅軍使吐蕃將行武后曰久聞爾名謂爲古人乃在朝邪境外事不足行宜留待制卽詔  
入閣供奉遷司賓寺主簿稍與巨悅王劇石抱忠同爲弘文館直學士又與路敬澹分日待制顯福門下  
擢累正諫大夫兼右控鶴內供奉半千以控鶴在古無有而授任者皆浮狹少年非朝廷德選請罷之忤  
旨下遷水部郎中會詔擇牧守除棣州刺史復入弘文館爲學士武三思用事以賢見忌出豪斬二州刺  
史半千不願任吏常以文雅粉澤故所至禮化大行睿宗初召爲太子右諭德仍學士職累封平原郡公



表丐骸骨有詔聽朝朔望半千事五君有清白節年老不衰樂山水自放開元九年遊堯山沮水間愛其地遂定居卒年九十四卽葬焉吏民哭野中抱忠長安人名屬文初置右臺自清道率府長史爲殿中侍御史進檢校天官郎中與侍郎劉奇張詢古共領選募廉潔而奇號清平二人坐慕連耀伏誅悅河南人亦善論議仕至岐王傅

韓思彥字英遠鄧州南陽人游太學專博士谷那律律爲匪人所辱思彥欲殺之律不可萬年令李乾佑異其才舉下筆成章志烈秋霜科擢第授監察御史昌言當世得失高宗夜召加二階待詔弘文館仗內供奉巡察劍南益州高贄兄弟相訟累年不決思彥救廚宰飲以乳二人寤齧肩相泣曰吾乃夷獠不識孝義公將以兄弟共乳而生邪乃請輟訟至西洱河誘叛蠻降之會蜀大饑開倉振民然後以聞璽書褒美使并州方賊殺人主名不立醉胡懷刀而汙訊掠已服思彥疑之晨集童兒數百暮出之如是者三因問兒出亦有問者乎皆曰有之乃物色推訊遂禽真盜後太白晝見勸帝修德答天譴帝讓中書令李義府曰八品官能言得失而卿冒沒富貴主何事邪義府謝罪司農武惟良擅用并州賦二百萬緡思彥劾處死武后爲請而免義府與諸武共譖思彥出爲山陽丞初尉遲敬德子姓陷大逆思彥按釋其寃至是贈黃金良馬思彥不受至官閏月自免去放蹟江淮間久之補建州司戶叅軍帝召問不見卿久今何官

邪思彥泣道所以然帝謂宰相此亦太屈復召爲御史俄出爲江都主簿又徙蘇州錄事叅軍罷客汴州張僧徹者廬墓三十年詔表其閭請思彥爲頌餉緡二百不受時歲凶家窶甚僧徹固請爲受一匹命其家曰此孝子緡不可輕用上元中復召見思彥久去朝儀矩梗野拜忘蹈舞又詆外戚擅權后惡之中書令李敬玄劾奏思彥見天子不蹈舞負氣鞅鞅不可用時已拜乾封丞故徙朱肅丞遷賀州司馬卒始思彥在蜀引什邡令鄧暉右坐曰公且貴願以子孫諉公比其斥而暉已爲文昌左丞子琬

琬字茂貞喜交酒徒落魄少崖檢有姻勸舉茂才名動里中刺史行鄉飲餞之主人揚擘曰孝于家忠于國今始充賦請行無算爵儒林榮之擢第又舉文藝優長賢良方正連中拜監察御史景雲初上言國安危在於政政以法暫安焉必危以德始不便焉終治夫法者智也德者道也智權宜也道可以久大也故以智治國國之賊不以智治國國之福貞觀承徽之間農不勸而耕者衆法施而犯者寡俗不偷薄器不汙隘吏貪者士恥同列忠正清白者比肩而立罰雖輕而不犯賞雖薄而勸位尊不偃家富不奢學校不厲而勤道佛不懲而戒土木質厚裨販弗蚩其故奈何維以皇道也自茲以來任巧智斥謬趨勢者進守道者退諂附者無黜剝之憂正直者有後時之歎人趨家競風俗淪替其故奈何行以霸道也貞觀承徽之天下亦今日天下淳薄相反由治則然夫巧者知忠孝爲立身之階仁義爲百行之本託以求進口



是而心非言同而意乖陛下安能盡察哉貪冒者謂能清貞者謂孤浮沈者爲黠剛正者爲愚位下而驕家貧而奢歲月漸漬不救其弊何由變浮之滄哉不務省事而務捉搦夫捉搦者法也法設而滋章滋章則盜賊多矣法而益嚴設之可也比法令數改或行未見益止未知損譬弈者一碁爲善而復之者愈善故曰設法不如息事事息則巧不生聖人防亂未然天下何由不治哉永淳時雍丘令尹元貞坐婦女治道免官今婦夫女役常不知怪調露時河內尉劉憲父喪人有請其員者有司以爲名教不取今謂爲見機太宗朝司農以市木槿倍價抵罪大理孫伏伽言官木槿貴故百姓者賤臣見司農識大體未聞其過太宗曰善今和市顯刻剝名爲和而實奪之往者學生佐史里正每一員闕擬者十人今當選者亡匿以免往選司從容有禮今如仇敵賈販往官將代儲什物俟其至今交罷執符紛競校在亡往商賈出入萬里今市井至失業往家藏鏹積粟相夸今匿賢示羸以相尙往夷狄款關今軍屯積年往召募人賈其勇今差勒闔宗逃亡往倉儲盈衍今所在空虛夫流亡之人非愛羈旅忘桑梓也斂重役亟家產已空鄰伍牽連遂爲游人窮詐而犯禁救死而抵刑夫亂繩已結急引之則不可解今刻薄吏能結者也舉劾吏能引者也則解者不見其人願取奇材卓行者量能授官又言仕路太廣故棄農商而趨之一夫耕一婦蠶衣食百人欲儲蓄有餘安可得乎書入不報出監河北軍兼按察使先天中賦絹非時於是穀賤織益貴

丁卯二織人多徙亡琬曰御史乃耳目官知而不言尙何賴又上言須報則弊已甚移檄罷督乃聞詔可開元中遷殿中侍御史坐事貶官卒

蘇安恆冀州武邑人博學尤明周官春秋左氏學武后末年太子雖還東宮政事一不與大臣畏禍無敢言安恆投匭上書曰陛下膺先聖顧託受嗣子揖讓應天順人二十餘年豈不聞虞舜褰裳周公復辟事乎今太子孝謹春秋盛壯使統臨宸極何異陛下身撫天下哉胡不傳位東宮休養聖躬自昔天下無二姓並興且梁河內建昌諸王以親得封恐萬歲後不能良計宜退就公侯任以閑簡又陛下二十餘孫無尺土封非長久計也請以都督府要州分而王之縱今尙幼且擇立師傅養成德器藩屏皇家書奏后雖猜克不能無感乃召見賜食厚慰遣之明年復諫曰臣聞天下者高祖太宗之天下有隋失馭羣雄鹿駭唐家親事戎旅以平萬縣指河爲誓非李氏不王非功臣不封陛下雖居正統實唐舊基日前太子在諒闇相王非長嗣唐祚中弱故陛下因以卽位今太子年德已盛尙貪有大寶忘母子之恩蔽其元夏以據神器何施顏面見唐家宗廟大帝陵寢哉臣謂天意人事還歸李氏物極則復器滿則覆當斷不斷將受其亂誠能高揖萬機自怡聖心史臣書之樂府歌之斯盛事也臣聞見過不諫非忠畏死不言非勇陛下以臣爲忠則擇是而用以爲不忠則斬臣頭以令天下書聞不報於是魏元忠爲張易之兄弟所搆獄方



急安恆獨申救曰王者有容天下之量故濟其心能進天下之善故除其惡不然則神鬼馮怒陰陽紛舛  
陛下始革命勤秉政樞博逮謀猷天下以爲明主暮年厭怠讒佞熾結水火相災百姓不親五品不遜天  
下以爲暗君邪正糝進獄訟冤劇何昔是而今非邪居安忘危之失也竊見元忠廉直有名位宰相履忠  
正邪佞之徒嫉之若讎易之兄弟無功無德但以馮附不閤數葦位勢隆極指馬獻蒲先害善良自元忠  
下獄人人偶語謂易之交亂且及四國烈士撫髀忠臣鉗口懼易之之權恐先諫受戮虛死無名況賊虜  
方彊賦斂重困而自縱讒慝搖變遐邇臣恐四夷抵目窺覘爲邊鄙患百姓託義以清君側逐鹿之人叩  
關而至陛衛左右從中以應爭鋒朱雀之門問鼎大明之宮陛下何以謝之臣今計者莫若收雷電之威  
解恢恢之網復爵還位君臣如初則天下幸甚陛下縱不能斬佞臣塞人望且當抑奪榮寵翦其羽翅無  
使驕橫爲社稷之憂疏奏易之等大怒遣刺客邀殺之賴鳳閣舍人桓彥範等悉力營解乃免神龍初爲  
習藝館內教節愍太子難或讒安恆豫謀死獄中睿宗立知其枉詔贈諫議大夫

薛登常州義興人父士通爲隋鷹揚郎將江都亂與州民聞人遂安據城拒賊武德初持地自歸授東武  
州刺史輔公祏反士通與賊將西門君儀戰破之及平封臨汾侯終泉州刺史登通貫文史善議論根證  
該審與徐堅劉子玄齊名調閣中主簿天授中累遷左補闕時選舉濫甚乃上疏曰比觀舉薦類不以才

二號第九十七批

馳聲假譽互相推引非所謂報國求賢者也古之取士考素行之原詢鄉邑之譽崇禮讓明節義以敦樸  
爲先雕文爲後故人崇勸讓士去輕浮以計貢賢愚爲州之榮辱昔李陵降而隴西慙于木隱而西河美  
名勝於利則偷競日銷利勝於名則貪暴滋煽蓋冀缺以禮讓升而晉人知禮文翁以經術教而蜀士多  
儒未有上好而下不從者也漢世求士必觀其行故士有自脩爲閭里推舉然後府寺交辟魏取放達晉  
先門閥梁陳薦士特尙詞賦隋文帝納李諤之言詔禁文章浮詞時泗州刺史司馬幼之表不典實得罪  
由是風俗稍改煬帝始置進士等科後生復相馳競赴速趨時緝綴小文名曰策學不指實爲本而以浮  
虛爲貴方今舉士尤乖其本明詔方下固已驅馳府寺之廷出入王公之第陳篇希恩奏記誓報故俗號  
舉人皆稱寬舉寬者自求也非彼知之義是以耿介之士羞於自拔循常小人奔疎取附願陛下降明制  
頒峻科斷無當之游言收實用之良策文試劾官武闕守禦昔吳起將戰左右進劍吳子辭之諸葛亮臨  
陣不親戎服蓋不取弓劍之用也漢武帝聞司馬相如之文恨不與同時及其至也終不處以公卿之位  
非所任故也漢法所舉之主終身保任楊雄之坐田儀成子之得魏相賞罰之令行則請謁之心絕退讓  
之義著則貪競之路銷請寬年限以容簡汰不實免官得人加賞自然見賢不隱貪祿不專矣時四夷質  
子多在京師如論欽陵阿史德元珍孫萬榮皆因入侍見中國法度及還並爲邊害登諫曰臣聞戎夏不



雜古所戒也故斥居塞外有時朝謁已事則歸三王之法也漢魏以來革襲衣冠築室京師不令歸國較其利害三王是而漢魏非拒邊長而質子短昔晉郭欽江統以夷狄處中夏必爲變武帝不納卒有永嘉之亂伏見突厥吐蕃契丹往因入侍並被獎遇官戎秩步登門服改氈屬語習楚夏窺圖史成敗熟山川險易國家雖有冠帶之名而狼子孤恩患必在後昔申公奔晉使子狐庸爲吳行人教吳戰陣使之叛楚漢遷五部匈奴於汾晉卒以劉石作難竊計秦并天下及劉項用兵人士凋散以冒頓之盛乘中國之虛而高祖困厄平城匈奴卒不入中國者以其生長積漠謂穹廬賢於城郭氈屬美於章紱旣安所習是以無窺中國心不樂漢故也元海五部散亡之餘而能自振者少居內地明習漢法鄙單于之陋竊帝王之稱使其未嘗內徙不過劫邊人繒綵糶歸陰山而已今皇風所覃含識革面方由余効忠日殫盡節然臣慮備豫不謹則夷狄稱兵不在方外非貽謀之道臣謂願充侍子可一切禁絕先在國者不使歸蕃則夷人保疆邊邑無爭武后不納久之出爲常州刺史屬宣州賊鍾大眼亂百姓潰震登巖勒守備闕境賴安再遷尙書左丞景雲中爲御史大夫僧慧範怙太平公主勢奪民邸肆官不能直登將治之或勸以自安答曰憲府直枉朝奏暮黜可矣遂劾奏反爲主所構出岐州刺史遷太子賓客開元初爲東都留守再爲太子賓客登本名謙光以與皇太子名同詔賜今名坐子累歸田里家苦貧詔給致仕祿卒年七十三

### 贈晉州刺史

王求禮許州長杜人武后時爲左拾遺監察御史后方營明堂瑠飾譎怪侈而不法求禮以爲鐵鸞金龍丹腹珠玉乃商瓊臺夏瑤室之比非古所謂茅茨採椽者自軒轅以來服牛乘馬今輦以人負則人代畜上書譏切久不報契丹叛使孫萬榮寇河北詔河內王武懿宗禦之懦擾不進賊敗數州去懿宗乃條華人爲賊誑誤者數百族請誅之求禮劾奏曰誑誤之人無良邊吏教習城不完固爲虜脅制盜素持叛心哉懿宗擁兵數十萬聞敵至走保城邑今乃移禍無辜之人不亦過乎請斬懿宗首以謝河北懿宗大懼后盡赦其人當是時契丹陷幽州饋輓屈竭左相豆盧欽望請停京官九品以上兩月俸助軍興求禮曰公祿萬鍾正可輟仰祿之人可奈何欽望拒不應旣奏求禮歷階進曰天子富有四海何待九品俸使宰相奪之以濟軍國用乎姚璿曰秦漢皆有稅算以佐軍求禮不識大體對曰秦漢虛天下事邊奈何使陛下効之后曰止久視二年三月大雨雪鳳閣侍郎蘇味道等以爲瑞率羣臣入賀求禮讓曰宰相變和陰陽而季春雨雪乃災也果以爲瑞則冬月雷渠爲瑞雷邪味道不從旣賀者入求禮卽厲言今陽氣憤升而陰冰激射此大災也主荒臣佞寒暑失序戎狄亂華盜賊繁興正官少僞官多百司非賄不入使天有瑞何感而來哉羣臣震恐后爲罷朝然以剛正故官齟齬神龍初終衛王府參軍



柳澤蒲州解人曾祖亨字嘉禮隋大業末爲王屋長隔李密已而歸京師姿貌魁異高祖奇之以外孫寶  
妻之三遷左衛中郎將壽陵縣男以罪貶邛州刺史進散騎常侍代還數年不得調持兄喪方葬會太宗  
幸南山因得召見哀之數日入對北門拜光祿少卿亨射獵無檢帝謂曰卿於朕舊且親然多交游自今  
宜少戒亨由是痛飭厲謝賓客身安靜素力吏事終檢校岐州刺史贈禮部尚書幽州都督諡曰恭澤耿  
介少言笑風度方嚴景雲中爲右率府鎧曹參軍四歲不遷先是中宗時長寧宜城安定諸公主及后女  
弟昭容上官與其母鄭尚宮柴隴西夫人趙及姻聯數十族皆能降墨敕授官號斜封及姚元崇宋璟輔  
政白罷斜封官數千員元崇等罷去太平公主盡奏復之澤詣闕上疏曰臣聞藥不毒不可以蠲疾詞不  
切不可以補過故習甘旨者非攝養之方邇諛佞者非治安之宜臣竊見神龍以來紀綱大壞內寵專命  
外壁制權因貴憑勢賣官鬻爵妃主之門同商賈然舉選之署若閭閻屠販者由邪忝官廢黜者因姦  
冒進天下溷亂幾危社稷賴陛下聰明神武拯溺舉墜耳目所親豈可忘鑒誠哉且斜封官者皆僕妾私  
謁迷謬先帝豈盡先帝意邪陛下卽位之初用元崇等計悉以停廢今又收用之若斜封之人不可棄邪  
韋月將燕欽融不應襲贈李多祚鄭克義不容盪雪也陛下何不能忍於此而能忍於彼使善惡混并反  
覆相攻道人以非勸人以僻今天下咸稱太平公主與胡僧慧範以此誤陛下故語曰姚宋爲相邪不如

正太平用事正不如邪臣恐流近致遠積小爲大累微成高勿謂何傷其禍將長勿謂何害其禍將大又  
言尚醫奉御彭君慶以巫覡小伎超授三品奈何輕用名器加非其人臣聞賞一人而千萬人悅者賞之  
罰一人而千萬人勸者罰之惟陛下裁察疏入不報澤入調會有詔選者得言事乃上書曰頃者韋氏盡  
亂姦臣同惡政以賄成官以寵進言正者獲戾行殊者見疑海內寒心人用不保陛下神聖勇智安宗社  
於已危振黎苗之將溺乃今蠲煩省徭法明德舉萬邦愷樂室家胥歡詩曰靡不有初鮮克有終惟陛下  
慎厥初修其終書曰惟德罔小萬邦惟慶惟不德罔大墜厥宗甚可懼也夫驕奢起於親貴綱紀亂於寵  
倖禁之於親貴則天下從制之於寵倖則天下畏親貴爲而不禁寵倖撓而不制故政不常令不一則姦  
詐起而暴亂生焉雖朝施暮戮而法不行矣陛下欲親與愛莫若安之福之夫寵祿之過罪之階也謂安  
之邪驕奢之淫危之梯也謂福之邪前事不忘後之師也陛下敷求俊哲使朝夕納誨其有逆于耳謬于  
心者無速罰姑求之道順于耳便于身者無急賞姑求之非道羞淫巧者拒之則淫巧息進忠讜者賞之  
則忠讜進臣聞生於富者驕生於貴者傲書曰罔淫於逸罔遊於樂今儲宮肇建王府復啟願采溫良博  
聞恭儉忠鯁者爲之僚友仍請東宮置拾遺補闕使朝夕講論出入侍從授以訓誥交修不逮臣又聞馳  
聘吹獵令人發狂今貴戚打毬擊鼓飛鷹奔犬狎比宵人盤游蕪澤書曰內作色荒外作禽荒惟陛下誕



降謀訓勸以學業示之以好惡陳之以成敗則長享福祿矣臣聞富不與驕期而驕自至驕不與罪期而罪自至罪不與死期而死自至頃韋庶人安樂公主武延秀等可謂貴且寵矣權侔人主威震天下然怙侈滅德神怒人棄豈不謂愛之太極富之太多乎殷鑒不遠在夏后之世今陛下何勸其皇祖謀訓之則乎陛下何懲其孝和寵任之失乎故愛而知其惡憎而知其善夫寵愛之心未有能免要去其太甚閑之以禮則可矣諸王公主駙馬陛下之所親愛也矯枉鑿戒宜在厥初使居寵思危觀過務善書曰三風十愆卿士有一于身家必喪邦君有一于身國必亡惟陛下黜奢僭驕怠進樸素行業以勗其非心臣聞常厥德保厥位厥德匪常九有以亡願陛下不作無益不啟私門不差刑不濫賞則惟德是輔惟人之懷天祿永終矣睿宗善之拜監察御史開元中轉殿中侍御史監嶺南選時市舶使右威衛中郎將周慶立造奇器以進澤上書曰不見可欲使心不亂是知見可欲而心必亂矣慶立雕製詭物造作奇器用浮巧爲珍玩以譎怪爲異寶乃治國之巨蠹明王所宜嚴罰者也昔露臺廉費明君不忍象箸非大忠臣憤歎慶立求媚聖意搖蕩上心陛下信而使之乎是宣淫於天下慶立矯而爲之乎是禁典之所無赦陛下新卽位固宜昭宣菲薄廣示節儉豈可以怪好示四方哉書奏玄宗稱善歷遷太子右庶子爲鄭州刺史未行卒贈兵部侍郎澤從祖範

範貞觀中爲侍御史時吳王恪好田獵範彈治之太宗曰權萬紀不能輔道恪罪當死範進曰房玄齡事陛下猶不能諫止畋獵豈宜獨罪萬紀帝怒拂衣起頃之召謂曰何廷折我範謝曰主聖則臣直陛下仁聖敢不盡愚帝乃解高宗時歷尚書右丞揚州大都督府長史

爽字子邵以父隋時使高麗卒焉故往迎喪號踊盡哀爲夷人所慕貞觀中累遷中書舍人外孫爲皇后遷中書侍郎進中書令皇后挾媚道覺罷爲吏部尚書后廢貶愛州刺史許敬宗等搆爽通宮掖謀行禍毒與褚遂良朋黨罪大逆遣使殺之沒其家其以上親並流嶺表爽房隸桂州爲奴婢神龍初乃復官爵子孫親屬緣坐者悉免開元初澤兄渙爲中書舍人上言臣從伯祖爽去顯慶三年與褚遂良等五門同被譴戮雖被原雪而子孫殆盡唯曾孫無忝客籍龔州陛下先天後詔書嘗任宰相並錄其後況臣之伯祖無辜被誅今稿窆未還後嗣僑處願許伯祖歸葬孤孫北遷於是詔無忝護爽柩歸鄉里官給喪事無忝後歷潭州都督

馮元常相州安陽人其先蓋長樂信都著姓曾祖子琮北齊右僕射叔祖慈明有文辭仕隋爲內史舍人奉詔討李密爲密將所縛身數創密厚禮之情謂曰東都危感我欲率四方賢豪建功業幸公同之慈明曰公家事先帝名在王室乃挾玄感舉兵亡命至今復圖反噬何邪密囚之俄爲翟讓所殺武德初贈吏



部尚書諡壯武元常舉明經及第調浚儀尉高宗時擢累監察御史劍南道巡察使興利除害蜀人甚賴  
歷尚書左丞嘗密諫帝中宮權重宜少抑帝雖置其計而內然之由是爲武后所惡元常在職修舉識鑒  
澄遠帝委遇特厚帝不豫詔平章百司奏事武后擅朝嵩陽令樊文進瑞石后暴石朝堂示百官元常奏  
石妄僞不可以示羣臣后怒出爲隴州刺史會天下岳牧集乾陵后不欲元常得會故道徙眉州刺史劍  
南有光火盜夜掠人晝伏山谷元常喻以恩信約悔過自新賊相率脫甲面縛賊平轉廣州都督詔便驛  
赴官安南莫領李嗣仙殺都護劉延祐劫州縣詔元常討之率士卒航海馳檄先示禍福賊黨多降元常  
縱兵斬首惡而還雖有功猶以拂旨見怨不錄功凡三徙終不得至京師卒爲酷吏周興所陷追赴都下  
獄死元常閨門雍睦有禮法雖小功喪不御私室神龍中旌其家大署曰忠臣之門天下高其節凡名族  
皆願通婚

從弟元淑及后時歷清漳浚儀始平三縣令右善去惡人稱爲神明與奴僕日一食馬日一秣所至不挈  
妻子斥俸餘以給貧窮咸譏其近名元淑曰吾性也不爲苦中宗降璽書勞勉付狀史官元淑約潔過於  
元常然剛直不及也終祠部郎中

蔣欽緒萊州膠水人頗工文辭擢進士第累遷太常博士中宗始親郊國子祭酒祝欽明建言皇后應亞

獻欲以媚韋氏天子疑之詔禮官議衆曲意阿循欽緒獨抗言不可諸儒壯其節歷吏部員外郎始韓琬  
爲高郵主簿使京師自負其才有不遇之言題客舍它日欽緒見之笑曰是子歎後時邪久之琬舉賢良  
方正欽緒擢其文異等因謂曰朋友之過免未琬曰今日乃見君子之心其務薦引士類此欽緒精治道  
馭吏整嚴雖銖銖罪不貸出爲華州長史蕭至忠自晉州被召過欽緒欽緒本姻家因戒曰以君才不患  
不見用患非分而求耳至忠竟及禍開元十三年以御史中丞錄河南囚宣慰百姓振窮乏徙吏部侍郎  
歷汴魏二州刺史卒性孤潔自守唯與賈會郭利貞相友云

子沈亦專潔博學少有名以孝廉授洛陽尉遷監察御史與兄演洛弟清俱爲才吏有名天寶間始河南  
尹韓朝宗裴迥嘗委訊覆檢旬而處事平剖斷精允羣僚莫能望也乾元中歷陸渾蓋屋咸陽高陵四縣  
令美政流行長老紀焉郭子儀軍出其縣敕麾下曰蔣沈賢令供億當有素得蔬飯足矣毋撓其清也遷  
長安令以刑部郎中兼侍御史領渭橋運出納使元載持政守道士類不遷沈以故滯郎位不得調常哀  
代相聞士議恨沈屈故擢御史中丞東都副留守再遷大理卿持法明審號稱職德宗出奉天沈奔行在  
爲賊所拘欲誘署僞職沈絕食不應命竄伏里中不復見京師平乃出擢右散騎常侍卒年七十四贈工

部尚書

乾隆四年校刊

唐書卷一百十一列傳

九



清舉明經中第調鞏丞東京留守李愷賢之表爲判官與愷同死安祿山亂贈禮部侍郎敬宗時錄其孫  
鄜爲伊闕令初清蒙難以秩卑不及諡大和初吏部郎中王高言之朝追諡曰忠

唐書卷一百十二

唐書卷一百十三

宋 端 明 殿 學 士 宋 祁 撰

列傳第三十八

唐張徐

唐臨字本德京兆長安人周內史瑾之孫其先自北海內徙武德初隱太子討王世充臨以策進說太子  
引直典書坊授右衛率府鎧曹參軍太子廢出爲萬泉丞有輕囚久繫方春農事興臨說令可且出囚使  
就畎畝不許臨曰有所疑丞執其罪令移疾臨悉縱歸與之約囚如期還再遷侍御史大夫韋挺責著位  
不肅明日挺越次與江夏王道宗語臨進曰王亂班道宗曰與大夫語何至爾臨曰大夫亦亂班挺失色  
衆皆悚伏俄持節按獄交州出冤繫三千人累遷大理卿高宗嘗錄囚臨占對無不盡帝喜曰爲國之要  
在用法刻則人殘寬則失有罪惟是折中以稱朕意他日復訊餘司斷者輒紛訴不已獨臨所訊無一言  
帝問故荅曰唐卿斷囚不冤所以絕意帝歎曰爲獄者固當若是乃自述其考曰形如死灰心若鐵石云  
永徽元年拜御史大夫蕭齡之嘗任廣州都督受賕當死詔羣臣議請論如法詔戮于朝堂臨建言羣臣  
不知天子所以議之之意在律有八王族戮于隱議親也刑不上大夫議貴也今齡之貪穢狼戾死有餘



咎陛下以異於他囚故議之有司又令入死非堯舜所以用刑者不可爲後世法帝然之齡之齊高帝五世孫由是免死臨累遷吏部尙書初來濟謫台州李義府謫普州臨奏許禕爲江南巡察使張倫劍南巡察使禕與濟善而倫與義府有隙武后常右義府察知之謂臨遣所私督其過坐免官起爲潮州刺史卒年六十臨儉薄寡欲不好治第宅性旁通事務掩人過見妻子必正衣冠

兄皎武德初爲秦王府記室從王征討掌書檄貞觀中官吏部侍郎先是選集四時補擬不爲限皎請以冬初集盡季春止後遂爲法終益州長史贈太常卿子之奇給事中坐章懷太子屬徙邊後除括蒼令與徐敬業起兵誅臨孫紹

紹神龍時爲太常博士遷左臺侍御史度支員外郎常兼博士韋庶人請妃公主命婦以上葬給鼓吹詔可紹言鼓吹本軍容黃帝戰涿鹿以爲警衛故曲有靈夔吼鵬鸞爭石墜崖壯士怒之類惟功臣詔葬得兼用之男子有四方功所以加寵雖郊祀天地不參設容得接闔閭哉在今五品官昏葬無給鼓吹者唯京官五品則假四品蓋班秩在夫若子請置前詔用舊典不省中宗始郊國子祭酒祝欽明等知韋后能制天子欲迎諂之卽奏以皇后亞獻安樂公主終獻又四時及列帝誕日遣使者詣陵如事生紹以爲非禮引正誼固爭帝又詔武氏陵及諸武墓皆置守戶紹謂吳順二陵守戶五百與昭陵同在令先世帝王

陵戶二十今雖崇奉外家宜準附常典又親王墓戶十梁魯乃追贈不可踰眞王褒德衛卒至踰宗廟不可明甚請罷之又言比羣臣務厚葬以備人象驂眩耀相矜下逮衆庶流宕成俗願按令切敕裁損凡明器不許列衢路惟陳墓所昏家盛設障車擁道爲戲樂邀賞損貲動萬計甚傷化素禮不可示天下事雖不從議者美歎睿宗卽位數言政損益再遷給事中兼太常少卿先天二年玄宗講武驪山紹以典儀坐失軍容當斬帝怒甚執纛下左右猶冀少貸金吾將軍李邕遽傳詔斬之時深咎邕帝亦悔俄詔罷邕官擴死于家

張文瓘字稚圭貝州武城人隋大業末徙家魏州之昌樂幼孤事母兄以孝友聞貞觀初第明經補并州參軍時李勣爲長史嘗歎曰稚圭今之管蕭吾所不及勣入朝文瓘與屬僚二人皆餞勣贈二人以佩刀玉帶而不及文瓘文瓘以疑請勣曰子無爲嫌若某允豫少決故贈以刀欲其果於斷某放誕少檢故贈以帶俾其守約束若子才無施不可焉用贈因極推引再遷水部員外郎時兄文琮爲戶部侍郎於制兄弟不並臺閣出爲雲陽令累授東西臺舍人參知政事乾封二年遷東臺侍郎同東西臺三品遂與勣同爲宰相俄知左史事時高宗造蓬萊上陽合璧等宮復征討四夷京師養廐馬萬匹帑府寢虛文瓘諫曰王者養民逸則富以康勞則怨以叛秦漢廣事四夷造宮室至二世土崩武帝末年戶口減半夫制治於



未亂保邦於未危人罔常懷懷于有仁臣願撫之無使勞而生怨隋監未遠不可不察帝善其言賜繪錦百段爲減廐馬數千改黃門侍郎兼太子右庶子又兼大理卿不旬日斷疑獄四百抵罪者無怨言嘗有小疾囚相與齋禱願亟視事時以執法平恕方戴胄後拜侍中兼太子賓客諸囚聞其遷皆垂泣其得人心如此性嚴正未嘗回容諸司奏議悉心糾駁故帝委之或時移疾他宰相奏事帝必問與文瓘議未若不者曰往共籌之或曰已議卽皆報可新羅叛帝將出兵討之時文瓘病臥家自力請見曰吐蕃盜邊兵屯境未解新羅復叛議者欲出師二虜俱事臣恐人不堪弊請息兵修德以懷異俗詔可初同列以堂饌豐餘欲少損文瓘曰此天子所以重樞務待賢才也吾等若不任職當自引避不宜節減以自取名衆乃止卒年七十三贈幽州都督諡曰懿以嘗事孝敬皇帝詔陪葬恭陵四子潛爲魏州刺史沛州刺史治衛尉卿涉殿中監父子皆至三品時謂萬石張家韋溫誅涉爲亂兵所殺

文瓘好自寫書筆不釋手子弟諫止曰吾好此不爲倦貞觀中爲治書侍御史遷亳州刺史永徽初獻文皇帝頌優制褒美拜戶部侍郎坐房遺愛從母弟出爲建州刺史州尙淫祀不立社稷文瓘下教曰春秋二社本于農今此州廢不立尙何觀比歲田畝卒荒或未之思乎神在于敬可以致福於是始建祀場民悅從之卒于官子錫久視初爲鳳閣侍郎同鳳閣鸞臺平章事代其甥李嶠爲宰相請還廬陵王不爲張

易之所右與鄭杲俱知選坐洩禁中語又獻謝鉅萬時蘇味道亦坐事同被訊繫鳳閣俄徙司刑三品院錫按轡導道神氣不懼日膳豐鮮無損貶味道徒步赴建席地菜食武后聞之釋味道將斬錫旣而流循州神龍中累遷工部尙書兼修國史東都留守韋后臨朝詔同中書門下三品旬日出爲絳州刺史累封平原郡公卒文瓘從父弟文收終太子率更令善音律著新樂書十餘篇

徐有功名弘敏避孝敬皇帝諱以字行國子博士文遠孫也累明經累補蒲州司法參軍襲封東莞縣男爲政仁不忍杖罰民服其恩更相約曰犯徐參軍杖者必斥之詎代不辱一人累遷司刑丞時武后僭位畏唐大臣謀已於是周興來俊臣巨神勣王弘義等揣識后指置總監牧院諸獄捕將相俾相鈎逮掩擿護送楚掠凝慘又汗引天下豪傑馳使者卽按一切以反論吏爭以周內窮詆相高后輒勸以官賞於是以急變相告言者無虛日朝野震恐莫敢正言獨有功數犯顏爭枉直后厲語折抑有功爭益牢時博州刺史琅邪王冲責息錢于貴鄉遣家奴督斂與尉顏餘慶相聞知奴自市弓矢還會冲坐逆誅魏州人告餘慶豫冲謀后令俊臣鞠治以反狀聞有司議餘慶更永昌赦法當流侍御史魏元忠謂餘慶爲冲督償通書合謀明甚非曰支黨請殊死籍其家詔可有功曰永昌赦令與虺貞同惡魁首已伏誅支黨未發者原之書曰殲厥渠魁律以造意爲首尋赦已伏誅則魁首無遺餘慶赦後被言是謂支黨今以支爲首是



以生入死赦而復罪不如勿赦生而復殺不如勿生竊謂朝廷不當爾后怒曰何謂魁首荅曰魁者大帥首者元謀后曰餘慶安得不爲魁首荅曰若魁首者虺貞是已既已伏誅餘慶今方論罪非支黨何后意解乃曰公更思之遂免死當此時左右及衛仗在廷陛者數百人皆縮項不敢息而有功氣定言詳巍然不撓有韓紀孝者受徐敬業僞官前已物故推事使顧仲瑑籍其家詔已報可有功追議曰律謀反者斬身亡卽無斬法無斬法則不得相緣所緣之人亡則所因之罪減詔從之皆以更赦免如此護宥者數十百姓累轉秋官郎中鳳閣侍郎任知古冬官尚書裴行本等七人被誣當死后謂宰相曰古人以殺止殺我今以恩止殺就羣公丐知古等賜以再生可乎俊臣張知默固請如法后不許俊臣獨引行本更驗前罪有功奏曰俊臣違陛下再生之賜不可以示信於是悉免死道州刺史李仁襄兄弟爲人誣構有功爭不能得秋官侍郎周興劾之曰漢法附下罔上者斬面欺者亦斬在古析言破律者殺有功故出反囚罪當誅請按之后不許猶坐免官俄起爲左肅政臺侍御史辭曰臣聞鹿走山林而命繫庖廚者勢固自然陛下以法官用臣臣守正行法必坐此死矣后固授之天下聞有功復進酒然相賀時有詔公坐流私坐徒以上會赦免踰百日不首者復論有功奏曰陛下寬殊死罪已發者原之是通改過之心自新之路故律告赦前事以其罪坐之若無告言所犯終不自發如告言赦前事則與律乖今赦前之罪不自言者還

以法論恩雖布天下而一罪不能貸臣竊爲陛下不取后更詔五品以上議可又上疏曰天下員有定比選者日多選曹諉囑公行讒謗滿路唐季人多逆節鞫訊結斷刑慘獄嚴革命歲久其流弗改事表生情法外構理而刻薄吏驅扇成姦雖朝堂進表列匭內牒叫闐弗聽叩鼓弗聞使申其冤正增其枉誠令天官銓注有所不本法司推斷舞法深詆三司理甄受所上章擁塞不白者皆許臣按驗劾發奪祿貶勞不越月踰時可致刑措后納之竇孝謹妻龐爲其奴怖以妖崇教爲夜解因告以厭詛給事中薛季昶鞠之龐當死子希城訟冤有功明其枉季昶劾有功黨惡逆當棄市有功方視事令史泣以告有功曰豈獨吾死而諸人長不死耶安步去后召詰曰公比斷獄多失出何耶對曰失出臣小過好生陛下大德后默然龐得減死有功免爲民起拜右司郎中轉司刑少卿與皇甫文備同按獄誣有功縱逆黨久之文備坐事下獄有功出之或曰彼嘗陷君於死今生之何也對曰爾所言者私忿我所守者公法不可以私害公嘗謂所親曰大理人命所繫不可阿旨詭辭以求苟免故有功爲獄常持平守正以執據冤罔凡三坐大辟將死泰然不憂赦之亦不喜后以此重之所全活甚衆酷吏爲少衰然疾之如讎矣改司僕少卿卒年六十八贈司刑卿中宗卽位加贈越州都督遣使就第弔祭賜物百段授一子官開元初竇希城等請以己官讓有功子倫以報舊德由是自大理司直遷恭陵令會昌中追諡忠正初鹿城主簿潘好禮墓有功爲



人論之曰昔稱張釋之爲廷尉天下無冤人今有功斷獄亦天下無冤人然釋之當漢文帝時中外無事守法而已有功居革命之際周興來俊臣等掩義隱賊崇飾惡言以誣盛德有功守死明道身殞殆者數矣此其賢於釋之明甚或稱有功仁恕過漢于張起居舍人盧若虛曰徐公當雷霆之震而能全仁恕雖千載未見其比五世孫商

贊曰徐有功不以唐周貳其心惟一於法身蹈死以救人之死故能處猜后酷吏之間以恕自將內挫虐罔不使天下殘於燦可謂仁人也哉議者謂過漢于張渠不信夫

商字義聲或字秋卿客新鄭再世因爲新鄭人幼隱中條山擢進士第大中時擢累尙書左丞宣宗詔爲巡邊使使有指拜河中節度使突厥殘種保特峨山以千帳度河自歸詔商綏定商表處山東寬鄉置備征軍凡千人襍紙爲鎧勁矢不能洞徙節山南東道襄多山棚爲票賊商取材卒爲捕盜將別爲屯營寇所發輒迹捕必得遂爲精兵江西都將反韋宙乘傳抵山南發兵商命部將韓季友以捕盜營士往賊平宙表留季友所部爲綱紀咸通初以刑部尙書爲諸道鹽鐵轉運使封東莞縣于四年進同中書門下平章事出爲荆南節度使累進太子太保卒子彥若事僖宗爲中書舍人昭宗立再用爲御史中丞張溶師敗太原以彥若爲戶部侍郎同中書門下平章事俄代李茂貞爲鳳翔節度使不得入還爲御史大夫

乾寧初復當國進位太保齊國公崔胤專政以彥若位己右不悅以平章事爲清海軍節度使卒於鎮而行軍司馬劉隱因主留務方時多難彥若最見信于帝有以事自陳者帝曰汝當問彥若其所倚任如此



唐書卷一百十三

唐書卷一百十三考證

徐有功傳起拜右司郎中○舊書作左司

卒年六十八○舊書作六十二

加贈越州都督○舊書作越州刺史



唐書卷一百十四

宋 端 明 殿 學 士 宋 祁 撰

列傳第三十九

崔徐蘇豆盧

崔融字安成齊州全節人擢八科高第累補宮門丞崇文館學士中宗為太子時遷侍讀典東朝章疏武  
 后幸嵩高見融銘啟母碣歎美之及已封即命銘朝觀碑授著作佐郎遷右史進鳳閣舍人時有司議關  
 市行人盡征之融上疏謂周官九賦其七曰關市以市多淫巧而關通未游欲止抑之故加稅耳然唯歛  
 工商而不及往來今一切通取則事不師古且四人異業舊矣復動而搖之市者兼受善惡也若甚則細  
 人無所容細人無所容久必為亂天下之關必險道市必要津豪宗惡少在焉聞一旦變法或致騷動恐  
 南走蠻北走狄今江津河濟列鋪率稅檢覆稽留加主司儻略邀丐則商人廢業魏晉齊隋所不行況陛  
 下乎如有師興費廣雖倍算商旅加斂齊人可也后納之張易之兄弟頗延文學士融與李嶠蘇味道麟  
 臺少監王紹宗降節佞附易之誅貶袁州刺史召授國子司業與修武后實錄勞封清河縣子融為文華  
 婉當時未有輩者朝廷大筆多手敕委之其洛出寶圖頌尤工撰武后哀冊最高麗絕筆而死時謂思苦



神竭云年五十四贈衛州刺史諡曰文膳部員外郎杜審言爲融所獎引爲服總麻六子其聞者禹錫翹禹錫開元中中書舍人贈定州刺史諡曰貞翹禮部尚書贈荊州大都督諡曰成孫巨右補闕亦有文曾孫從

從字子父少孤貧與兄能偕隱太原山中會歲饑拾橡實以飯講學不廢擢進士第從山南嚴震府爲推官以母喪免兄弟廬墓手藝松柏喪闋不應辟命久之韋臯引爲西山運務使奏遷判官攝守邛州前刺史有以盜繫獄辭已具從疑其寃縱不治俄得眞盜臯卒劉闢反欲并東川從以書諭止闢闢怒從乃募兵嬰城守關方悉兵拒高崇文戰而敗從完州自如盧坦表宣州副使入爲殿中侍御史遷吏部員外郎異時吏給選者成牒以先後丐賂從一限出之後遂爲法裴度爲御史中丞奏以右司郎中知雜事度已相代爲中丞所彈治不屈權幸事繫臺閣而付仗內者必請還有司薦引御史務取質重廉退者李儼以寵得京兆尹爲莊憲太后山陵橋道使務以減末徭費爲功至不治道轎車留渭橋久不得進從三劾之無少貸俄授陝虢觀察使遷尚書右丞王承宗請削德棣而遣子入侍也憲宗選堪使者以命從議者謂承宗狠譎非單使可屈次魏田弘正請以五百騎從辭之惟童騎十數疾趨鎮集軍士毬場宣詔爲陳逆順大節禍福之効音辭暢厲士感動承宗自失貌愈恭至泣下卽按二州戶口符印上之還爲山南西道

節度使帝欲遂相監軍使揣知爲用事者求金從不肯答用是不得相長慶初繇尚書左丞領鄜坊節度屬部多神策屯軍數亂法驕橫吏不能制從一繩以法下皆重足畏之党項互市羊馬類先遣帥守從獨不取而厚慰待之羌不敢盜境寶曆初爲東都留守故事留司官入宮城門列晨衙見留守吏誕傲久廢至是復行召拜戶部尚書宰相李宗閔以從裴度李德裕所善內不喜從求致仕除太子賓客分司東都告滿百日去於是衆譁語不平宗閔懼復授檢校尚書左僕射淮南節度副大使知節度事揚州凡交易貨產奴婢有貫率錢畜羊有口算又買麴牟其贏以佐用度從皆蠲除之官吏俸帛常加倍以給獨節度使則否從皆與之同大和六年卒年七十二下有割股肉以祭者贈司空諡曰貞從爲人嚴偉立朝稜稜有風望不喜交權利忠厚而讓階品當立門戟終不請位方鎮內無聲妓娛玩士大夫賢之

能字子才朱泚之亂渾瑊以朔方軍戰武功引佐幕府進累侍御史河東鄭儋表爲判官累遷黔中觀察使以讒坐貶從爲中丞奏以自代繇將作監授嶺南節度使與從皆秉節居鎮世傳爲榮卒年六十八贈禮部尚書從子慎由安潛能子彥會

慎由字敬止聰警彊記資端厚有父風采繇進士第擢賢良方正異等鄆滑高鉉辟府判官入爲右拾遺進翰林學士授湖南觀察使召還由刑部侍郎領浙西入遷戶部侍郎判戶部始慎由苦目疾不得視醫



爲治刮適愈而召俄進工部尚書同中書門下平章事與蕭鄴有隙鄴輔政引劉瑑而出慎由爲東川節度使初宣宗餌長年藥病渴且中躁而國嗣未立帝對宰相欲肆赦患無其端慎由曰太子天下本若立之赦爲有名帝惡之不荅鄴等乘是譖去之時大中十二年也咸通初徙華州刺史改河中節度使以吏部尚書請老授太子太保分司東都卒贈司空諡曰貞子胤別傳

安潛字進之進士擢第咸通中歷江西觀察忠武節度使乾符初王仙芝寇河南安潛募人增障繕械不以力費仰朝廷首請會兵討捕號令精明賊畏之不犯陳許境使大將張自勉將兵七千援宋州時宋威屯曹州而官軍數却賊圍宋益急自勉收南月城斬賊二千級仙芝夜解去宰相鄭畋建言請以陳許兵三千隸宋威而威忌自勉乞盡得安潛軍使自勉隸麾下畋謂威有疑忿必殺自勉奏言今以兵悉畀威是自勉以功受辱安潛抗賊有功乃取銳兵付威後有緩急何以戰是勞不蒙賞無以示天下詔止以四千付威餘還自勉俄代高駢領西川節度使倚駢爲姦利者安潛皆誅之數更除繆政於是盜賊衰蜀民以安宰相盧攜素厚駢乃誣以罪罷爲太子賓客分司東都僖宗避賊劍南召爲太子少師王鐸任都統表以自副鐸解兵安潛復爲少師東都留守青州王敬武卒詔拜平盧節度使檢校太師兼侍中會敬武子師範專地不得入而還後遷太子太傅卒贈太子太師諡貞孝安潛於吏事尤長雖位將相關具獄未嘗不身聽之

彥曾咸通初繇太僕卿爲徐州觀察使曉律令然卞急爲政剛猛徐軍素驕而彥會長于撫民短治軍士多怨之初蠻寇五管陷交趾詔節度使孟球募兵三千往屯以八百人戍桂林舊制三年一更至期請代而彥曾親吏尹戡徐行儉貪不恤士乃議稟賜之請無發兵復留屯一年戍者怒殺都將王仲甫脅糧科判官龐勛爲將取庫兵剽湘衡虜丁壯合衆千餘北還自浙西趨淮南達泗口所過先遣俳兒弄木偶伺人情以防邀遏彥曾命牙將田厚簡慰勞而用都虞候元密伏甲任山館擊賊勛遣吏給言士思歸不敢遏請至府解甲自歸彥曾斬其吏勛陷宿州發廩錢募兵亡命者從亂如歸船千艘與騎夾岸諫而進彥曾料丁男乘城或勸率衆奔兗州彥曾曰我方帥也奉命守此惟有死爾斬議者一人號于衆俄而勛傳城城中大霧如墮彥曾悉誅賊家屬勛衆四面超墻入囚彥曾大彭館有曹君長者說勛曰貴者不並處今朝廷未以留後命公蓋觀察使存爾勛乃殺彥曾於寢自監軍使逮官屬皆死始彥曾治第鄆州引水灌沼水十步忽化爲血署張佛筵液蜜爲人一昔鼠齧皆斷首徐有子亭下瀦水爲沱彥曾導清河灌之鑿石龍首注溜蔽以屋徐人謂屋覆龍於文爲臚清河崔望也爲吞噬云贈刑部尚書乾符中錄其子祐之爲滎陽尉徐吏有路審中者彥曾知其能頗任之既遇害賂守卒斂藏其尸張玄稔攻徐州審中率死



士應官軍開南白門官兵入因得破助後位嵐州刺史鄭畋謂審中節貫神明請擢爲右羽林將軍詔可有許鐸者罷武城令客於徐勣齊以官不從彥曾官屬被囚鐸潛饋資糧及死爲之瘞匿免其子弟賊平乃皆歸其喪詔拜石首令賜銀緋僚官焦璐温廷皓李悅<sub>謹</sub>柳秦盧崇嗣韋廷範贈官有差錄其子官之

徐彥伯兗州瑕丘人<sub>名</sub>洪以字顯七歲能爲文結廬太行山下薛元超安撫河北表其賢對策高第調承壽尉<sub>補</sub>州司兵叅軍時司戶韋暹善判司李亘工書而彥伯屬辭時稱河東三絕遷職方員外郎奉迎中宗房州進給事中武后選三教珠英取文辭士皆天下選而彥伯李嶠居首選宗正卿出爲齊州刺史帝復位改太常少卿以修武后實錄勞封高平縣子爲衛州刺史政善狀璽書嘉勞移蒲州以近畿會郊祭上南郊賦一篇辭致典<sub>編</sub>擢修文館學士工部侍郎歷太子賓客以疾乞骸骨許之開元二年卒彥伯事真嫂謹撫諸侄同己子秉筆累朝後來翕然慕倣晚爲文稍<sub>疆</sub>澀然當時不及也始武后時大獄興王公卿士以語言爲酷吏所引死徙不可計彥伯著樞機論以謂言者德之柄行之主志之端身之文也君子之樞機動則物應得失之見也可以濟身亦以覆身否泰榮辱一繫之能審思而應精慮而動擇其交以後談則悔吝何由而生怨惡何由而至如此乃可以言也以爲戒世云

蘇味道趙州樂城人九歲能屬辭與里人李嶠俱以文翰顯時號蘇李建冠州舉進士中第累調咸陽尉吏部侍郎裴行儉才之會征突厥引管書記裴居道爲左金吾衛將軍情味道作章攬筆而具閑徹清密當時盛傳延載中以鳳閣舍人檢校侍郎同鳳閣鸞臺平章事歲餘爲真證聖元年與張錫俱坐法繫司刑獄錫雖下吏氣象自如味道獨席地飯蔬爲危懼可憐者武后開放錫嶺南纔降味道集州刺史召爲天官侍郎聖曆初復以鳳閣侍郎同鳳閣鸞臺三品更葬其親有詔州縣治喪味道因役庸過程遂侵毀鄉人墓田蕭至忠劾之貶坊州刺史遷益州大都督府長史張易之敗坐黨附貶眉州刺史復還益州長史未就道卒年五十八贈冀州刺史味道練臺閣故事善占奏然其爲相特具位未嘗有所發明脂韋自營而已常謂人曰決事不欲明白誤則有悔摸稜持兩端可也故世號摸稜手性友愛其弟味元味元嘗請託不遂因慢折之味道怡然不屑所論著行于時

豆盧欽望雍州萬年人祖寬隋文帝外孫爲梁泉令高祖定關中與郡守蕭瑀率豪姓進款擢累殿中監子懷讓尙萬春公主詔寬用魏太和詔去豆姓著盧貞觀中遷禮部尙書左衛大將軍芮國公卒贈特進并州都督陪葬昭陵諡曰定復其舊姓欽望累官越州都督司賓卿長壽二年拜內史封芮國公李昭德被罪有司劾奏欽望阿順昭德不執正附臣罔君貶趙州刺史入爲司府卿遷秋官尙書中宗還東宮拜



太子宮尹進文昌右相同鳳閣鸞臺三品罷爲太子賓客帝復位擢尙書左僕射平章軍國重事欽望居宰相積十餘年方易之三思等怙勢宣蒸窺間王室戮忠戚缺冀非常不能有所裁抑獨謹身諄諄自全進開府儀同三司檢校安國相王府長史卒年八十贈司空并州大都督陪葬乾陵諡曰元武后時宰相又有史務滋崔元綜周允元略可述者附左方

史務滋宣州溧陽人累吏勞遷司賓卿進拜納言后革命詔務滋等十人分行天下雅州刺史劉行實兄弟爲侍御史來子詢譴其反詔務滋與來俊臣雜治俊臣言務滋與囚善掩其反狀后命俊臣并治遂自殺

崔元綜鄭州新鄭人祖君肅武德中爲黃門侍郎鴻臚卿元綜天授初以鸞臺侍郎同鳳閣鸞臺平章事性恪慎坐政事堂束帶終日不休優尤護細槩外若謹厚而中刻薄每受制鞠獄必澡垢索疵不入死不肯止人畏鄙之未幾坐事流振州摺紳爲慶會赦還除監察御史遷蒲州刺史致仕善攝生年九十餘卒周允元字汝良豫州安城人自右肅政御史中丞拜檢校鳳閣侍郎同鳳閣鸞臺平章事武后宴宰相詔陳書傳善言允元曰恥其君不如堯舜武三思劾奏語指斥后曰聞其言足以誠安得爲過卒贈貝州刺史



唐書卷一百十四

唐書卷一百十四考證

崔融傳六子其聞者禹錫翹○舊書融二子

融曾孫從以母喪免兄弟廬墓○舊書以父憂免兄弟廬于父墓

周允元傳自右肅政御史中丞拜檢校鳳閣侍郎○舊書累轉左肅政臺御史中丞



唐書卷一百十四考證

唐書卷一百十五

宋 端 明 殿 學 士 宋 祁 撰

列傳第四十

狄 郝 朱

狄仁傑字懷英并州太原人爲兒時門人有被害者吏就詰衆爭辨對仁傑誦書不置吏讓之答曰黃卷  
 中方與聖賢對何暇偶俗吏語耶舉明經調汴州叅軍爲吏誣訴黜陟使閻立本召訊異其才謝曰仲尼  
 稱觀過知仁君可謂滄海遺珠矣薦授并州法曹叅軍親在河陽仁傑登太行山反顧見白雲孤飛謂左  
 右曰吾親舍其下瞻悵久之雲移乃得去同府叅軍鄭崇質母老且疾當使絕域仁傑謂曰君可貽親萬  
 里憂乎詣長史蘭仁基請代行仁基咨美其誼時方與司馬李孝廉不平相語曰吾等可少愧矣則相待  
 如初每曰狄公之賢北斗以南一人而已稍遷大理丞歲中斷久獄萬七千人時稱平恕左威衛大將軍  
 權善才右監門中郎將范懷義坐誤斧昭陵柏罪當免高宗詔誅之仁傑奏不應死帝怒曰是使我爲不  
 孝子必殺之仁傑曰漢有盜高廟玉環文帝欲當之族張釋之廷諍曰假令取長陵一抔土何以加其法  
 於是罪止棄市陛下之法在象魏固有差等犯不至死而致之死何哉今誤伐一柏殺二臣後世謂陛下



爲何如主帝意解遂免死數日授侍御史左司郎中王本立怙寵自肆仁傑劾奏其惡有詔原之仁傑曰朝廷借乏賢如本立者不尠陛下惜有罪虧成法奈何臣願先斥爲羣臣戒本立抵罪繇是朝廷肅然使岐州亡卒數百剽行人道不通官捕繫盜黨窮訊而餘曹紛紛不能制仁傑曰是其計窮且爲患乃明開首原格出繫者稟而縱之使相曉皆自縛歸帝嘆其達權宜遷度支郎中帝幸汾陽宮爲知頓使并州長史李冲玄以道出妬女祠俗言盛服過者致風雷之變更發卒數萬改馳道仁傑曰天子之行風伯清塵雨師灑道何妬女避邪止其役帝壯之曰眞丈夫哉出爲靈州刺史撫和戎落得其歡心郡人勒碑以頌入拜冬官侍郎持節江南巡撫使吳楚俗多淫祠仁傑一禁止凡毀千七百房止留夏禹吳太伯季札伍員四祠而已轉文昌右丞出豫州刺史時越王兵敗支黨餘二千人論死仁傑釋其械密疏曰臣欲有所陳似爲逆人申理不言且累陛下欽恤意表成復毀自不能定然此皆非木惡詿誤至此有詔悉謫戍邊囚出靈州父老迎勞曰狄使君活汝邪出相與哭碑下囚齋三日乃去至流所亦爲立碑初宰相張光輔討越王軍中恃功多暴索仁傑拒之光輔怒曰州將輕元帥邪仁傑曰亂河南者一越王公董士三十萬以平亂縱使暴橫使無辜之人咸墜塗炭是一越王死百越王生也且王師之至民歸順以萬計自隄而下四面成蹊柰何縱邀賞之人殺降以爲功冤痛徹天如得上方斬馬劍加君頸雖死不恨光輔還奏仁

傑不遜左授復州刺史徙洛州司馬天授二年以地官侍郎同鳳閣鸞臺平章事武后謂曰卿在汝南有善政然有譖卿者欲知之乎謝曰陛下以爲過臣當改之以爲無過臣之幸也譖者乃不願知后嘆其長者時太學生謁急后亦報可仁傑曰人君惟生殺柄不以假人至簿書期會宜責有司尙書省決事左右丞不旬杖左右丞相不判徒況天子乎學徒取告丞簿職耳若爲報可則胥子數千凡幾詔耶爲定令示之而已后納其言會爲來俊臣所構捕送制獄于時訊反者一問卽承聽滅死俊臣引仁傑對答曰有周革命我乃唐臣反固實俊臣乃挺繫其屬王德壽以情謂曰我意求少遷公爲我引楊執柔爲黨公且免死仁傑歎曰皇天后土使仁傑爲此乎卽以首觸柱血流沫面德壽懼而謝守者寢弛卽丐筆書帛置楮衣中好謂吏曰方暑請付家徹絮仁傑子光遠得書上變后遣使案視俊臣命仁傑冠帶見使者私令德壽作謝死表附使以聞后乃召見仁傑謂曰承反何耶對曰不承反死笞掠矣示其表曰無之后知代署因免死武承嗣屢請誅之后曰命已行不可返時同被誣者鳳閣侍郎任知古等七族悉得貸御史霍獻可以首叩殿陛苦爭欲必殺仁傑等乃貶仁傑鼓澤令邑人爲置生祠萬歲通天中契丹陷冀州河北震動擢仁傑爲魏州刺史前刺史懼賊至驅民保城修守具仁傑至曰賊在遠何自疲民萬一虜來吾自辦之何預若輩悉縱就田虜聞亦引去民愛仰之復爲立祠俄轉幽州都督賜紫袍龜帶后自製金字十



二於袍以旌其忠召拜鸞臺侍郎復同鳳閣鸞臺平章事時發兵戍疏勒四鎮百姓怨苦仁傑諫曰天生四夷皆在先王封域之外東距滄海西隔流沙北橫大漠南阻五嶺天所以限中外也自典籍所紀聲教所暨三代不能至者國家既已兼之詩人矜薄伐於太原化行於江漢前代之遐裔而我之域中過夏商達矣今乃用武荒外邀功絕域竭府庫之實以爭礪礪不毛之地得其人不足以增賦獲其土不可以耕織苟求冠帶遠夷不務固本安人此秦皇漢武之所行也傳曰與覆車同軌者未嘗安此言雖小可以喻大臣伏見國家師旅歲出調度之費徃以邊廣右戍四鎮左屯安東杼軸空匱轉輸不絕行役既久怨曠者多上不是恤則政不行政不行則害氣作害氣作則蟲螟生水旱起矣方今關東孳饑蜀漢流亡江淮而南賦斂不息人不復本則相率爲盜本根一搖憂患非淺所以然者皆貪功方外耗竭中國也昔漢元帝納賈捐之謀而罷珠崖宣帝用魏相之策而棄車師田貞觀中克平九姓册拜李思摩爲可汗使統諸部夷狄叛則伐降則撫得推亡固存之義無遠戍勞人之役今阿史那斛瑟羅皆陰山貴種代雄沙漠若委之四鎮以諸蕃建爲可汗遣禦寇患則國家有繼絕之美無轉輸之苦損四鎮肥中國罷安東實遼西省軍費於遠方并甲兵於要塞恒代之鎮重而邊州之備豐矣且王者外寧容有內危陛下姑救邊兵謹守備以逸待勞則戰工力陪以主禦客則我得其便堅壁清野寇無所得自然深入有顛躓之慮淺

入無虜獲之益不數年二虜不討而服矣又請廢安東復高姓爲君長省江南轉饟以息民不見納張易之嘗從容問自安計仁傑曰惟勸迎廬陵王可以免禍會后欲以武三思爲太子以問宰相衆莫敢對仁傑曰臣觀天人未厭唐德比匈奴犯邊陛下使梁王三思募勇士於市踰月不及千人廬陵王代之不浹日輒五萬今欲繼統非廬陵王莫可后怒罷議久之召謂曰朕數夢雙陸不勝何也於是仁傑與王方慶俱在二人同辭對曰雙陸不勝無子也天其意者以儆陛下乎且太子天下本本一搖天下危矣文皇帝身蹈鋒鏑勤勞而有天下傳之子孫先帝寢疾詔陛下監國陛下掩神器而取之十有餘年又欲以三思爲後且姑姪與子母孰親陛下立廬陵王則千秋萬歲後常享宗廟三思立嗣不祔姑后感悟即日遣徐彥伯迎廬陵王於房州王至后匿王帳中召見仁傑語廬陵事仁傑敷請切至涕下不能止后乃使王出曰還竊太子仁傑降拜頓首曰太子歸未有知者人言紛紛何所信后然之更令太子舍龍門具禮迎還中外大悅初吉頊李昭德數請還太子而后意不回唯仁傑每以母子天性爲言后雖忤忍不能無感故卒復唐嗣尋拜納言兼右肅政御史大夫突厥入趙定殺掠甚衆詔仁傑爲河北道行軍元帥假以便宜突厥盡殺所得男女萬計由五回道去仁傑追不能逮更拜河北安撫大使時民多脅從於賊賊已去懼誅逃匿仁傑上疏曰議者以爲虜入寇始明人之逆順或迫脅或願從或受僞官或爲招慰誠以山東之



人重氣一往死不爲悔比緣軍興調發煩重傷破家產別屋賣田人不爲售又官吏侵漁州縣科役督趣鞭笞情危事迫不循禮義投跡犬羊以圖賒死此君子所愧而小人之常民猶水也壅則爲淵疏則爲川通塞隨流豈有常性昔董卓之亂神器播越卓已誅禽部曲無赦故事窮變生流毒京室比由恩不溥治失在機先今負罪之伍潛竄山澤赦之則出不赦則狂山東羣盜緣茲聚結故臣以爲邊鄙暫警不足憂中土不寧可爲憂也夫持大國者不可以小治事廣者不可以細分人主所務弗檢常法願曲赦河北一不問罪詔可還除內史后幸三陽宮王公皆從獨賜仁傑第一區眷禮卓異時無輩者是時李楷固駱務整討契丹克之獻俘含樞殿后大悅二人者本契丹李盡忠部將盡忠入寇楷固等數挫王師後降有司請論如法仁傑稱其驍勇可任若貸死必感恩納節可以責功至是凱施后舉酒屬仁傑賞其知人授楷固左玉鈐衛將軍燕國公賜姓武務整右武威衛將軍后將造浮屠大像度費數百萬官不能足更詔天下僧日施一錢助之仁傑諫曰工不役鬼必在役人物不天降終由地出不損百姓且將何求今邊陲未寧宜寬征鎮之徭省不急之務就令願作以濟窮人既失農時是爲棄本且無官助理不得成既費官財又竭人力一方有難何以救之后由是罷役聖曆三年卒年七十一贈文昌右相諡曰文惠仁傑所薦進若張東之桓彥範敬暉姚崇等皆爲中興名臣始居母喪有白鵲馴擾之祥中宗卽位追贈司空睿宗又

封梁國公子光嗣景暉

光嗣聖曆初爲司府丞武后召宰相各舉尙書郎一人仁傑薦光嗣由是拜地官員外郎以稱職聞后曰祁奚內舉果得人歷淄許貝三州刺史母喪奪爲太府少卿固讓睿宗嘉其誠許之累遷揚州長史以罪貶歙州別駕卒景暉官魏州司功叅軍貪暴爲虐民苦之因共毀其父生祠不復奉至元和中田弘正鎮魏博始奏葺之血食不絕族孫兼謨

兼謨字汝諧及進士第辟襄陽府使剛正有祖風令狐楚執政薦授左拾遺數上書言事歷刑部郎中斬鄧鄭三州刺史歲旱饑發粟賑濟民人不流徙改蘇州以治最擢給事中左藏史盜度支繼帛文宗以經赦詔勿治兼謨封還詔書帝問之對曰典史犯贓不可免帝曰朕已赦其長官吏亦宜宥與其失信寧失罪人既而曰後或事有不可勿以還詔爲憚遷御史中丞帝曰御史臺朝廷綱紀一臺正則朝廷治朝廷正則天下治畏忌顧望則職業廢矣卿梁公後當嗣家聲不可不慎兼謨頓首謝江西觀察使吳士矩加給其軍擅用上供錢數十萬兼謨劾奏觀察使爲陛下守土宣國詔條知臨戎賞士州有定數而與奪由己貽弊一方爲諸道缺望請付有司治罪士矩繇是貶蔡州別駕歷兵部侍郎河東節度使還爲尙書左丞武宗子峴封益王命兼謨爲傅俄領天平節度使辭疾以祕書監歸洛陽遷東都留守卒



郝處俊安州安陸人父相貴因隋亂與婦翁許紹據峽州歸國拜滁州刺史封甌山縣公處俊甫十歲而孤故吏歸干繚贈之已能讓不受及長好學嗜漢書崖略暗誦貞觀中第進士解褐著作佐郎襲父爵兄弟友睦事舅謹甚再轉滕王友恥爲王府屬棄官去久之召拜太子司議郎累遷吏部侍郎高麗叛詔李勣爲涇江道大總管處俊副之師入虜境未陣賊遽至舉軍危駭處俊方據胡牀體胖安餐乾糈不顧密昇料精銳擊之虜卻衆壯其謀入拜東臺侍郎時浮屠盧伽逸多治丹曰可以續年高宗欲遂餌之處俊諫曰修短固有命異方之劑安得輕服哉昔先帝詔浮屠那羅邇婆寐案其方書爲祕劑取靈蔞怪石歷歲乃能就先帝餌之饑而大漸上醫不知所爲羣臣請顯戮其人議者以爲取笑夷狄故法不得行前鑑不遠惟陛下深察帝納其言第拜盧伽逸多爲懷化大將軍進處俊同東西臺三品咸亨初幸東都皇太子監國諸宰相皆留而處俊獨從帝嘗曰王者無外何爲守禦而重門擊柝庸待不虞耶我嘗疑秦法爲寬荆軻匹夫耳匕首竊發羣臣皆荷戟侍莫敢拒豈非習慢使然處俊對曰此乃法急耳秦法輒升殿者夷三族人皆懼族安有敢拒邪魏曹操著令曰京城有變九卿各守其府後嚴才亂與徒數十人攻左掖門操登銅爵臺望之無敢救者時王脩爲奉常聞變召車騎未至領官屬步至宮門操曰彼來者必王脩乎此由脩察變識機故冒法赴難向若拘常則遂成禍矣故王者設法不可急亦不可慢詩曰不懈於

一一號第九 九

位人之攸暨仁也式遏寇虐無俾作慝刑也書曰高明柔克沈潛剛克中道也帝曰善轉中書侍郎監修國史初顯慶中令孤德榮劉洸之撰國史其後許敬宗復加緒次帝恨敬宗所紀失實更命宰相刊正且曰朕昔從幸未央宮辟仗既過有橫刀伏草中者先帝斂轡却謂朕曰事發當死者數十人汝可命出之史臣惟敘此爲實處俊曰先帝仁恩溥博類非一臣之弟處傑被擇供奉時有三衛誤拂御衣者懼甚先帝曰左右無御史我不汝罪帝曰此史臣應載處俊乃表左史李仁實欲刪整僞辭會仁實死而止上元初帝觀醜翔鸞閣時赤縣與太常音技分東西朋帝詔雍王賢主東周王顯王西因以角勝處俊曰禮所以示童子無誑者恐其欺詐之心生也二王春秋少意操未定乃分朋造黨使相誇彼俳兒優子言辭無度爭負勝相譏誚非所以導仁義示雍和也帝遽止歎曰處俊遠識非衆臣所逮遷中書令兼太子賓客檢校兵部尚書帝多疾欲遜位武后處俊諫曰天子治陽道后治陰德然則帝與后猶日之與月陽之與陰各有所主不相奪也若失其序上譴見于天下降災諸人昔魏文帝著令帝崩不許皇后臨朝今陛下奈何欲身傳位天后乎天下者高祖太宗之天下非陛下之天下正應謹守宗廟傳之子孫不宜持國與人以喪厥家中書侍郎李義琰曰處俊言可從惟陛下不疑事遂沮又兼太子左庶子拜侍中罷爲太子少保開耀元年卒年七十五贈開府儀同三司荊州大都督帝哀歎其忠舉哀光順門祭以少牢贈絹布



八百段米粟八百石詔百官赴哭官庀葬事子北叟固辭未聽裴炎爲白帝曰處俊死諉臣曰生無益于國死無煩費凡詔賜願一罷之帝聞惻然答其意止賻物而已處俊資約素土木形骸然臨事敢言自秉政在帝前議論諄諄必傳經義凡所規獻得大臣體武后雖忌之以其操履無玷不能害與舅許圜師同里俱宦達鄉人田氏彭氏以高貨顯故江淮間爲語曰貴如郝許富如田彭

孫象賢垂拱中爲太子通事舍人后素銜處俊故因事誅之臨刑極罵乃死后怒令離磔其尸斲夷祖父棺冢自是訖後世將刑人必先以木丸塞口云

朱敬則字少連亳州永城人以孝義世被旌顯一門六闕相望敬則志尚恢博好學重節義然諾善與人交振其急難不責報於人與左史江融左僕射魏元忠善咸亨中高宗聞其名召見異之爲中書令李敬玄所毀故授洹水尉久之除右門闕初武后稱制天下頗流言遂開告密羅織之路興大獄誅將相大臣至是已革命事漸寧敬則諫曰臣聞李斯之相秦也行申商之法重刑名之家杜私門張公室窮無用之費捐不急之官惜日愛功亟戰疾耕旣庶而富遂屠諸侯此救弊之術也故曰刻薄可施於進趨變詐可陳於攻戰天下已平故可易之以寬簡潤之以淳和秦乃不然淫虐滋甚往而不反卒至土崩此不知變之禍也陸賈叔孫通事漢祖當祭陽成臯間糧餉窮智勇困未嘗敢開一說效一奇惟進豪猾貪暴之人

及區宇適定乃陳詩書說禮樂開王道高帝忿然曰吾以馬上得之安事詩書對曰馬上得之可馬上治之乎帝默然於是賈著新語通定禮儀此知變之善也向若高帝斥二子置詩書重攻戰尊首級則復道爭功拔劍擊柱晷漏不保何十二帝二百年乎故曰仁義者聖人之選禮者先王之陳迹祠祝畢芻狗捐渣精流糟粕棄仁義尙爾況其輕乎國家自文明以來天地草昧內則流言外則構難故不設鉤距無以順人不切刑罰無以息暴於是置神器開告端故能不出房闈而天下晏然易主矣臣聞急趨者無善迹促柱者無和聲拯溺不規行療饑不鼎食卽向時祕策今之芻狗也願鑒秦漢之失考時事之宜毀遺廬遺糟粕下寬大之令流曠蕩之澤去萋斐之角牙頓姦險之芒刃塞羅織之妄源掃朋黨之險迹曠然使天下更始豈不樂哉后善其言遷正諫大夫兼修國史乃請高史官選以求名才侍中韋安石嘗閱其史稿歎曰董狐何以加世人不知史官權重宰相宰相能制生人史官兼制生死古之聖君賢臣所以畏懼者也時賦斂繁重民多蕩析后數召入禁中訪失得進同鳳閣鸞臺平章事張易之構魏元忠張說欲誅之無敢言者敬則獨奏曰元忠說秉心忠一而所坐無名殺之失天下望乃得不死以老疾還政事俄改成均祭酒冬官侍郎易之等集名儒譏三教珠英又繪武三思李嶠蘇味道李迥秀王紹宗等十八人像以爲圖欲引敬則固辭不與世潔其爲人出爲鄭州刺史遂致仕侍御史冉祖雍誣奏與王同皎善



貶涪州刺史既明非其罪改廬州代還無淮南一物所乘止一馬子曹步從以歸卒年七十五敬則與三從昆弟居四十年貲產無異及執政每以用人爲先細務不省也嶺表蠻叛以裴懷古有文武才用爲桂州都督蠻服其威惠相率降薦魏知古爲鳳閣舍人張思敬爲右史皆稱職初二張權寵盛敬則密謂敬暉曰公若假太子令舉北軍誅易之兄弟兩飛騎力耳暉卒用其策始崔寔仲長統王郎曹囧論封建指秦爲失敬則以爲秦漢世禮義陵遲不可復用周制封諸侯著論明之儒者以爲知言睿宗嗣位嘗曰神龍以來忠於本朝者李多祚王同皎韋月將燕欽融並衰復矣尙有遺者耶劉幽求曰朱敬則忠正義烈天下所推往爲宗楚客冉祖雍等所誣謫守刺史長安中嘗語臣曰相王必受命當悉心事之及韋氏干紀臣遂見危赴難雖天誘其衷亦敬則敢之於是追贈祕書監諡曰元

敬則兄仁軌字德容隱居養親嘗誨子弟曰終身讓路不枉百步終身讓畔不失一段有赤烏白鵲棲所居樹按察使趙承恩表其異及卒郭山暉員半千魏知古共諡爲孝友先生

贊曰武后乘唐中衰操殺生柄劫制天下而攘神器仁傑蒙耻奮忠以權大謀引張柬之等卒復唐室功蓋一時人不及知故唐呂溫頌之曰取日虞淵洗光咸池潛授五龍夾之以飛世以爲名言方高宗舉天下將以禪后處俊固爭不使妻乘夫陰反陽至姦人銜怨仇皆以逞蓋所謂誼形於主耶敬則一諫而羅

織之獄衰時而後言者歟



唐書卷一百十五

唐書卷一百十六

宋 端 明 殿 學 士 宋 祁 撰

列傳第四十一

二王韋陸二李杜

王綝字方慶以字顯其先自丹楊徙雍咸陽父弘直為漢王元昌友王好畋游上書切諫王稍止然益疏斥終荆王友方慶起家越王府參軍受司馬遷班固二史於記室任希古希古他遷就卒其業武后時累遷廣州都督南海歲有崑崙舶市外區琛琲前都督路元叟冒取其貨舶曾不勝忍殺之方慶至秋毫無所索始部中首領皆墨民詣府訴府曹素相餉謝未嘗治方慶約官屬不得與交通犯者痛論以法境內清畏議者謂治廣未有如方慶者號第一下詔賜瑞錦雜綵以著善政轉洛州長史封石泉縣子遷鸞臺侍郎同鳳閣鸞臺平章事進鳳閣侍郎神功初清邊道大總管武攸宜破契丹凱還且獻俘內史王及善以孝明帝忌月請鼓吹備而不作方慶曰晉穆帝納后當康帝忌月時以為疑荀納謂禮有忌日無忌月自月而推則忌時忌年愈無理據世用其言臣謂軍方大凱作樂無嫌詔可武后幸玉泉祠以山道險欲御輿方慶奏昔張猛諫漢元帝乘船危就橋安帝乃從橋今山阿危峭隘道曲狹比於樓船又復甚危



陛下奈何輕踐畏塗哉后爲罷行方慶嘗以令其及大功喪未葬不聽朝賀未除弗豫享宴比羣臣不遵用類索教誼不可長有詔申責內外畏之后嘗就求義之書方慶奏十世從祖義之書四十餘番太宗求之先臣悉上送今所存惟一軸并上十一世祖導十世祖洽九世祖珣八世祖曇首七世祖僧綽六世祖仲寶五世祖騫高祖規曾祖襄并九世從祖獻之等凡二十八人書共十篇后御武成殿徧示羣臣詔中書舍人崔融序其代閱號寶章集復以賜方慶士人歆其寵以老乞身改麟臺監修國史中宗復爲皇太子拜方慶檢校左庶子后欲季冬講武有司不時辦遂用明年孟春方慶曰按月令孟冬天子命將帥講武習射御角力此乃三時務農一時講武安不忘危之道孟春不可以稱兵兵金也金勝木方春木王而舉金以害盛德逆生氣孟春行冬令則水潦爲敗雪霜大摯首種不入今孟春講武以陰政犯陽氣害發生之德臣恐水潦敗物霜雪損稼夏麥不登願陛下不違時令前及孟冬以順天道手制褒允是歲眞拜左庶子進封公奉入同職事三品兼侍太子讀書方慶奏人臣於天子未有斥太子名者晉山濤啟事稱皇太子不名孝敬爲太子更弘爲崇沛王爲太子更賢爲文今東宮門殿名多嫌觸請一改之以協舊典制可長安二年卒贈兗州都督諡曰貞中宗復位以東宮舊臣贈吏部尙書方慶博學練朝章著書二百餘篇尤精三禮學者有所咨質酬復淵詣故門人次爲雜禮答問家聚書多不減祕府圖書皆異本方慶

歿後諸子不能業隨皆散亡孫備六世孫瑛別傳瑛曾孫搏

贊曰李德裕著書稱方慶爲相時子爲眉州司士參軍武后曰君在相位何子之遠對曰廬陵是陛下愛子今尙在遠臣之子庸敢相近以比倉唐悟文侯事嗟乎君子哉雖造次不忘悟君於善及建言不斥太子名以動羣臣示中興之漸所謂人難言者於方慶難乎哉德裕之稱謂不誣矣

備字靈龜明經調莫州參軍辟范陽節度使張守珪募府時契丹屈烈部將謀入寇河北驪然備至虜中魯說禍福虜乃不入安祿山叛拜博陵常山二太守副河北招討卒贈太常卿自襲至備六世封石泉云備孫遂

遂好輿利操下以嚴累遷鄧州刺史太府卿西北供軍使與度支潘孟陽爭營田事憲宗怒出遂爲柳州刺史親吏韋行素柳季常當受課料兩池吏見遂斥卽抵以罪始詔書出左丞呂元膺劾遂補吏犯贓法當坐而詔稱清能業官按遂犯有狀不宜謂清且柳大州不可使治帝喻之乃下會兵宿淮西亟財賦藉遂幹疆拜宣歙觀察使蔡已平師東討李師道召爲光祿卿淄青行營糧料使辭卿職換檢校左散騎常侍兼御史大夫始調兵食歲三百萬俄而賊誅遂簿羨貲百萬以獻帝高其能于時析齊爲三鎮卽拜遂沂兗海觀察使遂資編刻杖扑皆踰制盛夏治署舍牆垣程督慘峭將吏素悍戾遂輒罵曰反殘賊人人



羞忿裨校王弁與役人浴于川語曰天方雨牆且毀等罪耳乃謀亂明日遂方燕弁率其黨挾兵進遂驚  
匿厥下執而數其罪殺之其副張敦實官屬李矩甫皆死弁自知留事帝以沂海新定畏青鄆亦搖乃拜  
弁開州刺史至徐州械送京州斬東市監軍上遂所製杖出示於朝為戒云

搏字昭逸擢進士第辟佐王鐸滑州節度府累遷蘇州刺史久之以戶部侍郎判戶部乾寧初進同中書  
門下平章事董昌誅出為威勝節度使未行加檢校尚書右僕射浙東西宣撫使會錢鏐兼領二浙故留  
拜門下侍郎同中書門下平章事判度支昭宗建嫡后搏請因赦天下以尊大其禮正拜右僕射遷司空  
封魯國公初中官權盛帝欲剪抑之自石門還政一決宰相羣宦不平搆藩鎮內脅天子搏曰人君務平  
心大體御萬物偏聽產亂古所戒也今奄人盜威福偏制君上道路人皆知之方朝廷多難未可卒除當  
徐以計去之事急且有變崔胤與搏並位素忌搏明達有謀即劾搏為中官外應會胤罷宰相疑搏擠斥  
乃厚結朱全忠薦己復輔政即譖搏與樞密使宋道弼景務修交私將危社稷全忠因顯疏其尤光化三  
年罷為工部侍郎貶溪州刺史又貶崖州司戶叅軍事賜死藍田驛

韋思謙名仁約以近武后父諱為嫌遂以字行其先出雍州杜陵後客襄陽更徙為鄭州陽武人八歲喪  
母以孝聞及進士第累調應城令負殿不得進官吏部尚書高季輔曰予始得此一人豈以小疵棄大德

邪擢監察御史常曰御史出使不能動搖山岳震懼州縣為不任職中書令褚遂良市地不如直思謙劾  
之罷為同州刺史及復相出思謙清水令或弔之答曰吾狷直觸機輒發暇卹身乎丈夫當敢言地要須  
明目張膽以報天子焉能錄錄保妻子耶沛王府長史皇甫公義引為倉曹叅軍謂曰公非池中物屈公  
為數旬客以重吾府改侍御史高宗賢之每召與語雖甚倦徙倚軒檻猶數刻罷疑獄劇事多與叅裁武  
候將軍田仁會誣奏御史張仁禕帝廷詰仁禕懦不得對思謙為辯其枉因言仁會營罔陷人不測者詞  
旨詳暢帝善之仁禕得不坐累遷右司郎中尚書左丞振明綱轉朝廷肅然進御史大夫性褻謬顏色莊  
重不可犯見王公未嘗屈禮或以為譏答曰耳目官固當特立鵬鸞鸞豈眾禽之偶奈何屈以狎之帝  
崩思謙扶疾入臨涕泗冰須俯伏號絕詔給扶侍轉司屬卿復為右肅政大夫故事大夫與御史鈞禮思  
謙獨不答或以為疑思謙曰班列固有差奈何姑息邪垂拱初封博昌縣男同鳳閣鸞臺三品轉納言  
辭疾不許詔肩輿以朝聽子孫侍以太中大夫致仕卒贈幽州都督子承慶嗣立

承慶字延休性謹畏事繼母為篤孝擢進士第補雍王府叅軍府中文翰悉委之王為太子遷司議郎儀  
鳳中詔太子監國太子稍嗜聲色興土功承慶見造作玩好浮廣倡優鼓吹謹譁戶奴小人皆得親左右  
承顏色恐因是作威福宜加繩察乃上疏極陳其端又進諭善箴太子頗嘉納承慶嘗謂人所以擾濁浮



躁本之於心乃著靈臺賦揣當世亦自廣其志太子廢出爲烏程令累遷鳳閣舍人掌天官選屬文敏無留思雖大詔令未嘗著毫失大臣意出爲沂州刺史明堂災上疏諫以文明垂拱後執政者未滿歲率以罪去大抵皆惡逆不道夫構大厦濟巨川必擇文梓餘艘若亟毀而敗則是用朽木乘膠船也臣謂陛下求賢之意切而取人之路寬故一言有合而付大任夫以堯舉舜猶歷試諸難况庸庸者可超處輔相以百揆萬幾畀小人哉書不報未幾復爲舍人掌選病免改太子諭德歷豫虢二州刺史有善政轉天官侍郎修國史凡三掌選銓授平允議者公之長安中拜鳳閣侍郎同鳳閣鸞臺平章事張易之誅承慶以素附離免冠待罪時議草赦令咸推承慶召使爲之無撓色誤辭援筆而就衆嘆其壯然以累猶流嶺表歲餘拜辰州刺史未行以祕書員外少監召兼修國史封扶陽縣子招撰武后紀聖文中宗善之遷黃門侍郎未拜卒帝悼之召其弟相州刺史嗣立會葬因拜黃門侍郎繼其位贈禮部尙書諡曰溫

嗣立字延構與承慶異母少友悌母遇承慶嚴每笞解衣求代母不聽卽遣奴自捶母感寤爲均愛世比晉王覽第進士累調雙流令政爲二川最承慶解鳳閣舍人武后召嗣立謂曰爾父嘗稱二子忠且孝堪事朕比兄弟稱職如而父言今使卿兄弟自相代卽拜鳳閣舍人時學校廢刑濫及善人乃上書極陳承渚後庠序廢散胄子衰缺儒學之官輕章句之選弛貴閥後生以微倖升寒族平流以替業去垂拱間

一號第一

仕入彌多公行私謁選補逾濫經術不聞猛暴相夸陛下誠下明詔追三館生徒敕王公以下子弟一入大學尊尙師儒發揚勸獎海內知嚮然後審界銓總各程所能以之臨人則官無曠民樂業矣又曰揚豫以來大獄屢興窮治連捕數年不絕大猶伺間陰相影會構似是之言正不赦之辜恣行楚慘類自誣服王公士人至連頸就戮道路藉藉咸知其非而鍛鍊已成不可翻動小則身誅大則族夷相緣共坐者庸可勝道彼皆報讎復嫌苟圖功求官賞耳臣願陛下廓天地之施雷雨之仁取垂拱以來罪無重輕所不赦者普皆原洗死者還官生者霑恩則天下瞭然知向所陷罪非陛下意也長安中拜鳳閣侍郎同鳳閣鸞臺平章事時州縣非其人后以爲憂李嶠唐休璟曰今朝廷重內官輕外職每除牧守皆訴不行非過累不得遣情遷臺閣賢者分典大州自近臣始后曰誰爲朕行嗣立曰內典機要非臣所堪請先行以示羣臣后悅以本官檢校汴州刺史由是左肅政大夫楊再思等十八人悉補外未幾承慶知政事嗣立以成均祭酒徙魏洛二州政無它異坐善二張貶饒州刺史入爲黃門侍郎轉太府卿修文館大學士中宗景龍中拜兵部尙書同中書門下三品時崇飾觀寺用度百出又恩倖食邑者衆封戶凡五十四州皆據天下上腴一封分食數州隨土所宜牟取利入至安樂太平公主率取高貲多下家無復如平民有所損免爲封戶者亟於軍興監察御史宋務光建言願停徵封一切附租庸輸送不納嗣立建言



今輿幣耗竭無一歲之儲假遇水旱人須賑給不時軍興士待資裝陛下何以具之伏見營立寺觀累年不絕鳩侈繁麗務相矜勝大抵費常千萬以上轉徙木石廢功害農地藏開發蟄蟲傷露上聖至慈理必不然準之道法則垂質之生人則損陛下豈不是思又食封之家日月猥衆凡用戶部丁六十萬人課二絹則固一百二十萬臣見太府歲調絹纒百萬匹少則十之二有所貸免會不半在比諸封家所入已寡國初功臣共定天下食封不二十家今橫恩特賜家至百四十以上天下租賦在公不足而私有餘又封家徵求各遣奴卑凌突侵漁百姓怨嘆或貿易斷盜誅責紛紜會無少息下民寔乏何以堪命臣願以丁課一送太府封家詣左藏仰給禁止自徵以息重困臣聞設官建吏本於治人而務安之也明官得其人則天下治古者取士先鄉曲之譽然後辟於州州已試然後辟五府五府著聞乃升諸朝得不謂所擇悉而所歷深乎今之取人未試而遽遷務進徵幸比肩係踵故文者治官則回邪贓汙武者治軍則庸懦怯弱補授亡限員外置官吏困供承官竭資奉國家大事豈甚於此古者設爵待士才者有之不才者進則有才之路塞賢人據正遠僥倖之門僥倖開則賢者隱矣賢者隱則人不安人不安國將危矣刺史縣令治人之首比年不加簡擇京官坐員及聲稱下者乃典州吏部年高不善刀筆者乃擬縣朝輕用人何以治國願下有司精加汰擇凡諸曹侍郎兩省二臺及五品以上清望官當先選用刺史縣令所冀守宰稱

職以興太平帝不聽嗣立與韋后屬疏帝特詔附屬籍願待甚渥營別第驪山鸚鵡谷帝臨幸命從官賦詩制序冠篇賜況優備因封嗣立逍遙公名所居曰清虛原幽棲谷嗣立獻木栝藤盤數十物唐隆初拜中書令韋后敗幾死于亂靈王爲救免出爲許州刺史以定策立睿宗賜封百戶徙汝州入爲國子祭酒太子賓客坐宗楚客等削遣制事不執正貶岳州別駕再徙爲陳州刺史開元中河南道巡察使表其廉欲復用會卒年六十六贈兵部尚書諡曰孝初嗣立代承慶爲鳳閣舍人黃門侍郎承慶亦代爲天官侍郎及知政事父子並爲宰相世罕其比有二子恆濟知名

恆開元初爲碭山令政寬惠吏民愛之天子東巡州縣供張皆鞭扑趣辦恆不立威而事給姑子御史中丞宇文融薦恆有經濟才讓以其位擢殿中侍御史累轉給事中爲隴右河西黜陟使時河西節度使蓋嘉運恃左右援橫恣不法妄列功狀恆劾奏之人代其恐出爲陳留太守卒

濟開元初調鄆城令或言吏部選縣令非其人既衆謝有詔問所以安人者對凡二百人惟濟居第一不能對者悉免官於是擢濟醴泉令侍郎盧從愿李朝隱並貶爲刺史濟四遷戶部侍郎爲太原尹著先德詩四章世服其典懿天寶中授尚書左丞凡三世居之濟文雅頗能修飾政事所至有治稱終馮翊太守子奧夏令亦以能政聞



嗣立孫弘景擢進士第數佐節度府以左補闕召爲翰林學士蘇光榮爲涇原節度使弘景當草詔書辭不如旨罷學士累遷度支郎中張仲方黜李吉甫謫得罪憲宗意弘景隨助出爲綿州刺史李夷簡鎮淮南奏以自副召入再遷給事中駙馬都尉劉士涇賂權近擢太僕卿弘景上還詔書穆宗使喻其先人昌有功朕所以念功睦親者弘景固執帝怒使宣慰安南由是有名時蕭俛輔政弘景議論常佐佑之遷再遷吏部侍郎銓綜平序貴幸憚其嚴不敢恩以私歷陝虢觀察使召拜尚書左丞駁正吏銓所除六十餘官不當進資於是鄒綱丁公著楊嗣復皆奪俸郎吏肅然望風修整吏部員外郎楊虞卿以累下吏詔弘景與御史詳讞虞卿私造門弘景厲言曰有詔按公尚私謁邪虞卿多朋助自謂必見納及是惶恐去遷禮部尚書東都留守卒年六十六贈尚書左僕射弘景以直道進議論持正有守當時風教所倚賴爲長慶名卿

陸元方字希仲蘇州吳人陳給事黃門侍郎琛之曾孫伯父東之善書名家官太子司議郎元方初明經後舉八科皆中累轉監察御史武后時使嶺外方涉海風濤驚壯舟人懼元方曰吾受命不私神豈害我趣使濟而風訖息使還除殿中侍御史擢鳳閣舍人秋官侍郎爲來俊臣所陷后置不罪遷鸞臺侍郎同鳳閣鸞臺平章事坐附會李昭德貶綏州刺史擢天官侍郎兼司衛卿或言其薦引皆親黨后怒免官令

白衣領職元方薦人如初后召讓之對曰舉臣所知不暇問讐黨又薦其友崔玄暉有宰相才后知無他復拜鸞臺侍郎同鳳閣鸞臺平章事后嘗問外事對曰臣備位宰相大事當白奏民間碎務不敢以聞忤旨下除太子右庶子進文呂左丞卒元方素清慎再執政每進退羣臣后必先訪問外祕莫知臨終取奏藁焚之曰吾陰德在人後當有興者又曰吾當壽但領選久耗傷吾神有一柙生平所緘鑰者歿後家人發之乃前後詔敕贈越州都督諸子皆美才而象先景倩景融尤知名

象先器識沈邃舉制科高第爲揚州參軍事時吉瓊與元方同爲吏部侍郎瓊擢象先爲洛陽尉元方不肯當瓊曰爲官擇人豈以吏部子廢至公邪卒以授俄遷監察御史累授中書侍郎景雲中進同中書門下平章事監修國史初太平公主謀引崔湜爲宰相湜曰象先人望宜幹樞近君不者湜敢辭主不得已爲言之遂並知政事然其性恬靜寡欲議論高簡爲時推向湜嘗曰陸公加於人一等公主既擅權宰相爭附之象先未嘗往謁及謀逆召宰相議曰靈王長不當廢嫡立庶象先曰帝得立何也主曰帝有一時功今失德安可不廢對曰立以功者廢必以罪今不聞天子過失安得廢主怒更與竇懷貞等謀卒誅死時象先與蕭至忠岑羲等坐爲主所進將同誅玄宗遽召免之曰歲寒然後知松柏之後凋也以保護功封兗國公賜封戶二百初難作睿宗御承天樓羣臣稍集帝麾曰助朕者留不者去於是投名自驗者



事平立宗得所投名詔象先收按象先悉焚之帝大怒欲并加罪頓首謝曰赴君之難忠也陛下以德化天下奈何殺行義之人故臣違命安反側者其敢逃死帝寤善之時窮治忠義等黨與象先密爲申救保全甚衆當時無知者罷爲益州大都督府長史劍南按察使爲政尙仁恕司馬韋抱真諫曰公當峻扑罰以示威不然民慢且無畏答曰政在治之而已必刑法以樹威乎卒不從而蜀化累徙蒲州刺史兼河東按察使小吏有罪誠遣之大吏白爭以爲可杖象先曰人情大抵不相違謂彼不曉吾言邪必責者當以汝爲始大吏慙而退嘗曰天下本無事庸人擾之爲煩耳第澄其源何憂不簡邪故所至民吏懷之入爲太子詹事歷戶部尙書知吏部選事母喪免起爲揚州大部督府長史遷太子少保卒年七十二贈尙書左丞相諡曰文貞始象先名景初睿宗曰子能紹先構是爲象賢者乃賜名焉

弟景倩爲扶溝丞河南按察使畢構覆州縣殿最欲必得實有吏言狀曰某疆清某詐清惟景倩曰真清終監察御史

景融長七尺美姿質寬中而厚外博學工筆札以蔭補千牛轉新鄭令政有風績累遷工部尙書東京留守卒贈廣陵郡都督景融於象先後母弟也象先被管景融諫不入則自楚母爲損威人多其友四世孫希聲

希聲博學善屬文通易春秋老子論著甚多商州刺史鄭愚表爲屬後去隱義興久之召爲右拾遺時儉腐秉權歲數歉梁宋尤甚希聲見州縣剝敝上言當謹視盜賊明年王仙芝反株蔓數十州遂不制擢累歙州刺史昭宗聞其名召爲給事中拜戶部侍郎同中書門下平章事在位無所輕重以太子少師罷李茂貞等兵犯京師與疾避難卒贈尙書左僕射諡曰文

元方從父餘慶陳右衛將軍珣孫方雅有祖風已冠名未顯兄玄表惜曰爾名宦不立奈何餘慶感激閉戶誦書三年以博學稱舉制策甲科補蕭尉累遷陽城尉武后封嵩山以辦具勞擢監察御史聖曆初靈勝二州党項誘北胡寇邊詔餘慶招慰喻以恩信蕃酋率衆內附遷殿中侍御史鳳閣舍人嘗命草詔殿上恐懼不能得一詞降左司郎中久之封廣平郡公太子右庶子餘慶於寒品晚進必悉力薦藉人有過輒面折退無一言開元初爲河南河北宣撫使薦富春孫述京兆韋述吳興蔣冽河南達奚珣後皆爲知名士遷大理卿終太子詹事諡曰莊雅善趙貞固盧藏用陳子昂杜審言宋之問畢構郭襲微司馬承禎釋懷一時號方外十友餘慶才不逮子昂等而風流敏辯過之初武后時酷吏用事中宗朝倖臣貴主斜封大行昭利畜禍之人與相乾沒雖亟貴驟用而戮不反踵餘慶以道自將雖仕不赫赫訖無悔尤子瓌字仲采舉明經補長安尉以清幹稱開元初中朝臣子弟不任京畿改新鄉令人爲立祠用按察使



宇文融薦遷澠池令累遷兵部郎中東曠騎使還除洛陽令時車駕在洛摧勒姦豪人不敢犯爲中書令  
蕭嵩所器嵩罷佗宰相俾陰嵩短瓌曰與人交過且不可言況無有邪以是忤貴近出爲太原少尹累  
徙西河太守封平恩縣男屬邑多虎前守設檻穿瓌至徹之而虎不爲暴

王及善洛州邯鄲人父君愕有沈謀隋亂并州人王君廓掠邯鄲君愕往說曰隋氏失御豪俊共救其亂  
宜撫納遺賾而保全之觀時變待真主足下無尺寸之地兼旬之糧劫衆而興但恣殘剽所過失望竊爲  
足下羞之君廓謝曰計安出答曰并陘之險可先取君廓從其言遂屯并陘山高祖入關與君廓偕來拜  
君愕大將軍封新興縣公累遷左武衛將軍從太宗征遼領左屯營兵與高麗戰駐驛山死于陣贈左衛  
大將軍幽州都督刑國公陪葬昭陵及善以父死事授朝散大夫襲刑國公爵皇太子弘立擢及善左奉  
裕率太子宴于宮命宮臣擲倒及善辭曰殿下自有優人臣苟奉令非羽翼之美太子謝之高宗聞賜絹  
百匹除右千牛衛將軍帝曰以爾忠謹故擢三品要職羣臣非搜辟不得至朕所爾佩大橫刀在朕側亦  
知此官貴乎病免召爲衛尉卿垂拱中歷司屬卿山東飢詔爲巡撫賑給使拜春官尙書出爲秦州都督  
益州長史加光祿大夫以老病致仕神功元年契丹擾山東擢魏州刺史武后勞曰逆虜盜邊公雖病可  
與妻子行日三十里爲朕臥治爲屏蔽也因延問朝政得失及善陳治亂所宜后悅曰禦寇末也輔政本

也公不可行留拜內史來俊臣繫獄當死后欲釋不諫及善曰俊臣凶狡不道引亡命汙戮善良天下疾  
之不聊絕元惡且搖亂胎禍憂未既也后納之廬陵王之還密贊其謀既爲皇太子又請出外朝以安羣  
臣及善不甚文而清正自將臨事不可奪有大臣節時二張怙寵每待宴無人臣禮及善數裁抑之后不  
悅曰卿年高不宜侍游燕但檢校閣中及善卽移病餘月后不復問歎曰中書令可一日不見天子乎遂  
乞骸骨猶不許改文昌左相同鳳閣鸞臺三品卒年八十二贈益州大都督諡曰貞簡葬乾陵

李日知鄭州滎陽人及進士第天授中歷司刑丞時法令嚴更爭爲酷日知獨平寬無文致嘗免一囚死  
少卿胡元禮執不可曰吾不去曹囚無生理日知曰僕不去曹囚無死法皆以狀獻而武后用日知議神  
龍初爲給事中母老病取急調侍數日須髮輒白母未及封而卒方葬吏乃齋贈制日知殞絕于道左右  
爲泣莫能視巡察使路敬潛欲表其孝使求狀辭不報服除累遷黃門侍郎景龍初同中書門下平章事  
轉御史大夫仍知政事初安樂公主館第成中宗臨幸燕從官賦詩日知卒章獨以規誠睿宗佗日謂曰  
嚮日雖朕亦不敢諫非公挺直何能爾卽拜侍中先天元年罷爲刑部尙書屢乞骸骨許之日知將有請  
不謀于家歸乃治行妻驚曰產利空空何辭之遽日知曰仕至此已過吾分人亦何厭之有若厭于心無  
日而足也既罷不治田園唯飾臺池引賓客與娛樂開元三年卒日知貴諸子方總角皆通婚名族時人



譏之後少子伊衡以妾爲妻鬻田宅至兄弟訟鬪家法遂替云

杜景佺冀州武邑人性嚴正舉明經中第累遷殿中侍御史出爲益州錄事參軍時隆州司馬房嗣業徙州司馬詔未下欲卽視事先笞責吏以示威景佺謂曰公雖受命爲司馬州未受命何急數日祿邪嗣業怒不聽景佺曰公持咫尺制真僞莫辨卽欲攪亂一府敬業揚州之禍非此類邪叱左右罷去旣乃除荆州司馬吏歌之曰錄事意與天通州司馬折威風由是寔知名入爲司刑丞與徐有功來俊臣侯思止專治詔獄時稱遇徐杜者生來侯者死改秋官員外郎與侍郎陸元方按員外郎侯味虛罪已推輒釋之武后怒其不待報元方大懼景佺獨曰陛下明詔六品七品官文辨已定待命于外今雖欲罪臣奈明詔何宰相曰詔爲司刑設何預秋官邪景佺曰詔令一布無臺寺之異后以爲守法擢鳳閣舍人遷洛州司馬延載元年檢校鳳閣侍郎同鳳閣鸞臺平章事后嘗季秋出梨華示宰相以爲祥衆賀曰陛下德被草木故秋再華周家仁及行葦之比景佺獨曰陰陽不相奪倫漬卽爲災故曰冬無愆陽夏無伏陰春無淒風秋無苦雨今花木黃落而木復華漬陰陽也竊恐陛下布德施令有所虧紊臣位宰相助天治物治而不和臣之咎也頓首謝罪后曰眞宰相會李昭德下獄景佺苦申救后以爲面欺左遷秦州刺史入拜司刑卿聖歷元年復以鳳閣侍郎同鳳閣鸞臺平章事契丹入寇陷河北數州虜已去武懿宗欲盡論其罪景

佺以爲舊從可原后如其議罷爲秋官尙書坐漏省內語降司刑少卿出爲并州長史道病卒贈相州刺史初名元方垂拱中改今名

李懷遠字廣德邢州柏仁人少孤嗜學宗人欲藉以高蔭懷遠辭退而曰因人之勢高士恥之假蔭而官吾志邪擢四科第累轉司禮少卿出爲本州刺史改冀州遷揚益二都督府長史徙同州刺史治尙清簡累遷鸞臺侍郎進同鳳閣鸞臺平章事封平鄉縣男以左散騎常侍同中書門下三品爵趙郡公賜實封戶三百以老聽致仕中宗還京師召知東都留守復加同中書門下三品懷遠久貴益素約不治居室嘗乘款段馬僕射豆盧欽望謂曰公貴顯顧當然邪答曰吾幸其馴不願它駿神龍二年卒帝賜錦衾斂自爲文祭之贈侍中諡曰成

子景伯景龍中爲諫議大夫中宗宴侍臣及朝集使酒酣各命爲回波詞或以諂言媚上或要巧謬寵至景伯獨爲箴規語以諷帝帝不悅中書令蕭至忠曰眞諫官也景雲中進太子右庶子時有建言置都督府非是詔羣臣普議景伯與太子舍人盧備議今天下諸州分隸都督專生殺刑賞使授非其人則權重費生非疆幹弱枝經邦軌物之誼願罷都督留御史以時按察秩卑任重以制姦究便繇是停都督終右散騎常侍



子彭年有才剖析明悟歷遷中書舍人吏部侍郎與李林甫善常慕山東著姓為婚姻引就清列典選七年卒以賊敗長流臨賀郡天寶十二載擢為濟陰太守徙馮翊天子幸蜀陷於賊脅以偽官憂憤死贈禮部尚書

唐書卷一百十六

唐書卷一百十六考證

韋思謙子承慶贈禮部尚書○舊書贈祕書監

陸元方子象先入為太子詹事歷戶部尚書○舊書歷工部尚書

起為揚州大都督府長史○舊書起復同州刺史

杜景儉傳○舊書及通鑑綱目俱作景儉

聖曆元年復以鳳閣侍郎同鳳閣鸞臺平章事○沈炳震曰按舊書聖曆二年則天紀神功元年皆不合



唐書卷一百十六考證

唐書卷一百十七

宋 端 明 殿 學 士 宋 祁 撰

列傳第四十二

裴劉魏李吉

裴炎字子隆絳州聞喜人寬厚寡言笑有奇節補弘文生休澣宅生或出游炎讀書不廢有司欲薦狀以業未就辭不舉服勤十年尤通左氏春秋舉明經及第補濮州司倉參軍歷御史起居舍人遷黃門侍郎調露二年同中書門下三品進拜侍中高宗幸東都留皇太子京師以炎調護帝不豫太子監國詔炎與劉齊賢郭正一於東宮平章政事及大漸受遺輔太子是為中宗改中書令舊宰相議事門下省號政事堂長孫無忌以司空房玄齡以僕射魏徵以太子太師皆知門下省事至炎以中書令執政事筆故徙政事堂於中書省中宗欲以后父韋玄貞為侍中及授乳媪子五品官炎固執不從帝怒曰我意讓國與玄貞豈不可何惜侍中邪炎懼因與武后謀廢帝后命炎洎劉禕之率羽林將軍程務挺張虔勗勒兵入宮宣太后令扶帝下殿帝曰我何罪后曰以天下與玄貞安得無罪乃廢帝為廬陵王更立豫王為皇帝以定策功封永清縣男后已持政稍自肆於是武承嗣請立七廟追王其先炎諫曰太后天下母以盛德



臨朝宜存至公不容追王祖考示自私且獨不見呂氏事乎后曰呂氏之王權屬生人今追崇先世在亡迹異安得同哉炎曰蔓草難圖漸不可長后不悅而罷承嗣又諷太后誅韓王元嘉魯王靈夔以絕宗室望劉禕之章仁約畏默不敢言炎獨固爭后愈銜怒未幾賜爵河東縣侯豫王雖爲帝未嘗省天下事炎謀乘太后出游龍門以兵執之還政天子會久雨太后不出而止徐敬業兵興后議討之炎曰天子年長矣不豫政故豎子有辭今若復子明辟賊不討而解御史崔膺曰炎受顧託身總大權聞亂不討乃請太后歸政此必有異圖后乃捕炎送詔獄遣御史大夫塞味道御史魚承暉參鞠之鳳閣侍郎胡元範曰炎社稷臣有功於國悉心事天下所知臣明其不反納言劉齊賢左衛率蔣儼繼辨之后曰炎反有端顧卿未知耳元範齊賢曰若炎反臣輩亦反矣后曰朕知炎反卿輩不反遂斬于都亭驛炎被劾或勉其遜辭炎曰宰相下獄理不可全卒不折節籍其家無僮石之贏初炎見裴行儉破突厥有功沮薄之乃斬降廣阿史那伏念等五十餘人議者恨其媚克且使國家失信四夷以爲陰禍有知云睿宗立贈大尉益州大都督諡曰忠元範申州義陽人介廉有才以炎故流死嵩州炎從子仙先

仙先未冠推蔭爲太僕丞炎死坐流嶺南上變求面陳得失后召見盛氣待之曰炎謀反法當誅尙何道仙先對曰陛下唐家婦身荷先帝顧命今雖臨朝當責任大臣須東宮年就德成復子明辟奈何遽王諸

武斥宗室炎爲唐忠臣而戮逮子孫海內憤怨臣愚謂陛下宜還太子東宮罷諸武權不然豪桀乘時而動不可不懼后怒曳出杖之朝堂長流漢州歲餘逃歸爲吏蹟捕流北廷無復名檢專居賄五年至數千萬娶降胡女爲妻妻有黃金駿馬牛羊以財自雄養客數百人自北廷屬京師多其客詞候朝廷事聞知十常七八時補闕李秦授爲武后謀曰讖言代武者劉無疆姓殆流人乎今大臣流放者數萬族使之叶亂社稷憂也后謂然夜拜秦授考功員外郎分走使者賜墨詔慰安流人實命殺之仙先知以橐駝載金幣賓客奔突厥行未遠都護遣兵追之與格鬪爲所執械繫獄以狀聞會武后度流人已誅畏天下姍請更遣使者安撫十道以好言自解釋曰前使使慰安有罪而不曉朕意擅誅殺殘忍不道朕甚自咎今流人存者一切縱還繇是仙先得不死中宗復位求炎後授仙先太子詹事丞遷秦桂廣三州都督坐累且誅賴宰相張說右之免官久乃擢范陽節度使太原京兆尹以京師官冗奏罷畿縣員外及試官進工部尚書年八十六以東京留守累封翼城縣公卒官下

劉禕之字希美常州晉陵人父子翼字小心在隋爲著作郎峭直有行嘗面折僚友短退無餘營李伯藥曰子翼書人人都不憾貞觀初召之辭以母老詔許終養江南道巡察使李襲譽嘉其孝表所居爲孝慈里母已喪召拜吳王府功曹參軍終著作郎弘文館直學士禕之少與孟利貞高智周郭正一俱以文辭



稱號劉孟高郭並直昭文館俄遷右史弘文館直學士上元中與元萬頃等偕召入禁中論次新書凡千餘篇高宗又密與參決時政以分宰相權時謂北門學士兄懿之亦給事中同兩省先是姊爲內官武后遣至外家問疾禕之因賀蘭敏之私省之坐流嵩州后爲丐還除中書舍人儀鳳中吐蕃寇邊帝訪侍臣所以置之計之之宜人人異謀禕之獨勸帝夷狄猶禽獸雖被馮陵不足校願戢威紆百姓之急帝內其言俄拜相王府司馬檢校中書侍郎帝謂曰卿家忠孝朕子賴卿以師矩冀逢在麻不扶而挺也后既立王爲帝以其參奉大議愈親之擢中書侍郎同中書門下三品賜爵臨淮縣男方是時詔令叢繁禕之思致華敏裁可占授少選可待也司門員外郎房先敏坐累貶衛州司馬訴于相府內史寒味道謂曰太后旨禕之曰乃上從有司所奏云后聞以味道歸非於上貶青州刺史加禕之太中大夫賜物百段后因曰君爲元首臣爲股肱以手足疾移於腹背尙爲一體乎禕之引咎於己忠臣也納言王德真推順曰戴至德無異才惟能歸善於君爲時所服后曰善後私語鳳閣舍人賈大隱曰后能廢昏立明盍反政以安天下大隱表其言后怒曰禕之乃負我垂拱中或告禕之受歸誠州都督孫萬榮金與許敬宗妾私通太后遣肅州刺史王本立鞠治以敕示禕之禕之曰不經鳳閣鸞臺何謂之敕后以爲拒制使賜死于家年五十七初禕之得罪睿宗以舊屬申理之姻友冀得釋禕之曰吾死矣太后威福由己而帝營救速吾禍也

在獄上疏自陳臨誅洗沐神色自若命其子執筆占爲表子號塞不通書禕之乃自捉筆得數紙詞懇哀到人皆傷之麟臺郎郭翰太子文學周思鈞悵歎其文后惡之貶翰巫州司法參軍思鈞播州司倉參軍睿宗嗣位贈禕之中書令翰嘗爲御史巡察隴右多所按劾次靈州時狄仁傑爲刺史民爭言有異政翰就館以筆紙置于案謂僚屬曰入其境其政可知願薦使君美於朝毋久留卽命駕去性寬簡讀老子至和其光同其塵慨然曰大雅君子以保其身乃辭憲官改麟臺郎云

魏玄同字和初定州鼓城人祖士廓仕齊爲輕車將軍玄同進士擢第調長安令累官司列大夫坐與上官儀善流嶺外既廢不自護藉乃馳逐爲生事上元初會赦還工部尙書劉審禮表其材拜岐州長史再遷吏部侍郎永淳元年詔與中書門下同承受進止平章事封鉅鹿男上疏言選舉法弊曰方今人不加富盜賊未衰禮誼寔薄者下吏不稱職庶官非其才取人之道有所未盡也武德貞觀庶事草創人物固乏天祚大聖享國永年異人間出諸人流歲以千計官有常員人無定限選集猥至十不收一取舍滯紊夏商以前制度多闕至周煥然可觀諸侯之臣不皆命天子王朝庶官不專一職穆王以伯冏爲太僕正命曰慎簡乃僚此乃自擇下吏之言也太僕正特中大夫耳尙以僚屬委之則三公九卿亦當然也故太宰內史並掌爵祿廢置司徒司馬別掌興賢詔事是分任羣司而統以數職王命其大者而自擇其小



者漢制諸侯自置吏四百石以下其傅相大臣則漢爲置之州郡掾吏督郵從事悉任之牧守自魏晉以後始歸吏部而迄于今以刀筆量才簿書察行法與世倣其來久矣尺丈之量鍾庾之器非所及則不能度非所受則無以容況天下之大士類之衆可委數人手乎又尸厥任者間非其選至爲人擇官爲身擇利下筆繫親疏措情觀勢要悠悠風塵此焉奔競使百行折之一面九能斷之數言不亦難乎且臣聞蒞官者不可以無學傳曰學以從政不聞以政入學今貴戚子弟一皆早仕弘文崇賢羊牛犖脚之類程較既淺技能亦薄而門閥有素資望自高夫所謂胥子者必裁諸學少則受業長而入官然後移家事國謂之德進夫少仕則不務學輕試則無才又勳官三衛流外之屬不待州縣之舉直取書判非先德後言之誼臣聞國之用人如人用財貧者止精樵富者餘梁肉故當衰微乏賢則磨策朽鈍以馭之太平多士則遴東髦俊而使之今選者猥多宜以簡練爲急竊見制書三品至九品並得薦士此誠仄席旁求意也但褒貶不明故上不愛黜責下不盡搜揚莫慎所舉而苟以應命且惟賢知賢聖人篤論臯陶既舉不仁者達身苟濫進庸及知人不擇舉者之賢而擇所舉之濫不可得已以陛下聖明國家德業而不建經久之策但顧望魏晉遺風臣竊惑之願少遵周漢之規以分吏部選卽所用詳所失辭矣不納進拜文昌左丞鸞臺侍郎同鳳閣鸞臺三品遷地官尙書檢校納言玄同與裴炎締交能保終始故號耐久朋先是狄仁

傑督太原運失米萬斛將坐誅玄同救免而河陽令周興未知也數於朝堂聽命玄同曰明府可去矣毋久留興以爲沮己銜之至是誣玄同言太后老矣當復皇嗣后不察賜死于家年七十三初監察御史房濟監刑謂曰丈人蓋上變冀召見得自陳玄同曰人殺與鬼殺等耳不能爲告事人玄同子恬字安禮事親以孝聞第進士爲御史主簿開元中至穎王傳

李昭德雍州長安人父乾祐貞觀初爲殿中侍御史郁令裴仁軌私役門卒太宗欲斬之乾祐曰法令與天下共之非陛下獨有也仁軌以輕罪致極刑非畫一之制刑罰不中則民無所措手足帝意解繯是免死遷侍御史母卒廬墓側負土成墳帝遣使就弔表異其閭厯治書侍御史有能名永徽初擢御史大夫爲褚遂良所惡出爲邢魏二州刺史乾祐雖疆直而昵小人嘗爲書與所善吏刺取朝廷事迷隱其辭爲吏所賣遂良白發於朝坐流驩州召拜滄州刺史入爲司刑太常伯舉雍州司功參軍崔擢爲尙書郎不得報私語擢所以然後擢犯罪告乾祐漏禁中語以自贖詔免官卒昭德疆幹有父風擢明經累官御史中丞永昌初坐事貶振州陵水尉還爲夏官侍郎如意元年拜鳳閣侍郎同鳳閣鸞臺平章事武后營神都昭德規創文昌臺及定鼎上東諸門標置華壯洛有二橋司農卿韋機徙其一直長夏門民利之其一橋廢省巨萬計然洛水歲淤蓄之繕者告勞昭德始累石代柱銳其前廝殺暴濤水不能怒自是無患俄



檢校內史薛懷義討突厥以昭德爲行軍長史不見虜還武承嗣任文昌左相昭德諫曰承嗣已王不宜典機衡以惑衆庶且父子猶相篡奪況姑姪乎后矍然曰我未之思也乃罷承嗣爲太子少保洛陽人王慶之率險佞數百人請以承嗣爲皇太子后不許因請后遣昭德詰其故昭德答殺慶之餘黨散走因奏曰自古有姪爲天子而爲姑立廟乎以親親言之天皇陛下夫也皇嗣陛下子也當傳之子孫爲萬世計陛下承天皇顧託而有天下又立承嗣臣見天皇不來食矣后乃止承嗣恨譖短之后曰吾任昭德而獲安枕是代我勞非而所知也有人獲洛水白石而赤文者獻闕下曰此石赤心故以獻昭德叱曰洛水餘石豈盡能反邪時來俊臣侯思止舞文法數誅陷大臣人皆懼昭德每奏其誣罔不道狀卒撈殺思止其黨稍摧沮然昭德頗怙權爲衆指目魯王府功曹參軍丘悅上疏曰臣聞魏冉誅庶族以安秦忠也弱諸侯以彊國功也然出入自專擊斷無忌威震人主不聞有王張祿一言而卒用憂死向使昭王不卽覺悟則秦之霸業或不傳子孫陛下天授以前萬機獨斷公卿百執具職而已自長壽以來厭怠細政擢委昭德秉總權綱而才小任重負氣彊復聾盲下民芻狗同列刻薄慶賞多所矯虔聲威翕習天下杜口臣伏見南臺敕目羣臣奏請陛下制已曰可而昭德建言不可制又從之且人臣參奉機密獻可替否事或便利不豫咨謀而畫可已行方輿駸異是陽露擅命以示於人歸美引咎諂不類此一切奏讞皆承風指

陰相傅會臣觀其膽乃大於身鼻息所衝上拂雲漢夫小家治生千百之貲將以託人尙憂失授況天下之重可輕委寄乎履霜堅冰須防其漸大權一去收之良難願陛下察臣之言又果殺鄧注著石論數千言述其事恣鳳閣舍人逢弘敏以聞后由是惡之謂姚璿曰誠如所言昭德固負國矣乃貶欽州南賓尉俄召授監察御史萬歲通天二年來俊臣誣以逆謀既而俊臣亦下獄同日誅時甚雨衆庶莫不寃昭德而快俊臣神龍二年贈左衛史大夫建中三年加贈司空

吉頊洛州河南人長七尺性陰克敢言事舉進士及第調明堂尉父哲爲易州刺史坐賊當死頊往見武承嗣自陳有二女弟請侍巾盥者承嗣喜以積車迎之三日未言問其故答曰父犯法且死故憂之承嗣爲表貸哲死遷頊龍馬監劉思禮謀反頊上變事命武懿宗雜訊因諷囚引近臣高闕生平所恃者凡三十六姓捕繫詔獄撈楚百慘以成其獄同日論死天下寃之擢右肅政臺中丞來俊臣下獄司刑當以死狀三日不下頊從武后游苑中因問言臣爲陛下耳目知俊臣狀人不出人以爲疑后曰朕以俊臣有功徐思之頊曰于安遠告虺貞反今爲成州司馬俊臣誣殺忠良罪惡如山國竊賊也尙何惜於是后斬俊臣而召安遠爲尙食奉御突厥陷趙定授檢校相州刺史且募兵制虜南向頊不知武后曰賊方走藉卿坐鎮耳初太原温彬茂死高宗時封一笥書妻曰吾死後須年及垂拱獻之垂拱初妻上其書



言后革命事及突厥至趙去故后知虜且還項至募士無應者俄詔以皇太子爲元帥應募日數千項還言狀后曰人心若是邪卿可爲羣臣道之項誦語于朝諸武惡之始項善張易之殿中少監田歸道鳳閣舍人薛稷正諫大夫員半千夏官侍郎李迥秀皆爲控鶴內供奉項又彊敏故后倚爲腹心聖歷二年進天官侍郎同鳳閣鸞臺平章事爲刺史時武懿宗計契丹退保相州後爭功殿中懿宗陋短俯僂項嚴語侵之無所容假后怒曰我在乃藉諸武它日安可保衡之張易之兄弟以寵盛思自全問項計安出項曰公家以倖進非有大功於天下勢必危吾有不朽策願効之非止保身且世世不絕胙易之流涕請項曰天下思唐久矣廬陵斥外相王幽閉上春秋高武諸王非海內屬意公盍從容請相王廬陵以副人望易弔爲賀之資也易之昌宗乘間如項教后意乃定既而知項與謀召見問狀項對廬陵相王皆陛下子先帝顧託於陛下當速有所付乃還中宗明年項坐弟冒僞官貶琰川尉及辭召見泣曰臣去國無復再謁願有所言然疾棘請須臾間后命坐項曰水土皆一盍有爭乎曰無曰以爲塗有爭乎曰無曰以塗爲佛與道有爭乎曰有之項首謝曰雖臣亦以爲有夫皇子外戚有分則兩安今太子再立而外家諸王並封陛下何以和之貴賤親疏之不明是驅使必爭臣知兩不安矣后曰朕知之業已然且奈何項尋徙始豐尉客江都卒中宗之立項實倡之會得罪無知者睿宗初有發明其忠乃下詔贈御史大夫

贊曰異乎炎之暗于幾也知中宗之不君不知武后之盜廟假虎翼而責其搏人死固宜哉昭德項進不以道君子恥之雖然一情區區抑武興唐其助有端則賢炎遠矣禕之玄同漏言及誅不失所以事君者云



唐書卷一百十七

唐書卷一百十七考證

裴炎傳元範申州義陽人以炎故流死嶺州○舊書坐救炎流死瓊州

李昭德傳坐流驩州召拜滄州刺史○舊書坐流愛州乾封中起爲桂州都督

吉頊傳頊尋徙始豐尉卒○舊書改安固尉尋卒







